


平播全書  
四









平 播 全 書

(四)

李 化 龍 著

# 平播全書卷六

## 奏議

### 播州善後事宜疏

題爲播地蕩平、經制宜定、敬陳善後切要事宜、伏乞聖明採擇、以永奠遐方事。臣祇奉皇上威靈、拮据播事、戎馬之役、偶爾告竣、一切奏凱獻俘、及議敘文武效勞人員、俱已次第具題、塵瀆天聽矣。顧播夷地也、其人夷人也、身椎跌而手刀劍、蓋已八百餘年於茲矣。皇上旣拓疆土而混一之、則必取鱗介而冠裳之、籍人民土地而版圖之、然而綜理弗周、則制度缺、官屬不備、則任使艱、法令弛則釁孽易萌、恩澤壅則人心弗固、善後之策、安可不亟爲之講乎。先是臣於平播之初、卽照便宜行事、委重慶府推官高折枝、攝兵備道事、委保甯府同知張鼇、攝知府事、各入播經理去後、隨准兵部咨、爲欽奉聖諭事、該本部題條爲十事、內開一、計善後、謂宜亟行督撫衙門、備查播州一地、某處與某處連區、某地與某地接軫、作何分隸、某處應設某府、某州縣、作何安置、某地應置何將、作何統轄、及一切善後合行事宜、悉心計處、所有子遺、作何安插、空闊處所、作何招徠、務令曠悍不毛之地、盡入範圍、撫馭之中、被我衣冠、服我聲教、奠安絕徼、以紓西顧等因、題奉聖旨、元兇旣殲、凡協從牽累的都免窮治、流移的招他復業、毋許豪強、乘機兼併、還與優加賑恤、以安新定地方、兵馬久戍勞苦、酌量應撤的、次第撤還、永靖諸苗、橫恣逋誅、就著撤回兵馬、勦

處不必待奏。可卽便宜行事。軍中一應有功人員。俱從公敘來。其餘皆依擬。該督撫悉心行欽此。欽遵備咨到臣。隨該臣備行三省撫鎮司道會議去後。各據回覆到臣。大段主於改土設流。而就中經制委曲。亦不能盡一者。於時臣已積憂抱病。不能擊劄。但聽各委官以便宜處置。聽候新督臣到日。裁處題請而已。乃今浸尋縣延。條逾數月。新督臣杳無視事之期。而各官之奉委者。未經銓註。終不專一。乃同知張鼐已物故矣。推官高折枝已病去矣。臣恐播州從此遂壞。將來更費經營。今不得不勉彊籌度。以其體國經野。張官置吏之大槩。具疏以請。其餘政體瑣細。有煩料理事勢。縣長稍需漸次者。統候新督臣到日再議。該臣會同巡撫貴州兼督理湖北川東等處地方軍務都察院右副都御史郭子章。巡撫湖廣等處地方兼提督軍務都察院右僉都御史支可大。巡撫偏沅等處地方提督軍務兼理糧餉都察院右僉都御史江鐸。巡按四川監察御史崔景榮。巡按貴州監察御史宋興祖。巡按湖廣監察御史王立賢。議照播地改土設流。分置郡縣。於以昭聖朝一統之輿圖。而新海內萬年之耳目。甚盛舉也。查該州地鄰三省。然楚止偏橋。路通一線。蜀與黔。蓋無所不接壤。夫蜀無藉於播。黔瘠壤也。若乘此時。而割播地以附黔。則於蜀無損於黔有裨。且臣等別疏。又請以楚之四衛。並割附之。從此黔省幅員。得與十二省比長。挈大。甚爲長便。但盡屬之黔。則地方千里。諸凡締造。勞費尙多。亦黔所不能堪。因議設爲二府。分隸黔蜀。庶建邦啓土。各自經營。成聚成都。指顧可就。皇上廓清之績。旣已盡被於三藩。而旣幟之仁。又復再造於黔土矣。除寬脇從。撤兵馬。招流移。厚賑恤。抑兼併。靖橫恣等項。凡明旨所叮囑。而兵部所條議者。俱已陸續舉行。及見之

後開款目外。謹集衆思。列爲十二事。進呈御覽。伏乞敕下部院覆議。上請。蚤賜施行。地方幸甚。臣等幸甚。緣係播地蕩平。經制宜定。敬陳善後切要事宜。伏乞聖明採擇。以永奠遐方事理。未敢擅便。爲此具本。開坐專差承差黃可美齎捧。謹題請旨。

計開

一復郡縣。播州南極洋河。西連犛道。東西廣一千二百二十里。南北表一千四十里。漢唐故爲郡縣。在川貴之間。亦一都會也。至唐乾符間。陷於南詔。楊端取而據之。今逆酋旣平。相應改土復流。以變夷俗。及照播州白田壩。沃壤數百里。卽播州遵義縣故地。當復府治。設縣附焉。桐梓當綦南之衝。走川貴道也。舊爲夜郎縣故地。當復一縣。望草南接婺思。北達眞涪。爲綏陽縣故地。當復一縣。仁懷濱播枕永。襟合帶瀘。爲懷陽縣故地。當復一縣。眞州卽古珍州。川原平衍。商販周遊。應復一州。以上俱隸川省統轄。黃平爲川貴要區。舊設撫苗通判一員。列銜重慶。駐鎮彼中。其與播勢相控馭。並爲重地。應設一府。湄潭龍泉。地里廣邈。各應建設一縣。甕水重安。合設一縣。餘慶白泥。合設一縣。并草塘容山二司。應割隸各縣。以上地方。去黔甚邇。相應改隸貴州統轄。總計增府二州一縣八。蓋亂流初殄。地闕人稀。姑建數城。以爲繫屬。以後地闕民聚。無妨增設。其二府治與附郭縣分。正佐首領。各應照例全設。外州縣正佐首領。俱應量減。以上擬定郡邑。并府治倉庫。準今酌古。應新其名。統祈欽定。至於府州縣及府之首領司獄倉庫各印記。併乞頒降。以便行使。其各府州縣。合用僧綱道紀陰陽醫學等官。候修建工完。另議請設。至於新設各官廩糧等

項暫於征播支贍軍餉銀內支給。俟播地田賦起科接支。議行停止。伏候聖裁。

一設屯衛。近日所稱有費而無益者。莫如衛所官軍。然亦有不可盡廢者。播州地方千里。山川險惡。夷漢雜居。又逼鄰二大土司。時有啓疆之志。必須設官軍。建屯衛。以明居重馭輕之勢。而消睥睨跋扈之心。若夫時操練。汰冗弱。令爲有用。而不爲無用。則在當事者之力行何如。固不可因噎而廢食也。應設一衛於白田壩。與府同城。指揮使一員。同知二員。僉事二員。鎮撫一員。經歷一員。知事一員。所屬前後中左右五所。每所正千戶一員。副千戶一員。百戶四員。所軍各一千。共五千。衛所官於從征有功者。酌量陞授。不足者於鄰近願入者。調取移實之。其邊隅逼鄰土司地方。各設屯田。每軍照祖制二十四畝。再加六畝。爲冬衣布花之費。共三十畝。卽自種自食。不必納糧於官。又復領出。紛紛滋弊。各開屯處。除養屯兵之外。餘田仍照民地起科。上納本折於各州縣。爲衛官俸廩。及不時軍興之用。每年冬十月。十一月。春正二月。農隙各屯官時加操練。又以十月十五日。二月十五日。齊赴兵備道大操三日。驗其武藝。較其強弱。而明賞罰焉。老弱者汰之。一屯老弱多者。並革其官。軍人之田。卽另募壯丁補伍。庶軍得實用。異時卽募兵散盡。此五千軍。與主兵三千。自有八千可用之兵矣。該衛名伏乞欽定。其衛印與經歷司印。亦乞先行頒降行使。各所五印。俟官軍定日。另行題請。至於貴州衛所已多。且黃平原有一所。不必增設。以滋冗濫。伏候聖裁。

一設兵備。播地三面環夷。干戈甫戢。當此經綸草昧之始。設立有司。可以招撫流亡。或未能長駕遠馭。而圖久安。布置將領。可以備禦倉卒。或易於生事徼功。而開邊釁。欲以內修戎備。外攝夷心。整肅羣僚。警服



衆志爲地方長久之計。則兵道不可不設矣。合無添設分巡兼兵備官一員。註銜四川按察司。請給敕書關防。於播州白田壩新建府城駐劄。專一整飭新復郡縣。并重慶衛忠黔二所。永甯酉陽石砭平邑等七司。兵務兼理。有司錢糧獄訟。其重慶府巴縣。綦江。南川。涪州。武隆。彭水。切鄰地方。悉聽管轄。以便行事。黃平新設一府四縣。雖割屬貴州。但人心初附。田土毗連。與貴州水西宣慰司。並聽兼制。至於該道俸薪等項。查照敍馬瀘兵備道事規。暫於重慶府屬州縣編派。俟播地田賦定後。改編於新設州縣。凡該地方一切招集兵民。修築城堡。布置邊防。儲積糧餉。疏通驛遞。禁伏豪強。諸事聽其隨時督理。俟二三年間。田均食足。兵治民安。政教修舉。遠近懷柔。卽破格大用。以酬其勞。庶重地無虞。安攘有賴。伏候聖裁。

一設將領。照得播淪於夷。閱八百餘年。風俗獷悍。法令扞格。所從來矣。今地方雖經蕩平。而浦孽潛藏。漢夷錯雜。招苗樹黨。越界侵田。時所必有。未可便謂晏然無事之秋也。儻非得一大將。提重兵鎮壓之。欲其俛首帖心。惟吾有司之約束。其將能乎。今議播州留兵一萬。黃平留兵三千。粗足防守。然必得一大將鎮之。始可無事。查得先年克平九絲。議留總兵一員。鎮守其地。今建武視播稍緩。卽一參遊足領之。合無將軍門標下新添設練兵遊擊一員。改駐建武防守。原設總兵。移鎮播地。應留各兵挑揀家丁三千。買馬三百。內總兵標下家丁二千七百。馬二百七十。以坐營千把總領之。兵道員下家丁三百。馬三十。以一中軍領之。有事俱聽總兵提調。名爲正兵。此外兵七千。酌量分布於白田壩。真州。桐梓等縣。播川等驛。防守。內以一遊擊領三千。以二守備各領二千。各用千把總分領之。有事征戰。無事卽爲築城。鑿池。建郡縣。修郵

驛之用糧銀照依舊例支發。徐俟建置竣工之後，除家丁三千馬三百外，餘軍以次議撤。有願附籍當軍及爲民當差者聽從其便。千把總俱於附近衛所官內選用。其黃平留兵三千，仍設一參將領之。總聽防播總兵官節制。斯將兵之錯置得人，而邊境之姦萌自息矣。伏候聖裁。

一急選調郡縣。旣復，應設正佐官員，分理庶務。緣地方初定，需人爲急。若非掄擇自近，亦何濟於目前。臣等再四諮詢，如龍安府同知劉安仁，爽朗特達之才，果毅真誠之品，器宜盤錯，力裕劬勤。堪任新設播州知府。重慶府同知王陞，烏蒙府通判劉之瀾，雅抱練達之才，均有循良之政，俱堪新府佐貳。劍州知州陳應楨，才稱老練，事有調停。南溪縣知縣寇克順，彭山縣知縣何珩，並有才華。夙聞牧愛，原任資陽縣知縣詹淑初，以木務論調，繼留征播管餉，實心幹濟，頗效勤勞。宜賓縣丞曹一科，才思開爽，衆號曰能。以上各官俱堪各州縣正官。但草昧經營，人不樂就，應從優陟，用示激勸。且劉安仁十年州郡，久著廉能。王陞劉之瀾，轉餉有功。陳應楨資俸已久，應以劉安仁卽爲播州新府知府。王陞加運同銜管同知事。劉之瀾加同知銜管通判事。陳應楨加同知銜管眞州知州事。知縣寇克順改附郭，何珩改桐梓，詹淑初改望草，縣丞曹一科陞仁懷。各知縣臣又查得附近地方佐領等官，頗有幹才，堪以集事者。如經歷楊體寬等數員，俱應爲新地佐領之用。重慶府經歷楊體寬，應改新府經歷。本府知事何遲，應陞新附郭縣縣丞。長壽縣縣丞劉學可，應改桐梓新縣縣丞。定遠縣主簿李愛宗，應改仁懷新縣。璧山縣典史蕭時寬，應陞望草新縣。各主簿。忠州吏目吳從周，應改眞州吏目。原任播州長官司吏目今陞資縣典史徐里，應改新附郭縣。

松坎驛丞張二南、應陞新桐梓縣、涪潭驛丞朱化龍、應陞新望草縣、合陽水驛丞徐懋功、應陞新仁懷縣、各典史、臣已經行令各官、一面權宜任事、凡相度地形、建立衙門、修築城池、清理疆界、丈量田土、召民受廩、按籍編戶、一切撫摩禁戢事宜、但有利於生民、裨於新鎮者、俱聽公同在事文武、悉心料理、務臻實效、去後、仍請著爲令、如三年之後、政蹟有成、別無他過、卽照格超陞、以酬其勞、黃平新府、并屬縣正佐、除貴州撫按題有應補人員外、未足者、及播州新府推官、新衛經歷、知事、附郭新縣主簿、等官、應卽銓補、其兵備員缺、臣查得兵巡下川東道僉事徐仲佳、大器如萬斛之舟、朗識若九秋之鑑、飭邊防則恩威並懋、理播事則勞怨不辭、況前委南川一路糧運、時當戎馬倥傯之際、本官處夫處餉、轉運極其調停、本支折支、會計更多儲積、不動聲色、大事克濟、卓然爲四路首稱、允爲遺大投艱之選、及查歷來新定夷方、兵備官員、皆於地方用事人員內、查其賢能卓異者、不次陞補、今徐仲佳資俸雖淺、勞績獨懋、應將本官加陞四川按察司副使職銜、管理分巡、及整飭播州等處兵備、庶便彈壓、至於總兵、付託尤重、臣等查得鎮守貴州總兵官李應祥、兼才允武、允文、臨事有謀、有勇、勞謙不伐、廉節獨高、所當改爲鎮守四川總兵、駐劄播州、以綏夷方、又查得軍門標下守備江萬化、橫草雄心、穿楊絕技、趕趕千人可廢、桓桓一旅爭先、堪陞遊擊職銜、赴播領兵、建越提調劉勝、久著戰功、能嚴軍令、宜授領兵守備、尙少一員、容臣徑行查委、通乞敕下吏兵二部、再加酌議、將各官查照擬定員缺、就近推補、黃平參將、亦聽貴州就近議補、行令速赴任事、各官敕書符驗、併請填給、其以上文武各官遺下員缺、通應另行推補、各府、州、縣、衛、所、儒學、與首

領司獄倉庫等衙門。應用吏役。聽布政司註撥。伏候聖裁。

一丈田糧。環播幅幘千里。田地無慮數千萬畝。及考其舊時額糧。止歲以五千八百石輸貴州。蓋夷方賦稅。原自輕減。至應龍出而後巧取民財。定爲新法。名曰等寶。每田一畝。徵銀數錢。初猶斂其財以招苗。後並奪其地以養苗。而賦法蕩然盡矣。今旣改流。自當純用漢法。以定田賦。合責成新道府。親率州縣官。插定疆界。沿邱履畝。逐一丈量。分爲等則。造冊呈報。以定賦法。第額糧輕重。蜀無定規。查克平九絲丈量田地。分別上中下三等。每畝上田四升。中田三升。下田二升。今宜倣之。以清播田。第播地山水間雜。不止三等。尙有上上下下者。宜逐項分析。最上者一畝可當上田幾畝。最下者幾畝可當下田一畝。則待臨時斟定。難以預計。丈完總計田地若干。糧若干。徵本色若干。折色若干。候二年之外起料。除足一年夏秋二稅。銀力二差。一切雜費外。餘解布政司充邊餉支用。其承丈各官。果能執法不撓。精覈不爽。事完從重優陟。若乘機作弊。委用不效者。兵備道不時參呈。以憑究處。庶賦稅一清。公私胥賴。伏候聖裁。

一限田制。播土舊民。自逆酋芟夷之後。大兵征討之餘。僅存者十之一二耳。遺棄田地。多無主人。惟冊籍不存。疆界莫考。復業之民。往往冒認影占。原少而報多。原瘠而報肥。甚至一人占田一二千畝。尙有異省流徒。假播籍而希冒充者。夫王者之師。弔民伐罪。罪人旣得。子遺之民。自當存恤。顧無知小民。何厭之有。若任其冒占。而不爲限制。不惟告擾紛紛。徒滋多事。恐將來田地闕而人民少。不能成府縣之規。且自應龍在事以來。予奪任意。生殺自由。強凌弱。衆暴寡。凡業厚而田豐者。皆席應龍之寵。而魚肉細民所得也。

此輩初用事，後得罪，有逃避他方，至今方出者，有身爲奏民，起釁釀禍者，有其身已殲，其家已滅，而一二遠族，尙思承產者，誰爲厲階，致此紛擾。卒今天朝，以二十萬之師，費百萬之餉，殺人數萬，方得剷定此土宇，而猶令此輩竊據，以自封，卽應龍地下，亦不服矣。今應將播之舊民，號楊保子者，查果真的，無論原業肥瘠，俱人給田三十畝，上中下撓配均給。若一處皆上田，皆下田者，臨時酌給。大率純下田，不得多過一百畝，純上田，不得少過二十畝。其原非播民，必不能爲楊保語，亦自易辨。無問其曾否寄住，皆不得妄認。斯詐冒不行，爭競可息。至遺下無主民田，應另行招人承種，納糧當差。應龍官莊，並楊兆龍、田一鵬、何漢良等，諸擒斬過有名頭人莊田，盡數沒官，聽三省之民，願占籍播州者承種。其領地之人，查照時值，量行上納，以充目下建立城池衙門驛傳諸費，亦定爲限制。平人不得過五十畝，指揮千百戶不得過百畝，俱於丈量時定糧定價，令不得挪移。州縣官收過絕產價值，給付印契，登入循環，聽兵備道稽查轉報。撫按查考，經該官吏，如有乾沒，從重治罪。庶定經制之中，又得夫裕財用之意，伏候聖裁。

一設學校，播故有學。宋元世俊茂朋興，如冉從周、猶道明、白鎮之流，俱登進士，蜚聲上國。自逆龍禁錮文字，寇讐儒生，以蒸報爲禮義，視菹醢爲名教，每自稱爲秦始皇，蓋坑儒焚書，以愚黔首，亦略相似。身爲鮑魚，有由然矣。今干戈旣戢，文教宜先，第新遭大兵，不惟士人廢沮，抑亦物力未贏。若紛紛建設，徒以恣虛費之資，開奔冒之門，於宏文雅化無當也。今照府治綱紀，諸邑實爲風化之首，白田、黃平，舊有學宮，補葺亦易，特師儒久虛耳。當於二府原學，各補教授一員，益之訓導二員，以聯生儒。至博士弟子員，無論附郭

外縣。但入學使之選者。蜀新四縣隸白田學。黔新四縣隸黃平學。待各縣人文漸盛。物力稍紓。嗣各立學。未晚。眞州既改爲流。其地方殷富。人物適華。亦須建一學宮。設一學正。以示維新之化。學校既立。振鐸有地。明以人倫。風以禮讓。彼其才能崛起者。足以備國家徵辟之選。而移風易俗無難。不然而身被章縫。手執簡編。亦足以潛消邪心。興起善念。月蒨歲漸。不自知其化於禮讓之內矣。用夏變夷。莫要於此。伏候聖裁。

一復驛站。播州各驛。自逆會閉關。負固。驛官不敢赴任。過客不敢經行。站戶逃徙。館舍邱墟。十數年矣。茲者地方底定。道路大通。驛站之設。勢不容已。查得播州舊轄松坎、桐梓、播川、永安、湘川、烏江、昌田、沙溪、仁水、涓潭、鼇溪、岑黃、白泥、一十三驛。俱當川貴孔道。所有各該驛館。應合分令領兵千百總同見在驛丞。率領防兵。就彼採辦木石。燒造灰瓦。趁時興工。合用匠役。亦於兵夫內查有慣造者。徑撥。不足者於附近州縣取用。工食銀米。計算於該邊支贖軍餉內動支。仍責成新設府佐一員。往來稽督。不許虛冒錢糧。曠廢時日。事完冊報。又查各驛夫馬支應。及官吏俸薪舊額。上司供辦。今既改土設流。似應與腹裏驛站一體僉派。但流民授田方始。難便買馬行差。目前一切站銀。暫應官爲出辦。俟里甲稍定。卽行編派。至於夫馬額數。應照衝僻爲準。湘川驛附郭。爲四路最衝。應設馬四十四匹。夫八十名。松坎、桐梓、播川、永安、四驛。地衝路險。應各設馬三十四匹。夫五十名。烏江、仁水、涓潭、岑黃、鼇溪、白泥各驛。俱次衝。應設馬各二十四匹。夫各三十名。昌田、沙溪、止通水西、次僻。應設馬各十四匹。夫各二十名。各驛官見在者。行令赴驛任事。缺官者。照缺

銓補其各驛印記。舊爲應龍收去。近已迷失。應另頒給。各驛吏因屬土司。舊未撥發。今應行川貴兩省布政司照缺查撥。伏候聖裁。

一建城垣。夫郡縣旣設。必有城垣。所以明保障。防不虞也。播州之一府一州四縣。與黃平之一府四縣。並宜城城並宜石。石少者以甌代。其兵備道。總兵府。并府衛州縣衙門公署倉廩庫獄城隍廟演武場。與二府一州儒學文廟殿廡齋舍等項。俱當以次修舉。而各官一抵地方。棲身爲急。衙舍之建。尤宜首圖。一切應用木石甌瓦灰釘各若干。工匠兵夫各若干。應支帑廩錢穀各若干。分委督工員役各若干。城垣高廣丈尺若干。城樓城門敵臺堞口若干。衙門倉庫廟學房舍殿宇若干。俱聽該兵備道督同各府州縣正官。選委勤明佐貳首領雜職等官。帶匠估勘。務要周悉。詳撫按衙門。於堪動銀內行支。應買備者買備。應召集者召集。剋期興工。多方稽督。大約城垣以二十九年二月內起工。限年終落成。餘各以次修舉。就中員役有怠惰者。錢糧有冒破者。工力有草率者。俱聽該道參詳。拏究事竣之日。造冊報撫按衙門奏繳。庶險要可資。防禦有賴。伏候聖裁。

一順夷情。播州皆夷也。大兵之後。爲賊用力者。刈夷蘊崇。已無遺種。今見在者。曰各司土官。曰七姓。奏民。曰投降夷目。皆宜安插得所。顧就中情事不同。亦宜分別。如八司曰播州。眞州。白泥。餘慶。草塘。黃平。重安。容山。內安。撫二。長官六。又一司。甕水。原無印信。亦稱長官。又有宣慰同知羅氏。此皆世有官號。與播並建者。播州長官王積仁。以附播被擒獻俘。此當與楊氏俱滅。不待言矣。眞州附播多年。綦江之破。助兵三百。

著在耳目。同知羅氏與江外五司首起釁端。挑怨速禍。且具奏改流。致激應龍之怒。殃及墳墓。流禍鄰封。致有今日之事。海內震動。流血千里。則諸司者罪之魁也。故說者謂眞州宜正其附播之罪。而江外諸司宜以起釁絕之。不爲無因。第王道如天。罰宜從輕。賞宜從重。眞州當進兵之初。率先歸附。正副長官各以千人從軍。江外諸司各招兵聚義。充黔楚鄉導。此輩卽不足爲重。輕顧一念誠款。自應量酬。合將眞州正長官卽爲該州土同知。副長官卽爲該州土判官。江外諸司安撫與正長官卽爲該縣土縣丞。副長官卽爲土主簿。同知羅氏爲新府土知事。此則略其大罪。錄其微功。且令魁結氈毳之流。居然儕於衣冠文物之列。諸夷亦何幸焉。此外尙有投降夷目。原非長官。本無冠帶。但賞格曾坐名。開諭輒爾先事歸誠。亦宜少示眷酬。以明恩信。如上赤水頭目袁年。父遭酷禍。投降最早。宜授以所鎮撫職銜。下赤水頭目袁鏊。仁懷里頭目王繼先。安羅二村頭目羅國明。羅國顯。安鑾。以上五名。在王繼先臨時觀望。在袁鏊等兵進方投。卽待以不死。亦爲正法。但其返邪歸正。自宜量酬。應各授以冠帶。總旗諸人田產。止將本身者照冊撥給。應納稅糧。通附州縣官處上納。其餘里人。俱令附籍。納糧當差。不許仍以家人爲名。恣行霸占。違者治其前罪。至於七姓奏民。始助楊氏之惡。繼傾楊氏之族。尤爲禍首。天下恨之。但逆賊造反。罪大惡極。自難以餘波及人。除在軍前作惡。著有贖蹟。見行監問者。照律正罪外。餘俱無論。槩與維新。如仍蹈故習。豪橫害民。該道徑行拏問發落。以後各地方人民。亦不得指稱以前事體。將處分過播目播民告害。致起事端。官司亦不得受理。違者並罪。伏候聖裁。



一正疆域。播地東北接連三省。縣衛各有疆界。無容濶濶。西南左接水西。右逼永甯。雖犬牙相攙。未能齊一。然畫野分疆。亦自有相沿界至。惟是夷性犬羊。互爲雄長。強則侵凌。弱則滅削。甚至有一地而甲乙互臨。一人而齊楚兼事。如儒溪沙溪水。燧天旺。皆播州五十四里之數。見有黃冊可考。緝麻山。李博堦。仁懷。石寶。甕平等處。亦皆播州世業。祇緣先年楊氏中衰時。曾爲永甯水西侵占。後應龍當事。治兵相攻。恢復故業。各邊目又已任其纒焉。兩下支持。此在土司可也。今既改土設流。自宜各復其故。尙可混行爭占乎。乃水西止求清查。永甯輒行瀆擾。且勦以瓜分爲言。不知賞格所謂瓜分者。謂不動朝廷兵馬錢糧。土司能建義自取之也。今兵糧之費。騷及海內。土司一旅之師。不啻背上之毛。腹下之蟲。獨且多支本折。優議敍錄。此亦何負於彼。乃復垂涎土地。則此一番大勞大費。止爲土司營家事乎。土官明於大義。必能引分自裁。第其邊隅目把。往往罔上行私。冀廣己業。及今若不查明。將來未免多事。應行播州該道。會同鄰近道分。清查一切相鄰地方。如原係播州者。歸之播州。原係永甯水西者。歸之奢安二氏。刻石立碑。永爲遵守。其鄰邊目把。如不安分義。妄肆侵爭。重行究治。干礙土官。一並參處。蓋朝廷伐暴救民。原不爲利其土地。但無涯之欲。漸不可長。且楊氏之禍。止以下驕恣而上姑息。遂釀成滔天之患。今復苟且遷就。誨爭養亂。非地方之利。亦非土司之福也。伏候聖裁。

#### 四乞歸疏

奏爲孤臣病已危篤。頃刻難留。懇乞天恩。亟賜放歸。以延殘喘事。臣於五月間聞憂。六月間感病。至七月

間已三疏懇恩乞歸。尋而病日增劇。虞有不測。卽自重慶馳歸成都。一就家口調養。一便攜家奔喪也。乃不道意路奔馳。前病愈甚。於八月初旬至省。日覺頭岑岑然不可支持。至數日偶因奠臣父之主。一哭仆地。遂不能起。家人扶掖入室。移時乃蘇。從此日惟偃臥。更不復知人事。又數日轉而爲瘡。初尙一日一發。繼乃間日一發。每發則寒如握冰。熱如抱火。痛楚躁擾。不可名狀。既止則又懵騰昏憤。偃臥如尸。不見不聞。但有人形而已。如此者迄今且三月矣。體瘦如柴。氣微如絲。食不能一器。坐不能一瞬。一人不能見一字。不能書。此與冢中枯骨無異。尙可居於人世乎。日於病憤中時接邸報。令人誦之。知皇上允臣回籍守制。則深以爲幸。已而又知廷推前後四臣未奉俞旨。則深以爲憂。夫臣例應候代者也。而川省又兵戈甫息者也。以時則如彼。以病則如此。乃久無替人。卽地方不能保。且夕無事。何況臣身。卽臣身不能保。且夕無事。何況歸而葬臣之父。事臣之母。臣有腸已斷。無淚可揮。但神傷心碎。仰天乞哀而已。揆情度勢。臣似必不能候代。然又不敢輒自逃歸。以干憲典。而貽皇上西顧之憂。只得再以上懇。伏乞皇上軫臣至情。憐臣危病。亟將原推四臣。點用一人。前來交代。萬一臣得生還故里。豈徒臣一身一家之幸。亦西南百萬軍民之幸也。臣無任涕泣哀鳴。籲天懇懇之至。緣係孤臣病已危篤。頃刻難留。懇乞天恩。亟賜放歸。以延殘喘。事理未敢擅便。爲此具本。專差承差李朝恩齎捧。謹具奏聞。伏候敕旨。奉聖旨吏部知道。

五乞歸疏

奏爲病已垂危。勢難候代。懇乞聖恩。亟賜放歸。以保殘骸事。臣自播事告竣。聞訃丁憂。尋而感病。已屢次

上請隨奉聖旨允臣回籍守制。但無人交代。方在守候。會前病益劇。偃臥三月。不知人事。於時不能草疏陳告。已經按臣代題。已又自行具疏上陳去後。近見邸報。按臣疏到。該部具覆。未奉明旨。臣更不勝憂恐。不勝窘急。謹再以真情陳訴。惟陛下哀憐垂聽。臣丁憂官也。禮。父母之喪。無不解官持服者。況臣已奉旨回籍守制矣。遷延不去。半年於今。生者不歸。則死者不葬。亡者以卽土爲安。經年停匱。臣亦何心。又臣母自臣父未亡時。業以感病。比遭茲變。病益不支。臣旣未得歸。則選擇良醫。資送於家。託之療治。乃今具稟到臣云。臣母之病。非藥石所能愈也。蓋起於憂思。臣不歸。則病不起。嗟乎。人誰無父。人誰無母。臣於臣父。已抱終天之痛矣。陛下又令臣忍心於臣母乎。脫有不測。臣何顏見人。何心在世。且疾病人所時有也。而臣之病獨異。蓋浹歲以來。所經大勞大苦。大哀大痛。大鬱大憂。皆人所未嘗一時並見。一身並值者。心卽鐵石。亦當銷鑠。身卽草木。亦當枯朽。蓋臣膏肓之病。朝露之虞。臣自知之。他人或未之悉耳。夫臣之奉旨回籍。已數月矣。下手交代。又已推上四人矣。此四人者。負謀王斷國之才。抱緯武經文之略。功在邊陲。名聞夷夏。但得其一。卽足以奠安西南。露覆夷漢。陛下奈何遲之而不允也。凡臣所言。皆實事實情。非有假飾。非有欺誑。伏乞陛下亟賜矜憫。將原推四人者。亟用其一。俾早來交代。如陛下果以此官可缺。此用可遲。亦乞察臣至情。憐臣危病。容臣將旗牌印信。暫發布政司收貯。與疾奔喪。臣查先年撫臣。亦有聞喪不候代而歸者。雖經參論。罪止罷官。緣臣向來受陛下特達之知。肩陛下重大之任。君親忠孝。兩下照管。故未敢決去。伏惟陛下憐察。矜允。臣但得早晚歸家。哭臣父數聲。見臣母一面。臣死亦瞑目。臣無任籲天哀

懇之至。緣係病已垂危、勢難候代、懇乞聖恩、亟賜放歸、以保殘骸事理。未敢擅便、爲此具本、專差承差劉佐齋捧、謹具奏聞、伏候敕旨。

敕助兵餉疏

題爲逆賊蕩平、援師奏凱、懇乞天恩、查敕各省直勤王督撫鎮道、並敕協助臣工、以昭勸典事。案照先准兵部咨、該兵科部給事中張輔之題、爲播酋外逼貴竹內巖等事。本部覆議移文雲南、湖廣、福建、廣西撫按、嚴督各布政司、將庫貯銀兩、如數解赴貴州軍前交割等因。奉聖旨、這銀兩著便行與各撫按嚴催、解赴貴州應用、不許推諉稽延、致誤軍機。欽此。又該巡撫貴州右副都御史郭子章題、爲楚滇助餉、勢難如期等事。戶部覆奉聖旨、川貴待餉甚急、你部裏便馬上差人、星夜嚴催、鳳陽、廣西、如數解彼濟用、不許執留、遷延誤事取罪。還立限與他。欽此。又該臣題、爲播賊狂逞、未已、貴竹物力難支等事。戶部覆奉聖旨、這兵餉急用、俱依擬行。各省撫按司道、上緊催解、以後不敷、著總督遵照前旨、於本省鄰省便宜處置。各官務要同心共濟、以期滅賊。如有抗違支吾、指名參來、重處不饒。欽此。又該巡按貴州監察御史宋興祖題、爲播酋殺虜官軍、張威挾撫等事。本部覆奉聖旨、這協助兵餉、著火速嚴催接濟、有再藉口支吾的、該總督撫按指名參來重處。欽此。又該臣題、爲循例請設兵將等事。兵部覆奉聖旨、該鎮督撫新設、事權宜重。這編選標兵、推補將官、調用各省兵馬、議處糧餉等項、都依擬行。軍務重大、必須事事從實、不許徇情顧面、因循虛假。各鎮亦宜同心助力、毋得坐視。陳用賓、沐叙、陳璘等、都馬上行文與他知道。山東防倭等兵、

著精揀好的差忠勇將官領去。還立限與他。欽此。又該兵部題爲軍務事。節奉聖旨。是川貴用兵。雲南兵將。許總督徑自催調。領兵參遊而下。併聽節制。欽此。又該科臣張輔之題。爲叛賊臨城殺將等事。節奉聖旨。徵兵救蜀。已有明旨。但恐路遠。不能卽至。這本欲兵部定限責發。說得是。還馬上差人守催。務將見在熟練精兵選去。若託故遲延。以疲驚塞責。事發各鎮同罪。兵部知道。欽此。又該撫臣郭子章題。爲播患孔殷。貴陽伊邇。敬陳阽危之勢等事。兵部覆奉聖旨。貴州湖廣各兵。俱准添補。湖廣堪動錢糧。准先動後題。興隆參將准添設。陳用賓著竭忠任事。共圖犄角。以靖地方。不許顧忌推諉。欽此。又該兵部題。爲軍務事。奉聖旨。是廣西土司官兵准調發。莊志傳務稟川貴督撫。及總兵官節制。分布進止。不許專擅行事。致失機宜。欽此。又該貴州撫臣郭子章題。爲播寇突出。充斥興隆黃平之間等事。覆奉聖旨。是貴州孤懸。著總督將供餉銀兩。先儘支發。仍遵前旨。於鄰省堪動錢糧內。先動後題。逆酋抗亂。普天同仇。各省直官。宜請助兵餉。豈得託言違旨。支吾推諉。著通行與他。每知道。欽此。又該臣題。爲播賊分道突犯全黔等事。節奉聖旨。貴州孤危。著總督上緊。與各鎮撫應援兵馬若少。准再酌量調募。另給糧餉。與他。廣西雲南湖廣各兵。俱要齊赴信地戰守。不許逗遛觀望。欽此。該戶部題。爲暫留起解錢糧。抵給貴州萬分緊急軍需事。奉聖旨。這銀兩著雲南解貴州充餉。仍著搜括設處。務足題定數目解去。不得再行奏擾。欽此。又該山西道御史李時華題。爲師期伊邇。謀費萬全。敬獻芻蕘等事。本部覆奉聖旨。三省進兵費多。師期又難預限。況貴州尤稱貧瘠。萬兵齊集。其操站俱當存恤。這南京河南銀兩。著作速依限依數解去。以前題取各處的。

務要湊解。俱不許短少遲誤。責有所歸。漕糧聽督撫酌量調度。還通行與各省直知道。欽此。隨該本部咨行各邊各省督撫諸臣。并移咨到臣。俱經欽遵。分投催調。間續准總督陝西三邊少保兼太子太傅兵部尚書兼左副都御史李汝咨稱。挑選精兵一千員名赴援。又准巡撫陝西右都御史兼兵部右侍郎賈待問咨。委參將周國柱統領兵馬一千六百員名。并解盔甲一百副。火礮五位。三眼槍三十杆。鐵子一千箇。鉛子一千五百箇。火藥一百五十斤。火線一千條。又准總督兩廣兵部右侍郎兼右僉都御史戴燿咨。委都司趙應科領兵二千九百八十五員名。并帶烏銃一百三十門。鉛彈二十斤。藤牌一百面。火箭二萬枝。往蜀。又行肇慶府。借支銀四千一百三十四兩。與總兵陳璘募兵一千九百三十八名往楚。又差鎮撫張蘭等。解銀八萬兩助黔。又准巡撫甯夏兵部右侍郎兼右僉都御史楊時甯咨。送總兵馬孔英統領兵馬五百五十三員名。又准巡撫河南右副都御史曾如春咨。委遊擊任承爵等領兵二千員名。又准巡撫山西右副都御史魏允貞咨。委參將余德榮領兵五十名。并帶湧珠礮四十位。三眼槍六百杆。鉛子九千顆。鐵子八百四十顆。又准巡撫山東右副都御史劉易從咨。委守備趙賢輔領兵一千一百六十二員名。又准巡撫浙江右副都御史劉元霖咨。委都司封建領兵三千四百九十八員名。又准巡撫保定右僉都御史汪應蛟咨。委坐營王芬統領力士南兵五百三十七員名。并解大弓四百張。火箭四百把。大火箭九千二百七十枝。小火箭二千三百四十二枝。鐵礮四百八十斤。又准巡撫甘肅右僉都御史徐三畏咨。委遊擊余世威等統領兵馬二千員名。并帶湧珠礮二十位。三眼槍六百杆。又准巡撫延綏右僉都御

史王見賓咨、委參將李經統領兵馬二千五十七員名、并帶滅虜礮一十二位、火礮四十二位、三眼槍五百六十五杆、又准巡撫雲南右副都御史陳用賓咨、稱備移總兵沐叡、發中軍張樹等領兵七千、馬千匹、象數隻、往黔進征、該鎮親統二千員名、屯劄曲靖、本院駐劄益寧、又准處補川餉銀七萬七千七百七十五兩九錢助黔、又准巡撫廣西右副都御史楊芳咨、稱備移總兵李如樟、選委都司莊志傳、守備白明遠等、領兵二萬往黔進征、該鎮移駐泗城州應援、又解餉銀三十萬兩赴黔協濟、又准巡撫順天右都御史兼兵部左侍郎李頤咨、差官楊崙、解滅虜虎蹲礮六十位、大鉛子六百箇、小鉛子一萬八千箇、火繩一百八十條、藥線三千條、火藥六百斤、馱礮架三十六副、木郎頭六十把、木送子六十根、鐵藥升六十箇、鐵藥匙六十箇、鐵錐六十把、鐵剪六十把、藥線筒六十箇、皮搭襖十二箇、油箕二十四箇、鐵鏝二十四把、三眼槍六百杆、鉛子一十八萬箇、藥管一萬八千箇、藥線一十八萬條、火藥一千八百斤、盛鉛子皮袋六百條、盛藥皮包六百箇、擲杖六百根、藥線筒六百箇、鐵錐六百把、鐵剪六百把、又准巡撫福建右僉都御史金學曾咨、解軍餉銀十萬兩赴黔、又准巡撫鳳陽右僉都御史李三才咨、發淮陽兵三千、令原任副總兵王鳴鶴、領赴黔、進征、又解軍餉銀十萬兩赴川、各協濟等因、陸續移咨到臣、隨將兵馬器械發去軍前、分布協濟、銀兩解赴營中、聽支去後、續據各營揭報、會寇蕩平、地方底定、隨該臣遵奉明旨、檄下各該營、路議將前項兵馬、次第撤放、責令原來將官統領、分別水陸程途遠近、給以行糧、軍火器具、應收貯者收貯、應發還者發還、各邊鎮訖、又准貴州撫臣郭子章、偏沅撫臣江鐸、各會稿、內開南京戶部解到銀十萬

兩。河南撫臣曾如春解到餉銀九萬兩。江西撫臣夏良心解到餉銀三千三百餘兩。應天撫臣陳惟芝解到餉銀一千九百餘兩。鄖陽撫臣鄭國仕助餉萬金。及稱雲南致仕總兵官黔國公沐昌祚助銀二千兩。貴州原任戶科給事中。今爲民陳尙象助米一百石。土官禮思明助硝一萬斤。武舉張鶴。獅庶母章氏。土官安大順。各助米一百石。監生宋仕通。趙希伯。袁任。生員沈繼祖。聞於皋。桑來鶴。程雲路。壽官陳嘉猷。各助銀一百兩等因。又該臣查得先因逆賊卒起。蜀無硝磺。差人別省收買。急不能至。聞陝省多產此物。向臣過漢中地方。見南鄭縣知縣霍鎮方。談吐精明。志在滅賊。該縣與蜀相鄰。因發銀令之買辦。本官晝夜拮据。收買數萬。陸續解運。自始事以至賊平。用之不盡。各有申文在卷。通查到臣。該臣看得逆賊之敢於稱亂。非其好生惡死之心。果與人殊。而敗國亡家之禍。甘以其身嘗試也。彼所自恃者。山川之險要。兵甲之精強。物力之豐盛。而所習見者。川蜀之武備不修。貴竹之帑藏如洗。以爲吾惟不爲耳。一旦裹糧下甲。從中而起。卽縣官其如我何。蓋漢孰與我大。從古夜郎王之見。固若斯矣。不知忠義之性。人所固有。亂賊之黨。法所必誅。當方內泰甯。天王大一統之日。而一夫橫行乎其間。其誰不投袂而起。仗義勤王。思立功名於萬里之外。又況天怒赫於雷霆。天語揭乎日月。激信臣精卒之心。而作義士仁人之氣。是故各省直邊鎮諸文武大吏。各以兵會。多或至於數千。各以糧從。多或至於數萬。卽下至巖藪之士。閭巷之人。亦皆捐升斗。出涓滴。以爲萬一之助。夫然後知國家全盛之力。而治教休明之驗也。夫大加小。順討逆。衆覆寡。得全全昌。理有固然。無足異者。其三月而舉之。削株擷根。靡有遺種。非幸也。宜也。夫國家儲糧治兵。以備



不然卽文武大吏奉王命、討不庭、轉餉發兵、自其本分、亦非有所希冀於後也。惟是帝王之所以鼓舞一世者、令惟其行賞、惟其厚。諸臣旣以奉陛下之令、羣力畢舉、以克有成功。陛下當必有所以優厚之者。臣亦何得不一據實、爲明言之。除各省原委統兵有功將領等官、另本題敘、並解助兵餉銀兩、另冊奏繳外、照得總督陝西三邊少保兼太子太傅兵部尙書兼左副都御史李汶、身繫四海安危、才憲萬邦文武、傳檄則飲飛雲集、雄邊之貔虎生威、銜枚而輕騎馳、險國之鯨鯢落膽。巡撫順天右都御史兼兵部左侍郎李頤、哀然山斗具瞻、屹矣華夷偉望。諸器擅火攻之巧、焚險箐、燄比燎毛。六師張雷厲之聲、殲元兇、勢如破竹。巡撫陝西右都御史兼兵部右侍郎賈待問、胸蟠武庫甲兵、望重北門鎖鑰。遣虎頭之上將、威名風掃乎妖氛。部魚麗之雄師、器具星迴於組練。總督兩廣兵部右侍郎兼右僉都御史戴燿、表表鬚紳、清望峩峩、嶺海殊勳。麾部曲而雲捲蒼梧、聲沸千羣、鵝鶻飭儲胥而光騰紫電、魂飛孤壘、豺狼巡撫甯夏兵部右侍郎兼右僉都御史楊時甯、河洛千尋砥柱、賀蘭萬里長城。移將士於衝邊、懋著忠勤之大義。授機宜於密幄、借收戡定之膚功。巡撫河南右副都御史曾如春、雄才問世、干鏃碩望、中朝鼎石、指麾梟將、經九折之坂、而馮輶如期。發縱羽林、破絕巔之巢、而衝擊稱最。巡撫山西右副都御史魏允貞、大節匡持、國是宏才、經濟時艱、分幕府之材官、赳赳威揚於壁壘、撤轅門之軍實、纍纍氣壯於干城。巡撫山東右副都御史劉易從、駮猷傾注巖廊、鴻略澄清海岱、驅三齊之健卒、旌旗日耀雲屯。董兩浙之冠軍、籌策風生電掣。巡撫浙江右副都御史劉元霖、銓衡風凜清朝、節鉞波恬滄海、義旗西指、兼水陸而虎賁之士三千、宿

將南馳。挾風霆而鼠竄之。夷百萬。撫治鄖陽。右副都御史鄭國仕。斧鉞當秦楚韓魏之交。勳名係中外。華夷之望。憂先同室。切已飢已溺之思。賑急於鄰。效移粟移民之助。巡撫江西。右副都御史夏良心。聳節槩九紫峰寒。憺威棧三江浪靜。千金饗士。纓冠先王室之憂。萬里平夷。彝鼎勒鬼方之績。巡撫雲南。右副都御史陳用賓。慷慨助勤國難。威嚴汛掃邊塵。調勁卒於烏蠻。騎步七千。雄圖外發。精鏐於金齒。師徒十萬。飽行間。巡撫廣西。右副都御史楊芳。抱負經文緯武。謀謨安夏攘夷。督龍城象郡之兵。萬竈炊煙蔽野。捐桂嶺梧江之積。全黔芻粟屯雲。巡撫保定。右僉都御史汪應蛟。皎皎丹衷貫日。泠泠素節凌霜。鐵騎度滹沱。起六郡良家之子。銅魚飛越。巋靖三苗逆命之兇。巡撫鳳陽。右僉都御史李三才。望崇殿上夔龍。威自軍中韓范。命雄師聲援突集。驚將令之自天。助大餉騰飽無愆。慶王師之似雨。巡撫甘肅。右僉都御史徐三畏。巍巍青鎖芳標。煜煜玉關閔伐。簡鷹揚而鞠虎旅。無煩折斧缺斨。凌鳥道以淨狼煙。早見獻俘授馘。巡撫延綏。右僉都御史王見賓。揮霍才長靖虜。忠貞念切勤王。殺氣暗銅標。駭牝共貔貅。爭壯夷氛清紫塞。謳歌與笳鼓齊喧。巡撫福建。右僉都御史金學曾。經略才雄秉鉞。聲援義篤同舟。閩帑出金錢。竭航海梯山之力。黔藩歡士馬。奏褰旗斬將之功。巡撫應天。右僉都御史陳惟芝。鎮上游龍蟠虎據。勤遠略靜夏攘夷。軍實裕盤江。慮急於救焚拯溺。妖氛掃熨道。功始於挾纊投醪。原任雲南總兵黔國公沐昌祚。本自將相侯王之種。深明君臣夷夏之防。念河山之盟誓。如天恩酬一劍。視囊橐之積儲。若土土享千金。鎮守雲南總兵沐勳。鐵券金章之胄。登壇授鉞之才。誼急纓冠。親部日南之士馬。風生雷電。立銷徼外之煙塵。

鎮守廣西總兵李如樟。六韜世授鐵城。百戰身經銀夏。冒炎觸瘴。樹犄角於豺虎之衝。兵利卒精。埽氛禳於鯨鯢之窟。以上諸臣。均之誼重於急公。績收於勦播。並應優異。內鳳陽河南兩地。正當有事之際。而撫臣李三才。則發兵三千。解餉十萬。曾如春。則發兵二千。解餉九萬。多助兵糧。大裨黔土。均宜更加優異。雲南廣西二省。原奉聖旨。協力援擣。陳用賓。不但遣將發兵。深入播地。且與總兵沐叡。同提兵親駐境上。防賊衝逸。楊芳。先後發廣西兵二萬。解餉三十萬。幾於代黔受役。李如樟。久駐泗城。聲援貴州。直至事平。觸犯炎蒸。抱病歸省。蓋明旨所責成二省。原重二省。撫鎮所以供上命。急鄰封者。亦無所不用其力。撫臣陳用賓。楊芳。更宜大加優異。總兵沐叡。李如樟。亦宜並加優異。沐昌祚。以致仕總兵。捐金二千。資助黔省。宜加褒獎。以示勸酬者也。江西左布政使沈九疇。福建左布政使朱運昌。河南左布政使姚學閔。廣西左布政使沈脩。雲南左布政使梅淳。帶管臨安兵備道按察使鍾昌。帶管曲靖兵備道副使孟紹慶。安普道副使黃文炳。廣西賓州兵備副使陳勛。雲南督兵參將盧承爵。押兵潯州府同知何文偉。署守備事指揮沐粲。以上諸臣。深明大義。各抒忠猷。竭物力以濟遐方。收足食足兵之效。討軍實而襄大難。奏百戰百勝之功。俱應賞賚。陝西南鄭縣知縣霍鎮方。視國如家。急鄰猶已。非有相臨之分。但以義氣而勤供辦。不使乏興。非有剝膚之災。但以忠耿而助攻圍。卒能靜亂。相應賞賚。仍紀錄優處。以爲有司敬事勤王之勸者也。原任戶科給事中。今爲民陳尙象。鎖闥名高。君臣義重。江湖身遠。猶思擒賊以尊王。桑梓憂深。遂至毀家而紓難。相應起用。以竟宏施。禮思明。安大順。宋仕通。趙希伯。袁任。沈繼祖。聞於臬。桑來鶴。程雲路。陳嘉猷。

章氏深虞大難之端。不吝中人之產。雖投石增華岳。無補崇高。而捧土塞盟津。尤徵壯志。相應獎異。以風民庶者也。伏乞敕下兵部議覆施行。庶奉公者益堅忠義之懷。而梗化者潛消奸宄之念。所有補於安攘。非淺鮮矣。緣係逆賊蕩平。援師奏凱。懇乞天恩。查敍各省直勤王督撫鎮道。並敍協助臣工。以昭勸典事理。未敢擅便。爲此具本。專差承差陳治道齋捧謹題請旨。奉聖旨。兵部知道。

黔省善後事宜疏

題爲逆酋甫平。邊圉未輯。敬陳善後事宜。以備采擇事。准貴州撫臣郭子章會稿。內開准兵部咨。爲欽奉聖諭事。該本部覆議條列十事。內開一。計善後。原議逆酋平定。必當改土爲流。而各土司有能縛酋以獻者。或世守其爵。或瓜分其土。此昭昭在人耳目者也。今事已定矣。水西隴澄。於五月二十八日業已撤兵避嫌矣。除斬關輸忠。功自難泯。聽其從優敍錄。以爲土司效忠奮勇之勸。而一切大計。可不因原議而規畫之乎。謂宜亟行督撫衙門。備查播州一地。某處與某處連區。某地與某地接軫。作何分隸。某處應設某府某州縣。作何安置。某地應置何將作。何統轄。及一切善後合行事宜。悉心計處。所有子遺。作何安插。空闕處所。作何招徠。務令犷悍不毛之地。盡入範圍。撫馭之中。被我衣冠。服我聲教。釋其非心。防其逸志。奠安絕徼。以紓西顧。其有應行未盡事宜。任督撫諸臣。身在彼中。心經其事。必有長計遠慮。佐所不逮。一併議妥。作速具奏。定奪等因。題奉聖旨。元兇旣殄。凡脇從牽累。的補免窮治。流移的招他復業。毋許豪強。乘機兼并。還與優加賑恤。以安新定地方。兵馬久戍勞苦。酌量應撤的次第撤還。永靖諸苗。橫恣逋誅。就著

撤回兵馬勦處不必待奏。可卽便宜行事。軍中一應有功人員俱從公敘來。其餘皆依擬。該督撫悉心行。欽此。又近閱邸報。該山西道監察御史李時華題。爲三省干戈幸戢。萬年計畫宜周。恭陳一二膚見。以備善後采擇事。內開條議十款。就中彊半多言黔事。就經備行布按二司。監軍紀功守巡各道。會議前來。看得播州善後事宜。統言播事。兵部釐爲十款。析言黔事。李御史列爲十款。詳哉乎其言之矣。當局者迷。觀局者智。本院愚迷於局。似亦可以無言。顧計者取多。謀者從可。聖明稽於衆。或不嫌於互發。謹以膚見。釐爲十二條。或爲諸臣已言而申明之者。或爲諸臣未言而專陳之者。總之抒一得之愚。爲地方長計耳。如或葑菲可采。瓦礫不棄。伏乞敕下兵部。再加從長酌議。覆請施行等因。會稿到臣。該臣看得播州平定。改土設流。業奉明旨。無容別議。惟是稽之舊制。原隸四川。但貴州在十三省之中。最爲狹隘瘠薄。今乘此平播之後。而割地以益之。又以楚地之最遠而近於黔者改隸之。則幅帙漸擴。居然西南一大都會矣。至於裁減協濟賑恤增築諸事。皆固圉甯民。還定安集之上務。所宜急爲舉行者。臣參詳再四。所見相同。除改設郡縣。遴選將吏。五司改流。清查黃冊四款。俱關係播州。臣已於平播善後疏中。參以蜀事。另行會題外。其更易轄屬等八款。俱係黔事。該臣會同巡撫貴州兼督理湖北川東等處地方軍務都察院右副都御史郭子章。議照前事。俱在可行。相應題請。伏乞敕下該部查議題覆施行。緣係逆賊甫平。邊圉未輯。敬陳善後事宜。以備采擇事理。未敢擅便。爲此開款具本。專差承差黃可美齎捧謹題請旨。

### 計開

一議更易轄屬。楚黔接壤。撫屬錯綜。如黎平府永從縣。近楚之沅州。去黔千五百里而遙。反屬於黔。平清偏鎮四衛。近黔之鎮。遠去楚二千餘里而遙。反屬於楚。卽云犬牙相制。翻成彼此推諉。頃者曾犯偏橋。而楚不能掇。比者苗犯黎平。而黔不能掇。卽黔有播患。而黎平永從無一夫一粒之助。非不欲掇助也。鞭之長不及馬腹。勢也。合無以黎平一府。永從一縣。改隸湖廣。鎮遠偏橋。平溪。清浪。四衛。改隸貴州。文武官軍俸糈。歲費公用。悉仍其舊。則軍民合爲一家。上下不相秦越。卽有寇警。誰能諉之。伏乞聖裁。

一議裁將留兵。頃者播患方殷。黔之將不得大增。今日逆寇蕩平。黔之將不容不減。清浪參將原屬於楚。非黔專官。無容議矣。黔中下六衛。無一重將。何以彈壓。則興隆參將似不當裁。都清守備當仍其舊。龍泉既有守備。則黎川參將。石阡都司。應裁。壩陽。普安。迤西三處。既有守備。則畢節參將。應裁。省城既有遊擊。則守城守備。當裁。播賊雖平。苗寇未剪。總兵標下留兵一千三百爲二營。興隆參將部下留兵一千二百。內分其半爲一營。守興隆。隸參將部下。分其半爲一營。守平越。隸都清守備部下。以爲下衛之保障。壩陽兵三百。分其半移隸安莊。貴陽留兵一千分爲二營。以爲省會之爪牙。第養兵三千五百餘名。每年約費三萬五千餘金。貴州無從出辦。相應於贍餉內暫支。俟二三年後。地方大甯。徐徐議撤。黎川參將王鳴鶴。陳良玘。俱將楚兵。聽楚中去留。畢節參將朱鶴齡。都司錢中選。守備杜鶴鳴。合無免其赴部。另補別缺。至於總兵駐劄。昔在銅仁。以故沈尙文之杜門。童元鎮之託身。眛爲兔窟。吵若越人。節經兵部題准。駐劄貴陽。夫非於銅仁疏而貴陽親也。貴陽近播。而銅仁去播遠也。總兵官似當仍駐貴陽。待年餘大定之後。以

春夏駐貴陽秋冬駐銅仁永爲定例無許偏安一隅伏乞聖裁

一議四川協濟。黔省土瘠民貧不及中州一大縣其歲供之費往往取給於楚蜀之協濟。查四川烏撒鎮雄東川烏蒙等四府每年協濟貴州本色糧一萬四千三百二十四石折色糧銀三千一百兩。查每年解納不及十分之三。播州協濟糧銀每年三千一百六十四兩七錢楊曾拒命逋負不納自萬曆十八年至二十七年未完銀約二萬九千八百三十餘兩。酉陽每年協濟銀七百兩自萬曆十九年起至二十七年共欠三千九百六十餘兩徒負協濟之名無益軍興之實。此在無事日猶不可況今逆酋甫定地方多難之時乎。祇緣四府酉陽襲職不由貴州渙然不相統轄卽錢糧逋負既無可罰之俸又無可降之官至於屢催屢負未可如何以臣等之愚四府酉陽卽不能割隸貴州至其襲職起送四川撫按會同貴州撫按批允而後襲則彼猶有所畏憚此一策也不然請乞嚴旨責成四川布政司立法嚴催催完總解載入職掌無得秦越相視又一策也不然請責烏撒同知東川烏蒙通判駐鎮本府督催四府協濟請責重慶府管糧府佐督催酉陽協濟其給由陸遷四川撫按會同貴州撫按考覈視協濟之完欠爲殿最必完及分數批允乃許離任又一策也舍此三策而欲藉悠悠難必之協濟以充嗷嗷待哺之正供欲保貧軍之不轉爲溝中瘠也必無幸矣伏乞聖裁。

一議楚省協濟。黔中軍餉仰給楚中湖南一道所轄長衡郴府州縣每年協濟貴州糧銀三萬七百二十兩零。遞年遞負不以時納自萬曆十四年起至二十七年止共拖欠銀五萬三千六百五十兩零而長沙

府屬通欠尤甚。良由貴州撫臣兼制，止及湖北，不及湖南。印糧官吏，自以非屬，怠玩成風。雖考成每年查參，不過徒飾虛文。卽完欠之數，催促逾年而文始至。極重者止於罰俸而止。彼何所憚而汲汲完異屬之餉耶。今楊曾甫定黔餉一空，合無將湖南一道屬亦隸貴州撫臣節制。其印糧官給由陞遷，照依湖北例。具文於貴州撫臣考覈錢糧，有無完欠。方許給由離任。夫常德去長沙咫尺耳，常德可屬，又何惜一長沙。若長沙不屬貴州節制，則拖欠之餉終無完日。貴州之軍終無飽時。其爲關係良非淺細。伏乞聖裁。

一議驛傳協濟。貴州四面皆夷，中路一線，實滇南出入門戶也。黔之設專爲滇設，無黔則無滇矣。國家興地以雲貴爲極邊，舊制倉驛小吏俱給符驗。蓋憫其險遠耳。以故流官中無論方面卽倉驛之陞轉皆馳驛也。土司中無論進表卽貢馬之差遣皆馳驛也。鄉官中無論方面部臣卽教官舉貢會試入京皆馳驛也。蓋以極貧極乏之區當極苦極煩之差撫臣日夕挂號堆案盈几欲裁之則行路嗟怨欲給之則夫馬逃亡欲處置之則帑藏空乏衛官貧而不能賠急之則閉戶驛官卑而不能支急之則逸去惟有仰屋浩嘆而已。查得貴州之驛非若中原之地征民間之錢糧買馬走遞也。又非若他省之馬戶有姓名可拘束也。舊例俱輪土司走馬。至於下衛則播州五司居其半自播州弄兵五司出亡平越興隆黃平之馬一匹不到今播雖已滅五司猶未返舊疆驛馬之困猶然如故頃撫臣不得已疏請於上借滇楚稍閑驛分各馬十五匹分發平興共濟時艱至今俱未解到黔中以貧故累及二省甚多此亦必不可得之數也。查得黔中道路黔之往來居十之四滇之往來居十之五楚蜀之往來居十之一每年雲南止協濟一千五百



兩遇入覲年加一千兩似覺太少合無每年加增一千五百兩入覲年再增一千兩如數依期解黔分給各驛俟五司改流之日錢糧上納不乏仍將滇銀照依原額臣等又查得黔中原無水路至於鎮遠始有小江可通輕船迨至辰沅常德會典載鎮遠清浪俱名水馬驛良有深意合無鎮遠清浪多造小船一切過往如御扛齎奏及部院方面仍從陸外自有司以下至於二省會試舉人卽有真正勘合牌票亦給船隻則平清晃州諸驛又得少蘇伏乞聖裁

一議增設駐鎮看得黔地多陋習而無善俗則以上下諸衛未設流官以武弁馭悍卒狠者如虎馭羊弱者如貓伺鼠如之何其不多盜也往年曾設都勻府推官駐鎮新添矣貴陽府通判駐鎮畢節矣邇年增設貴陽府同知駐鎮興隆矣儻再增設鎮遠府推官一員駐鎮偏橋都勻府同知一員駐鎮平越一衛之屯糧歲用責之收支一方之詞訟刑獄責之問訊一驛之馬匹館銀責之料理文武官評責之填報士習民風責之表率夷行苗俗責之化誨衙署不必建置取之本衛之公館俸薪不必編派取之各屬之缺官僕從不必雇募取之衛所之戍卒無更弦易轍之煩而有用夏變夷之實黔之黎庶尙亦有利哉伏乞聖裁

一議賑恤殘民楊酋煽亂流毒三省黔屬咫尺尤切剝膚兩年之間一犯偏橋再犯黃平三犯飛練四犯東坡而下六衛殘五犯龍泉而思石燬六犯河渡而貴陽震其未犯地方大兵經過荆棘叢生轉輸糧餉則有運夫之苦防守城池則有保兵之役男停其耜女空其柚驛遞蕭條道路邱虛小寇竊發餓莩盈野

陰雨連月禾稼不登元元嗷嗷莫必其命邇者大兵甫定瘡痍未起若不重加周恤則死者之冤氣彌天生者之號泣塞路恐播之餘黨一呼而號召之在在皆賊也爲今日計止有議蠲議賑二事然貴州錢糧董董亡幾何一議蠲則衛所官軍勢必枵腹待哺惟有賑恤一款似當急議而倉庫已竭無從發棠合無於贍餉內存留若干行守巡各道責成賢有司查覈糶害之輕重流離之多寡定爲賑濟之差等庶恩周蔀屋民不流離伏乞聖裁。

一議增築外城貴州在昔爲荒服至元始立爲順元路初屬四川改屬湖廣又改屬雲南原非重鎮卽設城郭不名金湯本朝始立爲貴州布政司屹然與楚蜀滇鴈行矣第地方旣褊人民未輳國初建城率因元舊而城址狹隘牆垣卑薄因陋就簡攀援可登二百餘年以來比關生齒旣繁且稠與城中埒頃者楊酋聲言渡江直走貴陽關外居民奔沓入城填滿城闔寄住街市無屋可貯無址可屋翹翹而危曉曉而懼當時士民卽有增築外城之呈顧時倥傯不暇議工又乏金錢誰與爲貲及今賊旣滅矣燕雀處堂亦响响然樂矣臣聞存者非存在於慮亡樂者非樂在於慮殃貴州本苗夷四戰之地非百年無事之國稽之史冊聞之父老未有五十年不用兵者今播州卽平皮林未勦東坡雖通九股尙存儻復有楊酋者出而後爲之所則晚矣在昔淮安揚州廣州餘姚俱因倭亂之後增築外城倭無所掠遂不敢近若貴陽得援此例築一外城內固舊堞外增新壘卽有烽燧民不遷徙此尤地方之利也黔中南遠滇雲下制辰沅上下二千餘里衛所諸城極卑極薄不足以當富至之一牆今旣不能一一增高而省會又無嚴城脫有

緩急直破竹解籜耳。念及於此，則國家藩屏之長利也。查得外城估計約三萬金，儻於贍餉內動支，一歲可完。一勞永逸，一費永安。惟此時爲然乎？夫徹桑未雨，畜艾未病，及雨且病，則無及矣。伏乞聖裁。萬曆二十八年十二月十六日。

### 六乞歸疏

奏爲孤臣危病已久，地方事勢甚急，乞亟賜點用，以保遐方，以全子道事。臣聞訃感疾，不能候代，已五次疏請，不知能徹天聽否。乃今病日久，事益急，更有不容默默者。蓋向來臣雖憂病不支，尚有按臣在事爲之經理也。今按臣崔景榮復於十二月十七日聞憂，十八日起身回籍矣。夫一方之事，全在撫按，如網之有綱，裘之有領，乃今一時俱缺，不知羣吏何所稟承，萬民何所依恃。此急乎不急乎？從來候代之官，雖云照常行事，然止總大體，擁名位，以繫屬人心而已。自不能一一照管也。況臣久病垂危，則身不能事事，近又赴境上候代，則勢不能事事。吏蠹民艱，莫之體察，軍機夷情，槩從隔闕。此急乎不急乎？且非獨於此也。近日總兵吳廣以兵變被論，蒙部覆亦擬回籍矣。一方大吏文則撫按，武則總兵，一時並缺，脫有不虞之變，突然而起，誰爲發縱，誰爲奔走？此急乎不急乎？夫此猶論地方事也。若臣之身，臣之家，臣之情，千辛萬苦，千險百阻，姑不贅言。論其大者，自古無不丁憂之官，無不奔喪之子，惟金革之事，乃從其權。而今又非其時矣。向臣聞憂之初，陛下留任之旨方頒，臣破賊之疏已上。方自幸免於奪情，免於墨綬，艱苦凶閔之中，尚可釋此終身之一憾。乃今聞喪已八閱月矣，而杳無歸期，無奪情之名，而有其實。無墨綬之事，而有

其似無金革之變、而不得安於居廬讀禮之常、三綱淪、九法斁、中國而夷狄、冠紳而異類、讀聖賢書、所學何事、而一旦至此也。臣卽不爲一身惜、爲一家惜、獨不爲一世之綱常、萬古之倫理、痛哭而流涕乎。則惟有積憂積哀、以至於死亡而已。夫死有重於泰山、有輕於鴻毛、向者與賊對壘、臣卽以憂勞死、以矢石死、亦自甘之。何者、爲國捐生、卽死賢於生也。乃今則何名、臣蓋不能爲之解矣。異日遼東延綏、福建撫臣之缺、亦久推不下。然至於應天缺出、則非久卽代。陛下亦以應天撫臣值親之喪、與他處不同也。臣非生於空桑、獨奈何而不以人道處之。坐令其積憂積痛、客死遐方、若爲賊報讐然者。蓋臣且不暇自惜、又爲國家之用人惜也。以此不避煩聒、再爲瀆擾、伏乞陛下將前推四人、亟賜點用、俾臣得交代而去。是豈惟爲臣一身一家計、卽四蜀之封疆、可保萬古之名義、不虧異日緩急用人、受事者亦免於我躬不閱之懼矣。臣無任向闕哀鳴之至。緣係孤臣危病已久、地方事勢甚急、乞亟賜點用、以保遐方、以全子道事理。未敢擅便、爲此具本專差承差鄧一安齋捧謹具奏聞、伏候敕旨、奉聖旨吏部知道。

乞優處府佐疏

題爲有功府佐、因病乞休、乞賜議處、以勸勞臣事。據四川重慶府申、奉臣批、據本府推官高折枝呈、爲夙病忽發、不能供職、懇乞俯容休致、以延殘喘事。內稱患病乞要休致、由詳奉批播州新定經理維艱、以本官有才、有守、任勞任怨、選擇而使、衆謂得人、何事復有此請耶。且播平已逾半載、彼中需人甚急、方在題請、何可言他。仰重慶府諭留、仍令作速入播視事、毋再遷延。繳該本府知府傅光宅、看得本官以征播在

營身親戰陣、苦心勞力、血氣爲傷、兼之衝冒煙嵐、坐臥泥水、成功還府、兩股出血水許多、此同府官所共見者。涪州查米、遂感疲暈是。播州新創郡邑、百事叢脞、本官才委有餘、而病誠不便、似應俯從調理、以全其志、別議擢用、以酬其功等因。到臣卷查先該臣看得播賊蕩平、疆土廣闊、應建郡縣、以司治理、第經營草昧之始、必須增設兵備、憲職方得內修戎備、外震諸夷、與夫創修衙宇城池、興復學校驛遞、或訓練士馬、以振威武、或建立鋪舍、以司傳遞、或清理疆界、丈量田土、或綏柔軍民、安輯反側、及欽遵明旨賑濟等項事宜、俱關喫緊、該臣先後行委推官高折枝、親詣播地、專攝兵備事務、遂項修舉、查議停妥、開款呈詳具題、間隨據本官稱病具辭、已經批行入播視事、去後、續據本官又具呈稱、職本北人、不便南中風土、自吏蜀以來、昕夕奔馳、日惟往來危峯湍流間、以致感冒風寒、時發痰火、累藥不效、久欲求歸、獨念播賊猖狂、地方戒嚴、王事孔棘、誼無避難、勉彊服勞、本年二月、從戎入播、六月始還、八月又入料理、九月盡始還、風餐露宿、臥雨眠霜、使溼氣交流兩足、遂成風瘡、每日出血數升、漸且成痿、日夕幽憂、寤寐焦苦、飲食減少、痰火更甚、今十一月初二日、因奉本部院憲牌、催發涪米賑播、爲是職親詣涪料視米船、忽然昏眩、倒跌舟中、不省人事、延醫診視、皆云心胃內傷、非旦夕可愈、職思身與官孰重、力疾服官、使身不可救藥、豈人之情、況今見奉憲檄、委攝播州兵備、職任事務重大、益非奄奄病軀能勝、若不量力而輕負重任、豈第積勞成瘁、病不可醫、身不可保、將恐方千里新開疆土、不能以時綏懷安集、其如地方何、呈乞俯憐、駑駘下質、無益於時、早容休致、放歸田里、就醫調治、苟延喘息等因、由詳前來、已經批行該府諭留去後、今

據前因。該臣會同巡按四川監察御史崔景榮議。照外官有病。卽准致仕例。也。所以爲擇官而避難者。戒也。然亦有不可以例論者。蓋有非常之人。然後有非常之事。有非常之事。則宜以非常之格處之。若高折枝者。何如人哉。折枝爲推官。已五年往矣。其執法之堅。守己之介。決獄之明。任事之勇。備在撫按薦章。姑且勿論。自播事初起。綦江始破。重慶之人。皇駭奔走。莫必其命。時道府皆不足倚。折枝以一推官。獨挺身倡率。效死勿去。文武士民。倚以爲重。當是時。微折枝在城。卽城內當自變。後值進兵。請自領兵當一路。以一文臣卑官。而當元戎之任。尤爲異常。至其破官壩營。以解思石之危。奪桑木關。以爲諸路之倡。壁海龍圍前門。以收滅賊之效。諸凡戰功。臣敍功疏內言之已悉。無容更贅。旣出營。臣卽委之散兵。委之善後。曾以病辭。臣彊使之。折枝不得已。復挺身而往。時播地新經戰伐之後。死屍相枕。血肉狼藉。愁雲毒霧。行路酸心。而折枝奔走拮据乎其間。招流移。分田土。修驛舍。安軍兵。漸有次第。而病遂不支矣。然則折枝之功。始終在播。而折枝之病。始終亦以播。夫人臣不難出萬死一生。爲國家夷難闢土。乃甫成功。而以病棄之。無乃非人情乎。折枝與同知張鼈同入播。善後鼈已病死。折枝復以病廢。則爲國任事者。非死不足以取信。此志士所以灰心。豪傑所以解體也。查折枝歷俸五年。屢經首薦。卽在常格。亦應推陞行取。臣近日敍功。亦擬於在京清要衙門推用。但其病勢已深。孤身宦邸。難以久待。似應稍破常格。卽爲推補。使得回籍調理。從容赴任。則不但以彼長才。不就廢棄。卽國家緩急有事。就使之。尙可得其尺寸之用。非無補也。伏乞敕下吏部查議。如臣等所言不謬。卽將本官於在京相應員缺推陞。遺下原缺。另行銓補。庶用世者。

無棄才之嗟而感恩者。思報禮之重矣。緣係有功府佐。因病乞休。乞賜議處。以勸勞臣事理。未敢擅便。爲此具本專差承差陳治道齋捧謹題請旨。奉聖旨吏部知道。

### 糾參黠帥疏

題爲黠帥投賄汗人。義難受辱。據實糾發。乞賜議處。以明臣節。以警官邪事。臣以一介書生。弱冠登朝。服事陛下幾三十年。生平砥礪名節。頗爲士大夫所信。坐是塵忝。洊躋九列。目今幸竣播役。持服東歸。自惟營葬先臣。供養母氏。長爲農夫。以沒世。庶幾爲萬曆完人矣。乃不意有無知武弁。投賄行私。汗人名節。義難忍辱。不得不據實陳之。陛下之前。臣自去年六月入蜀。時值兵戈擾攘。地方阡危。臣嚴禁所屬文武司道總兵等官。一切下程等項。槩行停止。於時上下倥傯。亦自無以一菜及臣門者。臣今年五月內。聞臣父之喪。發哀成服後。旋思所屬文武官員。或以臣值此大故。舉行奠禮。臣卽卻之。未免勞費。因卽移文所司。嚴行禁止。於時州縣有司。不敢舉行。其鎮道大吏。尙以臣終天之戚。仍具禮行奠。臣謂祭文無不受之理。因各受其文一篇。餘盡卻之。時四川總兵吳廣。備禮親奠。貴州總兵李應祥。備禮差官送奠。臣俱止受其文一軸。尙有原任四川總兵劉綎。與吳廣同城。獨不行奠。湖廣總兵陳璘。與李應祥事體相同。亦不遣奠。臣甚多之。謂二臣獨能守臣之約如此。而不虞其有他腸也。比臣抱病。自重慶返成都。行至中途。接到劉綎公文一角。內一稟大槩述其感臣使過之仁。俾得效犬馬之勞。不致終身蒙詬。末云太恩府仙逝。綎以門下受恩最深者。不獲躬叩靈几之前。一申芻獻。罔極之義。謂何前差劉茂林往北直隸。呈蒙頒賜應付。

業已專官代叩潭府、少紓積誠、冒干節鉞、伏乞海涵等因、內所稱差往北直隸頒賜應付、蓋先是平賊之後、縱卽差人具稟向臣言、值此大捷、總兵官當差人赴京打塘報緣、見任總兵各有火牌、縱係革任無火牌、求給一張、又云、差人由水路去、求填湖廣河南北直隸、臣卽填與之、仍謂其人曰、報功只報功、卻不可揭害別人、淆亂是非、爾將官好爲此事、須說知之、其人應而去、蓋臣以爲果赴京報功、而亦不虞其有他事也、及見其稟帖稱往奠臣家、始不勝驚駭、乃答之云、來揭念及先人、甚感、但專官代叩潭府之說、萬非所宜、不孝家下並無一人、止託縣官差人守門、大小事皆白之縣官、卽使至、亦不得達、況不孝方在此、敍功而將軍乃差人於家行奠、不孝生平謹交際、避嫌疑、儻致別有舉動、則將軍一場辛苦、又成空矣、君子愛人以德、惟將軍體之、若已差人、卽當趕回、庶免多事、此肝膈之言、必須體諒、無至遺悔、仍面諭其人云、傳與爾總兵、彼若送禮於吾家、吾必參之、其人亦應而去、旣臣到成都、復接到陳璘公文一角、內一稟、大槩亦敍其感臣薦拔之意、末云、軍中聞太封君仙逝、不勝傷悼、維時身在敵境、心急逆酋、故弗獲匍匐几筵、一申弔唁、伏念本職荷特達之知、恩同覆載、推太封君本原之自、義比生成、除差官卽日起程、馳赴相府致奠、几筵外、爲此具稟、伏乞台慈、俯垂鑒諒等因、臣於時已臥病在牀、仍口占答之云、先君之變、諸將軍皆以一奠見遺、不孝爲受一軸成禮而已、此道義之交也、來揭云、行奠於家、不孝在蜀、而行奠於家、與誰爲交際乎、此賄也、非禮也、不孝生平謹交際、尤避嫌疑、果爾者、彼此不便、望將軍已之、凡臣所以答二帥者、辭嚴義正、明示必參、以爲二臣卽有不肖之心、亦必咋指自阻、卽有出疆之使、亦必裹足不前、臣可



以相安於無事矣。至今十一月內，又接到陳璘公文一角，內一稟，稱臣父之變，欲親來弔奠，因水阻不前。既致奠，臣家又闍人終辭。今具祭儀少申微忱。內一揭，開文一軸，香一炷，豬羊席帛之類，共折銀四十兩。臣念屬官折銀充奠，甚非禮體。但既以行奠而來，亦難過責。因受其文一軸，香一炷，其折禮仍令原差帶回。仍以數語答之，述其不受之意。臣以爲第卻其禮，亦可相安於無言矣。比近日臣有家人自原籍來，得臣母舅與臣家書，則言陳劉二總兵先後差官至臣家，俱云行奠禮。緣臣父臨危時，曾有遺囑，言臣臨行時與言別事不要緊，惟賊未滅時，播州差人不可令一字及門。賊既滅時，將官差人不可令一字及門。臣母舅守此戒約，以故二將差官不令至門。其劉綎差官令人語臣母舅轉白臣母，言其所齎謝禮銀一千兩，金一百兩，玉帶一束，祭禮銀二百兩，懇求許其送進。臣母驚懼，言豈有以千金行禮者，亟逐之去。不將捕之送縣，其人不得已去。仍至按臣崔景榮家送禮。按臣之父亦罵而逐之，遂去。其陳璘差官知劉綎禮未受，諭之卽回。未云數目，亦未至按臣之家等情。臣閱之，不覺汗浹背，髮指冠，仰天椎心而泣。下沾襟也。夫臣至不才，無足比數。然是陛下節鉞之臣，而遐方遠人所觀聽而承式者也。奈何其以賄汙之。夫金以百計，銀以千計，其取數也多，其爲賄也重矣。臣豈有遺行耶？奈何其以重賄汙之。臣聞君子不家於喪，曾參之簣，黔婁之衾，仁人孝子必盡心焉。臣父生平以清白教臣，卽垂危而不忘臣之言，以戒敕於家。其爲臣名節計，亦以至矣。奈何其身後而假喪禮以重汙之。嗟乎！以臣之不才，而辱之及於親，臣之罪於是乎通於天矣。夫璘、臣所請置者也。縱方爲世大詬，臣所排羣議而留之者也。今幸而成功矣。蓋璘德臣甚，縱

德臣尤甚。其爲此舉，以報德於臣所不可知。且當臣敍功之時，一面送禮，一面投揭，冀以中臣之心，而爲彼長價，亦不可知。顧愛羊愛禮，人各有志。二臣欲以貨財報臣，臣亦欲以名節報陛下。奈何其以小人之腹，度君子之心，欲賂之以不韙之名，而貶其節耶。至於敍功一事，則臣自出師之日，已誓之於天矣。曰：賞罰功罪之不明，明神殛之，死不旋踵。逮及闔門，永絕其嗣。此寧可以貨利動之，而令食其言者。何物奸帥，妄意窺臣，嗟嗟二臣，亦可謂心勞而日拙者矣。夫璘之所遺臣於蜀者，其禮雖侈，然比之劉綎，不啻懸絕。第其走使臣家之心，則臣前所言爲賄不爲禮也。旣已遠使行賄，爲數當不止此。其後見臣之答書太厲，懼有糾劾，因亟爲此舉，以稱臣之意。臣旣已不墮其術，亦何忍復逆其詐。此可無論。惟劉綎以千金汙臣，又求牌於臣手，報數於臣家，機械甚多，猥鄙可厭。臣有不能爲之解者。參照原任南京後府僉書革任回衛，今充爲事官劉綎，勇而無禮，久馳跋扈之聲，貪而畏人，未見簠簋之飭。方在論功而行賞，輒先重賄以相投。今日蠅營狗苟之態，堪羞異時虎噬狼餐之狀，可想而知。論將固難拘夫一節，當官自宜謹於四知。此一臣者，所宜亟行究治者也。綎於平播論功居最，未錄其功，先摘其過，似非國體。且二帥昔爲臣之愛將，今爲國之功臣，一意暴揚，略無寬貸，似非人情。況臣旣未入其賄，卽槩置不參，亦無不可。但綎賄臣甚多，辱臣甚大，臣旣知之而隱默不言，知之者謂臣納汙含垢，保全功臣，不知者謂臣隱忍摸稜，別有希冀。則是臣以陛下之權爲媒，以臣父之喪爲餌，而以今日一番武功爲營私肥家之地也。臣卽死有餘辱矣。以故躊躇再四，不得不據實論列，伏乞敕下兵部議處，以戒姦貪。查綎先年行賄，曾經參論，而略無悛改，似已

無所用恥者。今卽不能沒其功，仍宜禁其再用。無令以貪黷遺害於行伍。以窺闕貽玷於縉紳。庶武臣知警。官邪可清。再照伐國不問仁人。游士不求貞女。古之操行有聞者。雄藩寢其邪謀。大吏滅其騶從。蓋至暮夜而有故人。卽揮之不入。亦以後矣。況以開闢授鉞之司。當寢苦枕塊之際。而行間將帥。輒爾趾錯於途。幣交於道。此足以明臣之無令德而有違行也。豈惟辱身辱親。卽輕朝廷。羞當世之士。亦以甚矣。臣已奉旨回籍。無官可能。乞敕下所司議法行罰。削籍除名。以爲人臣望輕取侮者之戒。臣愚不勝拳拳。緣係黠帥投賄。汗人義難受辱。據實糾發。乞賜議處。以明臣節。以警官邪事理。未敢擅便。爲此具本。專差承差陳治道齋捧謹題請旨。奉聖旨。兵部知道。

### 七乞歸疏

奏爲病臣久不奔喪。關係名教非小。懇乞聖明速賜放歸。以全倫理事。臣自本年五月二十二日。聞先臣之訃。臣方督官兵攻逆酋海龍。圍未下。臣聞變哀痛。恨不卽死。屬皇上特旨留臣。責以賊平事定。然後回籍守制。臣直經徒跣據地草檄。督過文武將吏。良以逆寇不可不平。皇上以權變責臣。而臣仔肩重任。亦不得不以權變遵奉。以臣之菲陋。何敢言移孝事君。蓋事體機會。方在緊急。不當以一家骨肉之私。蔑朝廷萬全之舉。較於禮法之正。非惟萬不得已。其去倒行而逆施者無幾矣。使事在得已。責有可分。臣必不敢以此自處。皇上亦必不以此處臣。此蓋無賢不肖知之者。何也。父子之親。根於天性。奔喪之禮。達於上下。爲人子而不奔父母之喪。自古及今未之有也。皇上尊祖敬宗。孝治天下。豈於微臣區區此心。而不之

察自平播以來、已半載於茲矣。臣於七月自渝入成都、悲慟傷惋、竊謂逆賊之擒、皆皇上之神武、戡定翦除、三方無患、而臣也命薄數奇、不足居成功之美、福過災生、所天摧隕、反覆熟思、使以勳名易奉養、以鼎牲代藜藿、孝子有心、必不忍舍彼而取此。因是纏綿悵、遽感重疾、久變爲痲、一病不起、幾三踰月。臣之不死、僅一間耳。幸而數旬以來、稍有起色、而片心如焚、千迴百轉、每一念生、輒至昏憤。此省城道將諸臣所共見聞、臣何敢欺也。臣六次具題、皆伏枕口授、頗極哀懇、未蒙省察。吏部數次催請督臣、未蒙點用。聖意高明、豈能窺測。臣再伏思、陛下業已許臣回籍、其所未允、代臣者耳。臣禮當奔喪、無復可疑。守禮而行、無復可恤。陛下試觀古今、烏有不奔喪、而可爲人子者。惡有不可爲子、而堪以任使者。臣如守宿留之迹、體眷盼之慈、素衣緝而閉門、持藥匕而待命、何以異於不奔喪者。如此、則父子之倫、置而不用、忠孝之道、瀆而不明、禮法滅倫、理壞中國、化爲夷狄、人類變爲禽獸、奈何。以臣一身處積勞之後、蒙不次之恩、當此不遑之實、而開天下後世議論之端、爲陛下聖治累也。昔吳起、魏之名將、母死不歸、曾參絕之、溫嶠力扶晉室、克致中興、絕裾不返、卒得罪於名教。臣心傷其事、身遭其故、豈能自己、而不哀鳴於君父之前乎。屬者按臣崔景榮、一聞父喪、卽日就道。臣於垂死病中、每一思之、拊牀慟絕。又以爲承明聖非常之眷、而牽延以犯人道、必不可赦之罪、羈縻以成盛世必不可有之事。拙於報恩、甘於在醜。臣何於大不幸之中、獨遭其窮、若是之極也。臣心已碎、臣情極苦、伏望陛下哀之察之、卽於吏部所推四臣、點定一員、俾其前來交代。臣歸而卽死、猶生之年、報皇上天覆地載之恩、世世不足盡也。不然、臣卽能負臣父、不能負倫理。卽

能戀皇上不能甘罪戾臣願以旗牌印務等件封付四川布政使司臣還家席藁待罪臣不勝戰慄哀懇之至緣係病臣久不奔喪關係名教非小懇乞聖明速賜放歸以全倫理事理未敢擅便爲此具本專差承差秦學仁齎捧謹具奏聞伏候敕旨

### 川省蠲免疏

題爲播事告竣民隱堪憐懇乞聖恩酌議蠲恤以廣皇仁以蘇積困事據四川布政使司呈奉臣憲牌照得播賊猖亂調兵征勦師行糧從所需甚急如上東下南二道萬曆二十七年分上南下東并西北四道二十八年分各所屬州縣始以額徵稅糧有每石改運本色火米七分之派繼以全省地畝復有照糧每石加徵一錢二分之派又以丁糧在上東下南二道雖不徵銀有出夫運餉之派在上南下東西北四道雖免出夫有幫運腳價之派此外又有器具之造作物料之取用百務叢集悉出民間連歲之苦不可勝言今逆賊既平前項瘡痍之民若非破格蠲恤何以慰更生之望仰司卽會按察司備查上下東南西北六道要見何道最苦何道稍次卽今作何蠲恤逐一分別酌議停妥務使小民目前可免徵輸之苦用霑朝廷浩蕩之恩其蠲免之數應以何項抵補俱要一併議報以憑會題施行又蒙巡按四川監察崔御史憲牌亦同前事蒙此查得上下東南西北六道所屬州縣前項年分夏稅秋糧每石改徵火米十分之七後雖以賊平停止然在上東下南二道則已全完在上南下東西北四道頭運二運亦已次第運赴軍前聽支訖及查先奉兩院安驗准戶部咨爲夷氛甚惡天討宜彰急發餉銀以佐軍興等事該本部覆議太

倉懸罄則動支爲難各省空虛則挪借尤難惟是東征時曾於北直并浙省地畝加派以濟一時應行四川將通省夏稅秋糧共一百二萬八千五百四十四石零每石加銀一錢二分每歲可得銀一十二萬三千四百二十五兩零第以時窮勢急不得已而取不得已而用以濟急公候事完減免等因覆奉欽依移咨備案行司遵將二十八年分稅糧照數加派解充軍餉訖又奉兩院案驗准戶部咨該工部左侍郎趙可懷奏爲患切剝膚等事該本部議行四川撫按轉行該布政司將運糧事宜酌量州縣大小派運若干其腳價等費編派見在丁糧不論應否優免一例徵銀在官雇夫運納等因覆奉欽依移咨備案行司內開上東下南二道去播稍近則就近派夫轉運免徵腳價上南下東西北四道距播篤遠則徵銀解作募價免行派夫等因遵照通行各道分別派夫徵價領餉轉運聽支訖又奉兩院案驗准戶部咨爲播寇蕩平遵旨奏免加派錢糧以蘇民困事該本部議將二十七年十月內加派銀一十二萬三千四百二十五兩零遵旨減免等因題奉欽依移咨備案仰司通行道府州縣一體遵照等因俱經奉行外今奉前因該本司左布政使盛世承會同按察使沈季文議照播賊犯順興師致討一切緊要軍需所費不貲查止奉內帑發銀七萬餘兩并鳳陽解銀八萬五千五百六十兩其餘無一不取給於本省亦無一不出自民間在上東下南派夫轉運負重涉險衝冒瘴癘轉於溝壑者甚衆其苦稱最在下東上南及西北四道火米夫價在在催督無不剝肉剝膚以佐公家之急其苦稱次今仰仗天威一鼓蕩平而瘡痍凋敝之衆元氣已索然盡矣及查萬曆元年川省大征九絲事竣蒙將該年以前小民拖欠各項錢糧悉從蠲免萬曆十

四年、以征勦松潘事完、蒙兩院題將該年夏稅秋糧免三徵七、今征播之後、較之九絲松潘、其難其苦不啻數倍、照例請蠲、委不容緩、及查二十七年分秋糧、上東下南二道、改徵本色火米十分之七、與折色三分、及上南下東西北四道、本折兼徵、俱已盡完、無容議減、二十八年分稅糧、上南下東西北四道、改徵火米十分之七、上東下南二道、夏秋銀米、并正稅之外、每石加徵銀一錢二分、一應全蠲、一應減免、但二項銀米、自派徵之後、有盡完者、有完過半者、有通未完者、用是議蠲、議抵、似屬不便、若將已完另項收貯、未完悉行停止、則先完者、偏受其苦、未完者、坐享其逸、且恐不肖有司、及猾吏積書、將已完者乘機乾沒、掬作未完、而多完者、隱作少完、及至派徵、應納分數、又復藉此局騙、高下其手、弊端百出、莫可究詰、是朝廷徒有撫恤之美意、而百姓未受寬減之實惠、似不容不一爲之酌處者、所據該年分稅糧、仍應照舊盡數追完、分別起解聽支、請將二十九年分應納稅糧內、以上東下南二道蠲免五分、下東上南二道蠲免四分、西北二道蠲免三分、此外每糧一石、再於該年扣免一錢二分、以補今歲完過之數、用普朝廷浩蕩之恩、以恤蒸黎陪累之苦、至於抵補一節、查得四川通省、每年額徵稅糧九十七萬六千五百四十二石七斗、內本色米收七萬八千五百四十八石七斗、折色銀七十二萬五千七百六十六兩、據其額派、雖若有餘、然遞年全完者少、而逋欠者實多也、且歲出上用扇柄絹疋茶蠟藥材、及宗儀祿糧官吏師生俸廩、松潘安縣威茂建馬等邊官兵糧餉等項、共該銀六十三萬五千一百兩、米七萬八千五百四十八石四斗、皆係必不可缺者、是以一歲之入、僅供一歲之用、茲計上東下南二道、歲額糧銀三十三萬五千零二兩、

米二萬一千七百六十一石七斗。蠲免五分。應該減徵銀一十六萬七千五百零一兩。米一萬八百八十石八斗五升。實徵五分。該銀一十六萬七千五百零一兩。米一萬八百八十石八斗五升。下東上南二道。歲額糧銀九萬九千三百六十三兩。米二萬三百零三石。蠲免四分。應該減銀三萬九千七百四十五兩二錢。米八千一百二十一石二斗。實徵六分。該銀五萬九千六百一十七兩八錢。米一萬二千一百八十一石八斗。西北二道。歲額糧銀二十九萬一千四百零一兩。米三萬六千四百八十四石。蠲免三分。應該減銀八萬七千四百二十兩三錢。米一萬九百四十五石二斗。實徵七分。該銀二十萬三千九百八十七錢。米二萬五千五百三十八石八斗。共蠲免銀二十九萬四千六百六十六兩五錢。米二萬九千九百四十七石二斗五升。每米一石以六錢計算。該折銀一萬七千九百六十八兩三錢五分。共該蠲免減徵銀三十一萬二千六百三十四兩八錢五分。又蠲免加派地畝銀一十二萬三千四百二十五兩。但司庫近因軍餉支用幾盡。各府州縣支贖銀兩。亦各搜括無遺。前項蠲免之數。共該銀四十三萬六千五百餘兩。無可抵補。查待征兵四路支贖軍餉。存貯不等。在綦南二路。共贖有銀三十三萬九千五百八十二兩三錢。在永台二路。共贖有銀一十七萬一千三百八十五兩四錢。在成都保順潼川建昌等府州縣衛。亦有支贖銀四萬五千四百二十八兩六錢。通共五十五萬六千三百九十六兩三錢。於內量留二十萬。以備播州善後營建之用。餘止三十五萬六千三百九十六兩三錢。不足抵補。又查有福建協濟貴州銀十萬兩。因彼時起解未到。於川省借過銀十萬解用。原議以福建之銀補還。今行取解。至日抵充。湊蠲其本



年稅糧并加派地畝未完等銀。俟今冬追完收貯聽支。伏乞軫念民瘼。早賜會題。庶疲民得蘇。等因。呈詳到臣。案照先爲前事。已行該司會議去後。今其前因。該臣會同巡按四川監察御史崔景榮議照。川民連年疲困。蓋更僕未易數矣。所爲出之水火。慰其飢渴者。惟是蠲恤爲急。故水旱則蠲。採辦大木則蠲。地方多故而興師則蠲。蓋蜀人家無厚藏。心極忠順。一遇地方有事。則竭力急公。死亡不避。逮至事常。而民亦俱困。轉徙流離之衆。皆嗷嗷待命於上矣。矧數年之間。數役並舉。而百姓瘡痍。如今日者。臣何敢不披瀝以請。查自萬曆二十四年。奉有採木之令。凡五年於茲。小民之竭蹶而趨折脛而斃者。言之令人酸楚。至二十五年。天災流行。則死且徒幾半矣。至二十七年。礦稅並興。則財與力俱殫矣。而不謂復有征播之役也。自臣祇奉聖旨。役在疆場。凡軍前一應芻糧糗糒衣甲器仗火藥器具。與夫碾運空運派夫派價編夫編馬。及諸所取辦。必不容已之費。鑄鍊孰非民財。涓滴孰非民力。赤子膏血。幾何堪茲無已之役。醫瘡剜肉。反裘負薪。臣有不勝其恫者矣。頃者仰仗皇上威靈。醜賊蕩平。絕無瞧類。地方黔黎。靡不額手稱慶。謂出水火而登衽席。在此一舉乎。惟是兵革之後。閭閻消索。物力凋殘。析骸易子之民。骨肉不保。流離板蕩之地。田舍爲墟。扶傷捋死之家。啼號未息。儻非破格垂憐。廣施蠲恤。則殘喘遺民。不死於賊。不死於兵。又死於賦耳。查得川省先年征勦九絲。及建越馬湖等處。事竣之後。該前撫按諸臣循例請乞蠲免。荷蒙俞允。往牒可稽。今日播事。視前事不啻百倍之難。而所需民財民力。亦百倍之。蠲恤之議。在今日更不容己者。合無將四川萬曆二十九年分稅糧內。上東下南二道。逆會茶毒已深。小民轉輸尤苦。蠲免五分。上南

下東二道、密邇用兵、地方疲勞、波及爲最、蠲免四分、西北二道、奉文派徵腳價、民財耗竭已多、蠲免三分、此外在通省、又每糧一石、扣除一錢二分、免派以補前徵過地畝之數、其前項蠲免及加派之數、約該銀四十三萬六千五百餘兩、議於四路、并各府州縣衛支贍軍餉銀五十五萬六千三百九十六兩三錢內、除二十萬、留備播州善後之用、餘扣三十五萬六千三百九十六兩三錢、并貴州借過四川銀十萬兩、移行該省於福建原解協濟銀內取還、抵充湊蠲、其徵派未完稅糧地畝等銀、聽該司今冬追完貯庫正支、脫或各州縣間有完不及數者、卽於明歲應蠲數內、扣徵抵補、不拘三分五分之例、聽布政司於該年開徵之時、分別會計施行、則皇上雷霆之威、旣除所以害民者、而雨露之恩、又急所以養民者、遐方窮民、享太平於有象、而祝聖壽於無疆矣、伏乞敕下戶部、再加酌議、如果臣言不謬、早爲上請施行、地方幸甚、臣等幸甚、臣不勝激切懇禱俟命之至、緣係播事告竣、民隱堪憐、懇乞聖恩、酌議蠲恤、以廣皇仁、以蘇積困、事理未敢擅便、爲此具本、專差承余陳治道齋俸謹題請旨、奉聖旨、該省供億用兵、百姓疲困、可憫、所請蠲恤、戶部便覆議來看、欽此、本部覆奉聖旨是、

八乞歸疏

奏爲萬象皆春、孤臣獨苦、泣血籲天、乞賜代歸、以全子道事、臣久不得代、七疏陳情、計已次第仰徹天聽、乃近閱邸報、止見下部、未見處分、臣驚心動骨、無以爲計、只得冒死再請、臣聞毀行之士、聖主必下其品、數倫之朝、哲士以規其邦、五倫孰大於親、百行孰大於孝、親終而居廬守禮、此人道之常、何足爲孝、然並

此廢之、則無人道矣。人而不以人道自處、是曰人禽。鄉里所不親、月旦所不齒也。臣之聞訃、自去年五月至今、幾一年矣。夫禮有奔喪、爲在外者設。有不得卽奔、爲羈於故未卽行者設。乃至經年而不奔喪、此何事何禮乎。去歲自夏歷秋及冬、日月雖深、猶一歲間事也。今又一歲矣。甲子已更、燧火已改。天摧地折之人、猶然旅食他鄉、優游官署、與尋常不殊。此尙可以爲子耶。不可以爲子、尙可以爲人耶。夫滿堂皆笑、一人向隅而泣、則舉座爲之不樂。於今春也。元氣流惠、風轉草木、羣生之屬、皆欣欣向榮。獨令臣拊心搶地、以日爲年、賭風木而自傷、望枌榆而不見、永死不得、欲生不可。陛下與物同春、何忍令臣至此。日者臣一病百日、幸而不死。有告臣者曰：上或以獻俘鉦功、設官善後、諸事未備、不令爾歸。臣爲之瞿然驚惕。力疾勉圖、向前諸事、次第報完。陛下亦爲之宜捷告廟、昭示四方、謀反造逆之兇黨、已駢首卽刑。闢土開疆之庶官、亦交臂受事。從來候代之官、亦止擁名器、示彈壓耳。於政事、不一一親也。臣獨揮涕含酸、宵晝經理。止爲冀得竣事、早博一歸。主父偃曰：吾日暮途遠、故倒行而逆施之。臣之心事、其殆類此。乃今天地悅、神人和、夷漢搏心。中外禔福、獨臣羈棲狼狽、死生無據、居然自如。不知陛下何令臣獨苦至是也。夫以臣爲微勞可憐、則宜少恤其私、令得復其養生送死之常。如以臣爲闕茸不才、不宜存恤、則宜擇賢代之。無令爲地方久累。乃許之歸、而不爲置代、令在去就之間。死生之際、俾在世有不孝之子。在官有無親之人。名行大虧、倫紀全斁。此豈直非所以處臣、卽覘國者且從而議其後矣。臣每清夜自思、悱惻無聊、幾欲刎頸穴胸、與泉魚同命。顧死則不能棄臣母、欲生則不能棄臣父。展轉悲憤、輒至殞絕。常恐一旦遂死不歸、令

造逆者以爲口實。任事者以爲殷監。則不直不孝。亦且不忠。陛下必不忍令臣至此。臣草此一疏。殞絕數四。惟望陛下哀憐。而早代之。不則惟有委而去之。伏苦待罪而已。臣據地痛哭。不知所云。緣係萬象皆春。孤臣獨苦。泣血籲天。乞賜代歸。以全子道事理。未敢擅便。爲此具本。專差承差徐讓齋。俸謹具奏聞。伏候敕旨。

請補播州缺官疏

題爲播地缺官。乞賜亟補。以營新造事。照得播州初平。臣已遵旨議改二府一州八縣。及應用文武官員。酌量陞調。一面具題。一而行令入播。任事去後。近接大計郎報內開。該府新擬加銜調用同知王陞。以原任知州不及降二級。新擬加陞通判劉之瀾。以原任知縣不謹閑住。新擬真州知州陳應楨。以原任通判不及降三級等因。該臣看得三臣者。臣取其才具。尙堪驅使。因調之入播。不爲無意。吏部覈其政行。各有瑕疵。因汰以計典。亦非無因。但大察重典。三臣旣在閑住降調之列。自當離任。無容更議。惟是郡縣初設。經營伊始。卽今丈量田地。安插軍民。營造城郭。急須得人料理。所有原缺。若待銓除。豈不誤事。相應徑行議補。以濟急需。該臣查得湖廣歸州知州孫鶴年。才優繁劇。民頌廉平。去歲用兵之時。臣訪其才器不凡。調之軍前效用。諸有委任。咄咄立辦。後以積勞成病。不終事而還任。未盡其才。同事者至今服其幹濟。用之播地。甚爲相宜。雙流縣知縣鄧宏烈。心田忠赤。幹理勤渠。曾督施南兵破板角關。臣已優敘其功。擬加銜久任。今宜改任。始盡其長。長壽縣知縣郭維屏。宰邑大得民譽。理餉克濟軍興。臣嘗第各路小委官。謂

不辭勞怨。不避險艱。當以維屏爲最。其政成而資深。似足爲優陞行取之儲。顧此地此才。幸而相值。爲地擇官。無以易此。臣竊妄爲議擬。謂孫鶴年宜陞播州新府同知。鄧宏烈宜照原級加同知銜。管新府通判事。郭維屏宜加同知銜。管真州知州事。蓋播州開創之初。地荒民散。人不樂居。自非資級稍優。常情不無缺望。夫盤錯之地。資人經理。常宜令有樂用之氣。庶幾鼓舞從事。不苦獨賢。若官不加進。舍逸就勞。常有邑邑不滿之心。則以其官爲雞肋。而以其地爲石田。始事廢弛。終難整理。是令官與地兩相厲耳。故臣擬各官稍從優厚。人情事勢。自是當然。非無以也。臣已一面行令入播任事外。合行題請。伏乞敕下吏部查議。如臣所言不謬。將孫鶴年等各照原擬陞職功銜。行令到任管事。仍照原題三年政成。破格優轉。以酬其勞。遺下員缺。另行推補。庶新地得人。善後有賴矣。緣係播地缺官。乞賜亟備。以營新造事理。未敢擅便。爲此具本。專差承差徐讓齋捧謹題請旨。

### 繳寶劄疏

奏爲軍務事。案照萬曆二十七年十一月初二日。准兵部咨職方清吏司案呈。該本部題照得。近因播會猖獗。聲罪致討。該科臣張輔之等。題請欽賜督臣尙方之劄。以重事權。節奉聖旨。賜劄准給發。不用命的。許先斬後奏。欽此。向來祇候頒給。值今兵將雖已漸集。而人心尙屬觀望。伏乞敕下該衙門。將科臣題允。賜劄早行頒降。本部馬上差人齎付督臣李化龍。欽遵行事等因。題奉聖旨。是欽此。隨該司禮監於文華門。傳奉欽賜督臣寶劄一口。恭捧到部。送司案呈到部。恭惟尙方寶劄頒賜軍中。凡以整飭人心。肅將天

討故一出而甯賊平。再出而朝鮮定。此俱案牒之可鏡者。今播酋猖獗。戮將屠城。寇逼門庭。患在腹心。仰廬聖慮。俯允所請。照例頒賜。以重事權。務要矢滅此朝食之心。嚴逗遛退縮之令。期斬逆首。懸之藁街。上申國威。下雪民怨。庶幾仰副聖主倚任之殷。而媲美於東西也。合咨前去。煩將頒賜寶劍。恭收欽遵行事。及轉行大小將領一體欽遵。查照施行等因。差官齋捧賜劍一口到臣。該臣卽於是日恭設龍亭。焚香望闕叩頭祇領。隨督行三省文武等官一體遵照。及將兵馬錢糧催價齊備。於萬曆二十八年二月十二日約會出師。差官齋捧欽劍馳至軍前。隨營監陣。欽遵行事。至本年六月初五初六兩日。官兵急攻。仰仗天威。圍破賊寨。兵撤事竣。捧繳到臣。臣惟播酋造逆。致干天誅。臣以一介書生。獨踞三藩文武之上。方苦才微。望劣。衆未服從。加以我弱賊強。人懷觀望。迨調發幸集。夫武勇乃心志更險。於山川雖三令五申。備極鼓舞。顧此疆彼界。終涉參差。幸遇皇上重念軍令之嚴。特辱尙方之賜。白旄黃鉞。威動九天。雪鏗霜鋒。光搖萬里。臣於是奉揚主命。整懾羣情。申嚴後至之誅。大鼓前驅之勇。於是三軍股栗。萬衆心寒。受命則忘身忘家。有死之心。無生之氣。對壘則百戰百勝。滅人之國。取人之城。用能淨掃蠻煙。重開炎徼。坐消氛祲。永奠西南。蓋惟令肅九重。所以功成六月。此臣所爲撫太阿而揚休。捧含光而頌德者也。今照兵事告竣。所有賜劍。理合奏繳。伏乞敕下該衙門照舊查收。以昭中興修文偃武之慶。緣係軍務事理。爲此具本。專差官胡維城齋捧進繳。謹具奏聞。計實繳賜劍一口。萬曆二十九年三月二十八日。

題爲征播事竣造報動用軍餉以備覆覈事據四川布政使司呈造覆覈過征播軍餉錢糧自萬曆二十七年六月起至二十八年九月止綦江南川合江永甯四路與所屬府衛州縣總計支發戶兵二部并本省外省蜀府義助及派徵未完地畝夫價等銀共二百四十七萬五千八百零六兩四錢八分六釐八毫七絲八忽九微一塵四纖四沙銅錢一百七十三萬一千八百零四文內買辦米豆草料戰馬烘炒藥餌魚鹽薑蒜及製造軍火器具并漢上官兵行月二糧安家犒賞懸賞功賞運夫腳價等項計用銀一百五十二萬三千九百九十兩六錢零三毫四絲三忽五微各項內有積出扣回還官銀三萬三千七百二十五兩零九分七毫六絲四忽八微又施南八土司官兵八千餘員名安家行糧犒賞并三箇月本折糧銀共二萬四千八百五十兩各兵應援思黎得從龍泉進兵功屬湖貴紀敍糧係川省代供此項餉銀應在二省算除外實止用過一百四十六萬五千四百一十五兩五錢九釐五毫七絲八忽七微銅錢一百六十六萬五百五十六文前項扣回并支贖在庫及見徵未完共銀九十八萬五千五百四十九兩九錢七分七釐三毫二微一塵四纖四沙買運改運碾運及蜀府義助各本色米共四十四萬九千九十七石七升七合八勺三抄一撮一圭一粒內支過三十一萬九千五百七十一石六升六合八勺實贖一十二萬九千五百二十六石一升一合三抄一撮一圭一粒烘炒三千二百二十三石六斗三升內支過一千五百二十二石三斗實贖一千七百零一石三斗三升炒米一萬五百零五石一斗九升三合內支過五千六百一十五石八斗二升實贖四千八百八十九石三斗七升三合黃豆胡豆共二萬九千八百五十一石

一斗四升四勺。內支過一萬二千八百五十三石五升五合。實贖一萬六千九百九十八石八升五合。四勺。粟穀一萬一千四百九十三石九斗六升二合。內支過四千一百五十七石九斗五合。實贖七千三百三十六石五升七合。乾魚一十五萬三千五百一十斤。內支過七萬三千九百九十九斤。實贖八萬三千四百七十一斤。食鹽三十六萬九千三百三十四斤。內支過一十二萬三千六百六十二斤半。實贖二十四萬五千六百七十一斤半。生薑四萬三千四百四十斤。內支過三萬七千一百五十八斤。實贖六千二百八十二斤。乾蒜五萬四千八百一十九斤。內支過二萬二千六百五十八斤。實贖三萬二千一百六十一斤。燒柴一十八萬二千一百九十斤。馬草八萬五千三百一十五束。二項盡支藥餌一萬三千三百一十五斤。零七兩。內支過一萬二千八百四十二斤一十兩。實贖四百七十二斤一十三兩。戰馬一千三十一匹。內領過八百八十四匹。實贖一百五十一匹。盔甲槍刀。銃礮弓箭。絲弦。挨牌。鉛彈。硝磺等項。共一百零五萬五千五百七十四件斤。內支過七十一萬零四百四十三件斤。實贖三十四萬五千一百三十一件斤。以上支贖糧料戰馬器具硝磺。若照原值變價。可得銀七萬八千二百六十五兩零。還充之外。實止用銀一百三十八萬七千一百四十九兩有零。至於運夫一節。原議東南派夫。西北徵銀。各從其便。其後銀未完而賊已滅。若將夫價槩行免徵。則東南獨勞。西北獨逸。苦樂甚屬不均。故議將未完夫價。並加派丁糧銀。一並追完。總於二十九年通省大糧槩行蠲免。以均勞逸。已於請蠲疏內題明。茲以二項見徵未完。并扣回支贖在庫總計。卽前所謂共有銀九十八萬五千五百四十九兩九錢七分七釐三毫二微一塵四纖四沙。



者也。及查前次議蠲止計在庫見貯銀五十五萬。及貴州應還銀十萬。共六十餘萬。今並續完及見徵者通計。故又多三十餘萬。共得前數內除二十萬。以備善後營建之需。四十三萬六千五百餘兩。以抵題請蠲恤之額。餘雖約贖三十四萬九千四百九十餘兩。實多逋欠。卽加併追。或完少半。而獲功官兵首級功賞。多半未給。創建郡邑。工程重大。添設文武。經費浩繁。此項贖需。俱應存留。通候工完。與見存支贖糧料戰馬器具總計。善後官兵支用幾何。變價幾何。通行查明另行銷算。若有餘贖。還官正支。本司會同按察司重覆磨算相同。中間並無侵冒等弊。理合呈乞造冊。奏繳施行等因。冊由到臣。案照先該臣題爲循例請設兵將等事。該兵部覆奉聖旨。該鎮督撫新設。事權宜重。這編選標兵。推補將官。調用各省兵馬。議處糧餉等項。都依擬行。欽此。又准戶部咨。爲患切剝膚。敬陳一得等事。該工部左侍郎趙可懷題。戶部覆奉聖旨。銀兩准解發軍興爲急。編派照丁糧。毋以優免靠損小民。欽此。又准兵部咨。爲逆酋悖旨不道。搆苗拒敵官兵等事。本部議將太僕寺庫銀四萬兩。支給四川都司淡章齋。至四川總督衙門交收等因。覆奉聖旨。是著各官上緊押解前去。不許違限誤事。欽此。又准戶部咨。爲請發庫銀防播事。該本部覆議。播酋爲患。撫按題請兵餉。本部議將二十六七兩年額解陝銀。題留彼處募兵防禦。旣稱解陝。合將太倉銀七萬四百三十五兩二錢解川等因。覆奉聖旨。是欽此。又准戶部咨。爲夷氛甚惡。天討宜彰等事。該本部議將四川稅糧。加派銀十二萬兩。通融支用等因。題奉聖旨。是欽此。又准戶部咨。爲看詳章奏等事。該戶科都給事中李應策題。本部議將湖廣二十七年本色漕糧二十一萬二千二百六十三石三斗。耗

尖米一十六萬一千三百二十一石六斗二升零、存留本省、抵充楚蜀貴州三省軍餉等因、覆奉聖旨是、  
欽此、又准戶部咨、爲楚滇助餉勢難如期等事、該本部議、將鳳陽銀十萬兩發四川等因、覆奉聖旨、川貴  
待餉甚急、你部裏便馬上差人星夜嚴催鳳陽廣西、如數解彼濟用、不許執留遷延誤事取罪、還立限與  
他、欽此、又准戶部咨、爲議動贖銀以助軍餉事、該四川按臣崔景榮題、將本院項下批追贖銀兩、助充  
軍餉等因、奉聖旨、戶部知道、欽此、移咨前來、該臣隨將戶部咨解銀七萬四百三十五兩二錢、兵部咨解  
銀四萬兩、鳳陽撫臣李三才咨解銀八萬五千五百六十兩、湖廣撫臣支可大咨解漕糧折銀三萬兩、蜀  
府義助銀二千兩、按臣崔景榮解贖銀三萬五千兩、并行四川布政司徑支庫貯銀一十三萬六千四  
百八十二兩一錢三分一釐七毫、又支解川東道銀六十四萬二千一百四十七兩四錢三分四釐八毫  
三絲三忽三微、解川南道銀五十二萬六千六百九十六兩三錢七分四釐、解川西道銀二千一百五十  
二兩一錢五分二釐、又支借貴州以福建協濟解補銀一十萬兩、各府州縣解銀四十二萬五千三十一  
兩一錢九分九釐四毫二忽六微一塵四纖四沙、成都府支造銀盤花牌綾段紅布等價銀四千兩、各州  
縣加派地畝賦稅銀一十二萬三千四百二十五兩二錢八分、又加派運夫工食銀二十五萬七千三百  
七十六兩七錢一分四釐九毫四絲三忽、通共二百四十七萬五千八百零六兩四錢八分六釐八毫七  
絲八忽九微一塵四纖四沙、銅錢一百七十三萬一千八百零四文、俱經一面派徵接濟、一面動支分發  
買辦糧料等項、及轉運軍前聽支、聞萬曆二十八年六月初五初六兩日、三省合兵輪攻、圍破逆賊授首、

妻子爲俘班師凱旋之後該臣備牌照得播曾造逆奉天征討卽今賊黨盡平官兵俱撤所據用過錢糧例應銷算但興師雖在二十八年二月十二日方行進兵然自二十七年六月以來卽值此役其中調募主客官兵分布防守買辦糧馬器具預備聽支陸續動用無月無之是防勦雖或不同經費原係一事通應一併清查檄行四川按察司敍馬瀘兵備道總理水陸四路督餉副使史旌賢備將一應錢糧毋分防勦盡數清查冊報隨據該道議將綦江南川二路并重慶府屬委本府同知梅燮合江永甯二路并瀘嘉眉邛雅州委順慶府同知馬性和成都府屬委本府推官王宗賢敍州府屬委本府通判陳仕麟夔州府屬委重慶府通判江騰鯨保甯府并潼川州各屬委本府推官方象成順慶府屬委本府推官陳博俱分投親詣四路及各府州縣清查前來類造間副使史旌賢聞報離任改行四川布政司分守上川南帶管清軍督糧道右參政王嘉謨接管造報到臣猶恐不的又經駁行該司再加覆覈去後今據前因除湖貴二省用過錢糧聽彼中徑自奏報外該臣看得播曾造逆致干天誅於時兵餉兩虛無從措手卽蜀省帑藏向稍充實年來亦以二運採木靡費不貲正項之外所存無幾臣蓋日夜憂之荷蒙皇上軫念遐荒多方經畫儲餉調兵繼至幅帙以故不假歲月克致蕩平臣稟成廟算奉揚天威幸而竣役可勝仰戴所有用過錢糧據該司道造報本色糶糧前開已悉無容復贅查得四川一省用過餉銀除扣除還官餘贖變價及協濟二省不計外總計四路官兵行月二糧運夫工食及一切買馬製器諸項雜費實用過一百三十八萬七千一百四十九兩有零及查湖貴二省先據送到造報錢糧文冊共用過一百餘萬彼兩省共

計四路與蜀相等。經費之數似少參差。緣四川自前歲六月賊破碁江。卽調發多兵各處防守。至進兵之時。已支半年之餉矣。比至進征川省。所調皆陝西三邊之馬兵。浙江河南山東之步卒。其糧餉原厚。皆以一人兼二人之食。迨事完撤遣。給以路費。遠者三月。近者二月。皆計程計費。寬然有餘。以故遠省客兵。歡然就道。此其支費。固有難以槩從省約者。然皆臣嚴督經管司道等官。事事籌算。時時稽覈。正支之外。絕無別項浮費。以故罷兵之後。計所贖存尙近百萬。臣之處心。良亦苦矣。及查扣回支贖。及派徵未完銀九十八萬五千五百四十兩有零。先經臣議。將見在者。入疏具題。於內動四十三萬六千五十餘兩。抵今年蠲免之數外。又議動二十萬。爲播州營建之需。今查播州善後。所費實繁。蓋卽萬兵之餉。一年已需數萬。加以驛遞之夫馬。官吏之廩糧。匠役之工食。小民之牛種。彼中尙一無所出。種種皆取辦官帑。儻一年之後。事未卽就。兵未卽撤。費豈便已。則卽以三十萬待之。未爲多也。卽今又解發三萬兩。協濟湖廣征勦皮林。計此三項。已該七十餘萬。則所餘者。僅二十萬有奇。而功級之銀。尙未全領。借支之項。尙未全補。拖欠之數。尙未全完。則此二十萬者。亦未可謂目前之長物矣。蓋此番舉動。川省原以全力從事。兵之徵調甚多。餉之協濟甚少。始傾府庫以平賊。繼竭物力而善後。東拆西補。殊費支吾。掣襟露肘。僅而全濟。卽免告急於司農。求補於內帑。亦已幸矣。比之貴州。原仰哺於外省。繼扣還於度支者。原難例論。臣固亦不敢不申明之也。除行該司嚴併追納。以備接濟。總俟工程告完。若有積餘。照數還官。聽接管督臣。另行銷算。造冊奏繳外。所有前項用過兵糧。起止年月。支存數目。理合開造黃冊進繳。青冊送部。伏乞敕下戶兵二部。

再加覈查。行。巡按御史覆覈施行。緣係征播事竣。造報動用軍餉。以備覆覈事理。未敢擅使。爲此具本。專差承差。苟應增齋。捧謹題請旨。

### 進播州圖疏

奏爲播地初開。敬獻輿圖。以塵睿覽。以抒愚忠事。臣不自量。受命勦播。以天之靈。幸而竣役。深惟此州之地。不入版圖。已八百年。陛下旣取而郡縣之矣。顧其地遠在西南。去天萬里。山川土物。頗異中華。謹命工人繪爲一圖。上呈御覽。儻蒙陛下於萬幾之暇。時賜省閱。亦得以習知其疆理。宏宣夫政教。萬分之一。不爲無補。顧臣爲此圖。尙有私衷。不敢不盡於陛下。臣惟逆酋拒命。自外生成。陛下以仁聖神武。赫怒臨之。如發蒙振落。何足爲難。顧其地山川險惡。林箐深阻。諸將吏皆攀藤附葛。冒炎觸瘴。與羣兇角。一旦之命。十生九死。僅而勝之。故披是圖也。陛下可以知將吏之苦。此邦之人。不沾王化。垂及千載。今一旦被日月之光。沾雨露之潤。如出谷遷喬。一何厚幸。顧其人原是卉服鳥語之倫。同處豺虎蟲蛇之內。向來生計。不過捫磴穿崖。刀耕火種。爲力甚苦。求活甚難。而逆酋且擾之以徵斂。威之以刀鋸。民皆重足一迹。莫必其命。蓋今之所爲開治建城者。皆昔之火宅鬼窟也。故披是圖也。陛下可以知小民之艱。夫臣子之義。事不避難。勞不言苦。臣何敢復爲將吏多贅。惟是爲小民者。今雖初出湯火。漸濯清冷。然殺戮之後。地多曠土。招附之初。人無固志。安之固易於見德。擾之亦易於思亂。譬之新生之木。爬搔稍過。則生意萎然而消。久放之豚。束縛太急。則野性悍然而起。夫難平者事也。難得者地也。惟以仁義取之。以仁義守之。則三代之

上理而太和常在宇宙間矣。臣願陛下流閭悌之澤，布寬仁之令，明示守土之臣，安之勿擾，緩之勿急，令一方小民，翕然知有生人之樂，喜色相告，又淒然念其已往之慘，涕泗橫流，庶幾甯心歸化，無復反側。西南半壁天下，永永無患矣。臣無任瞻依仰望之至。謹將所繪地圖隨本上進。

請卹典疏

奏爲孤臣代歸有期，循例陳情，懇乞天恩俯賜卹典，以光泉壤事。臣愚不肖，誤叨聖恩，總督軍事，適值臣父之變，奉旨在任督兵，旋以軍旅事竣，蒙允回籍守制，茲且得代奔歸，仰惟天恩隆重，非臣頂踵所能圖報，何敢再言所私。顧國有懿典，不敢不據例上請。臣世本農家，臣父棟，以臣塵忝仕途，節次受封七品五品職銜，後以臣巡撫遼東勦虜微勞，復辱特恩加封兵部右侍郎兼都察院右僉都御史。比臣起官今職，接俸三年考滿，該吏部查得臣父已受過三品封典，例不重封。止臣蒙恩陞右都御史，則臣父蓋係實授三品封。又經臣考滿應封，以臣見任二品時病故者也。查得大明會典，并卹典條例內一款，凡兩京二品以上文官，并父母妻，三品文官，并父母，曾授本等封者，俱照例祭葬。又一款，凡侍從春宮軍功等項，遇有前項陳請，仍移文兵部覈實，如軍功必躬履行陣有勞，方與具由題請。若止曾受官，未經實效勤勞者，不准。其特恩所加祭葬，大約於本等品級內量加一等。如軍功三品未滿，得及其父母，或有軍旅身殲勦勞茂著者，卹典自宜加厚。禮部臨時擬議奏請定奪，爲照臣自束髮以來，辭親從仕，垂二十年，臣父未嘗就臣一日之養，惟是鎮撫遼東督兵三載中，病而歸得居子舍，然甫踰一年，復有今役，受事未久，卽有臣兄

之喪。於時臣父遂苦侍養無人。臣身又以從征難返。兼之賊勢頗大。勦事頗難。臣父上憤國難之未平。下傷游子之遠役。愁思焦勞。卒先朝露。總之數年以來。臣之拮据。止在行陣。兵凶戰危。臣當其勞。臣父與其憂。卽壯夫亦當中摧。況衰年胡以久恃。憂國捐生。臣父亦復何恨。所苦獨臣心耳。乃臣聞訃以來。又以軍事羈留。一年於此。奔喪營葬。付之杳茫。帳有蛛絲。庭惟鳥迹。此士類所爲傷心。路人所爲殞涕者也。卽今南北少事。方寓晏然。平定之效。頗當聖心。露布北馳。天顏有喜。臣獨宗祊剝落。形影伶仃。跼地踏天。無以爲計。卽論理。則家國非倫。然在臣。則君親並重。蓋不能不望恩於陛下矣。臣父已實授三品封。又經臣考滿。本等卹典。例自應得。但稽之令甲。軍功三品未滿。得及其父母。臣卽么麼非類。而見叨二品。經年在事。軍旅勦勞。茂著。得從厚議。卹臣卽宄散無勞。而從征兩地。頗效奔走。軍功躬履行陣。方准與加恩。臣卽懼不立。而督兵數載。未離行間。據例原情。似宜少沾尺寸。且夫一往而不返者。親之終也。一缺而難補者。孝之禮也。臣非生於空桑。乃在生不養。臨終不斂。旣沒不歸。風木徒傷。雲天無望。茲固已百行莫贖之愆。終身不解之恨矣。惟冀松楸之際。少借恩私。窀穸之間。略存光寵。尙得以其浩蕩無涯之恩。少慰其沈綿終天之痛耳。伏望陛下俯察情苦。曲賜矜憐。敕下禮部備查往例。兼覈微勞。酌議卹典。稍從優厚。兼臣父尙得少妥魂魄於地下。臣亦得暫寄視息於人間。臣卽病苦衰殘。無能補報。銜環濡草。鳥獸有心。今生已矣。尙有來世。惟陛下哀憐裁察。臣謹泣血籲天以請。





# 平播全書卷七

## 咨文

### 咨貴州撫院防播

爲督撫地方事。照得播酋邇來狂悖大非往昔。親自統兵屯劄於蜀碁地界。擾害居民。彼處防禦官兵。又虞單弱。業經調遣總兵官萬鏊馳赴外。查得此酋近日又復集兵擾犯黔地。愈肆垂涎。已行各該道將查報訖。若該省一應設備與當興革事宜。本部院難以遙度。相應移會。爲此合咨貴院。煩請查將鄰播一帶去處。目前防禦官兵。有無足備。應否增添。與歧路設險扼隘。挖塹偵探。收保城守。并通省時宜興革事。干奏請者。陸續希稿見示。以憑會題。儻有徑行事件。亦希備細移送軍門。以便查考。幸勿遲緩。

### 咨浙江山東借兵

爲土酋肆逆。蜀地貽危。請乞量借兵力。以資防禦。以保封疆事。本月二十一二等日。據兵巡上川東道副使莫睿。并重慶府及參遊等官各報稱。播酋楊應龍於六月內。點兵六萬。分爲三路入犯碁江內地。先講地方。事後撕殺。乞發官兵。立候分布防守。又據報稱。楊應龍親自統兵數萬。在貓兒岡等處劄營。又在母渡入犯。離縣止二十五里。今守兵止有三千。勢甚至急。各等因。節報到部。爲照楊應龍恃其地利之險。兵力之強。睥睨全蜀。無足以當其鋒者。其蓄志欲逞久矣。年來假以擒拏叛奴。一犯合江。再犯碁江。殺掠之

慘節經奏報。然猶未敢悉師以出也。自貴州喪師之後。自知難追天誅。遂爾逞於一決。乃親統大兵數萬。復犯綦江。恣行殺戮。結營不去。益增生兵。蓋欲殲我兵將。占我邊隅。然後略地攻城。惟其所向。此其爲志。端不在小。蜀地原無兵馬。向來征討。止調土司。而土司之中。惟此酋爲最強。往日已事。可爲殷鑒。本部入蜀未及旬日。召募訓練。一無所施。不得已。遣總兵萬鏊。量摘松潘兵馬。前去重慶一帶。相機防禦。本部續調土兵數枝接濟。顧強弱之勢。已自可知。儻我兵稍挫。賊勢益張。滋蔓之禍。且在全省。茲所關係。豈細故哉。查得浙江。南山東之兵。天下稱勁。年來東征。全賴其力。今東征竣事。業已歸農。召募用之。極爲相當。除另差官齎銀召募。但此中事。已然眉。被處旋行召募。曠日遲久。無補急需。查貴鎮有防海及標兵二枝。兵將見在。今海波已澄。備而不用。合行借調。除具奏外。諒朝廷之上。見此情形。無不允發之理。但待報遣發。尤恐後時。合先咨請。希將前兵。令驍將統領。全營撥發前來。應給路費。量行支給。待此中解銀補還。若貴鎮兵不可缺。不妨徐募。已撤東征之兵。填補移緩就急。兩不相妨。昔寧夏之變。浙中聞常撫院曾遠遣三千兵赴援。大義精忠。日星並耀。料貴院體國奉公之心。決不憚披髮纓冠之往。請勿遲緩。

咨陝西各鎮借兵

爲土酋肆逆。蜀地阨危。請乞量借兵力。以資防禦。以保封疆事。本月二十一二等日。據兵巡上川東道副使莫容。并重慶府及參遊等官各報稱。播酋楊應龍。云云同前。查得陝西各邊兵馬。素稱驍健。本部向擬借調。緣秋防在即。未敢具陳。顧今事勢已急。計無復之。只須量借。除一面具奏外。諒朝廷之上。聞此情形。

無不允發之理。但待報遣發。尤恐後時。合先咨請。希將貴部院所屬四鎮。每鎮量摘撥二三千。令彼中驍將統領。各帶甲馬器械。量給行糧。速遣入蜀。俟本部一面解銀補還。入蜀以後糧料。本部一面預備。又查得延綏一鎮。舊有入衛兵馬一枝三千。年來借調東征。不係本地防守之數。今東征已畢。薊鎮無事。更希全營發來。要在十月之間。畢至蜀地。方爲有濟。昔年有調苗兵禦虜者。胡騎一呼。踏爲平土。酋所恃惟生苗。非陝兵不足以殲之。亦知秋防在目。彼此皆急。願貴鎮地大兵多。摘撥一枝。如九牛一毛。無足加損。其在蜀地。則救焚拯溺。宏濟爲多。料貴部院體國奉公之心。決不憚披髮纓冠之往。請勿遲緩。

### 咨兵部討將官

爲播酋猖獗。蜀事岌危。乞多發將才。以備戰守事。照得播酋不道。擾我封疆。綦江被殘。重慶告急。全蜀事勢。未知所終。此亦危急存亡之秋也。蜀原無兵。故亦無將。近雖調發土司之兵。而土官紀律不嚴。未必用命。雖亦多方招募。而烏合之衆。須得良將統領。始可收功。至於別省調兵。彼中雖有驍將。未必便肯遣來。臨時須有更置。亦不可不預爲之備者。卽坐名題請。但本職於九邊將帥。未能全知。又恐諸將中。有事故不一。不能應手卽至。返致誤事。相應咨請。爲此合咨本部。煩將後開本職所訪聞謀勇足備可用將官。轉咨各處督撫衙門。刻定期限。責令起送前來。或帶有家丁。隨其多寡。本處衙門卽給與應付勘合。抵蜀之日。自當從優給養。俟各將到後。本職隨其才器。分遣督兵。事甯之後。另議陞賞。仍行各處督撫衙門。此番所需將才。不啻救焚拯溺。不得以本處有急爲辭。遲留不發。致誤事機。至於後開各將。或近有顯過著聞。

難以重用。或本部所知。另有長才大器。在諸將之上。而本職所不及知者。亦乞隨宜改易。止在得人。或各將有見居重地。勢須題請者。亦乞查照咨文。徑爲題請。仍希將所遣發過將官。先咨知會。以便行催。須至咨者。

計開

薊遼總督標下副總兵戴延春。

薊遼總兵標下遊擊葉邦榮。

大同井坪城參將錢煜。

延綏入衛遊擊王國棟。

原任保甯參將郭有光。

河州革任副將周國柱。

河西原任參將余世威。

山西原任東路參將余德榮。

甯夏副總兵馬孔英。

洮岷副總兵魯光祖。

西甯參將王國柱。

京營遊擊陳奎。

原任京營參將蘭登瀛。

咨湖廣撫院防酋

爲緊急軍務事。近據兵巡上川東道副使莫容報稱。播酋楊應龍於六月十八日親統大兵屯劄於綦江內地。日肆劫掠。要攻綦城。又聲言添苗入犯重慶等處。等因。到本部院。除行見調赴重慶總兵官萬鏊。同該道加謹隄備。并一面調取漢土官兵。馳至該府一帶分布防禦外。爲照播酋楊應龍狡詐異常。近見明旨重頒。遂致疑畏日深。跳梁益肆。卽今縱橫無忌。不知意欲何爲。查楚省逼鄰偏橋一帶。均爲內地襟喉。未然之防。亟應料理。爲此合咨貴院。煩請速於有勇兵處所。無論漢土。急募數千。於鄰播要區。分布防守。仍戒嚴將領有司衛所。比常加謹隄備。用保無虞。應造器械軍火甲具行司。專官製造。應動銀兩。與集兵合用糧餉。該司一面酌定通詳。一面遣發馳赴慎守。仍請希將責成過將領等官緣由。并委過募兵職官姓名。先行移送軍門。幸勿遲緩。

塘報播事

爲緊急夷情事。照得播酋楊應龍統苗攻破綦江。殺戮將兵緣由。已於萬曆二十七年六月二十八日具題訖。本年七月初四日。據重慶府申據綦江縣報稱。六月二十一日。播酋親率兵苗六萬圍城。與房遊擊張良賢對陣。亂拋火石。城頭火起。各兵難立。一時滾下城牆。苗兵直入。當卽殺死房遊擊張良賢。蔣百戶。

生擒胡提調孟百戶其餘各官逃亡不知所之殺死兵民不計其數一時堆屍塞街打入縣堂殺死吏書  
阜快及避難街民一百餘見本縣帶回家眷十一口正衣冠端坐在堂止殺死義男一人義女一人打入  
後堂將什物一掃劫去次打入監房將各囚放出各令投順去次打入官庫先將外庫銀罄劫將內庫銀  
留數百勇兵看守圍裹自夜達旦二十二日早差出把總李旭何漢良將官庫銀檢過二千盡數持去仍  
根要庫子及避難街民湯禮等立一領契逼本縣用印將銀二千作賞兵之費次即打倉衆兵各依倉就  
食復懸牌內云本司率兵到碁路遠不便運餉將碁江縣庫貯銀兩倉貯米穀盡數借支無得阻難取罪  
二十三日放火燒城內官民房約有百餘家二十四日與本縣會話要改勦爲撫又要取各奏民及楊可  
棟屍棺要擡本縣到州作質事平之日方送還縣本縣毅然以死自許彼亦不能困辱二十五日早起先  
放火燒倉次即燒營鎖押目把十餘人進縣直入後堂拏本縣親子馬兆斗親舅許雲龍到營一路隨帶  
退入三溪今將前項逐一緣由因苗兵阻截片紙隻字難以上通擄去男婦不計其數并所屬巡司東安  
二驛家眷除查明另行申報外等因擬合申報又於七月初九日據敍馬瀘兵備道副使李廷謨報稱本  
月初五日午時准建武遊擊楊敏政手本報本月初一日亥時據五畝堡指揮王繼祖揭報本日午時聽  
夷放銃未時據哨探軍兵李啓等探得夷目趙林鶴統袁謨袁鼎袁年王繼先等兵又吼灘小溪等處兵  
見有千餘在龍門里剗說等播兵到齊就要一衝五畝堡等情本時又據探報隊長奚老三報稱探得楊  
應龍封刀一把要殺趙林鶴稱碁江已攻了緣何不打合江等情初二日夜四更時分又據塘報張廷舟

報稱三更時分趙林鶴統袁謨等兵分爲三路。黑夜難知其數。一由大油溪。一由虎巷子。一由磨刀溪。俱向五畝堡衝來。王指揮督率軍兵堵遏。因馬邊兵尙未到。見得勢力不敵。退至小寨坎。夷兵將五畝堡圍住。大叫要擊王指揮。當時將近居民房燒燬。又叫取草燒堡等情。又據王指揮差人謝乾報稱相同。除本職督率官兵堵遏外。查得馬邊兵奉瀘州調撤各兵。連夜撤出。已過馬街河。合就移報。又據合江縣申報相同。除本道一面差人持牌曉諭馬邊兵。不許觀望。著令奮勇與王繼祖出哨。并行令楊遊擊相機策應堵遏。用保無虞。一面催發宜賓團兵。督赴瀘州應援外。理合呈報。七月十八日。又據分巡上川東道副使莫容報稱。七月十三日。據綦江縣申。本月初十日。據本縣三溪住民羅可助。羅枝。羅從友。羅守用。係生員。羅舟。羅雍。羅于澤。羅允。羅蜀義男。告稱。楊酋自破城之後。一向劄營三溪母渡等處。又於初八日。將三溪田地。沿邊插旗爲號。播界自某處起。某處止。鐫一石碑。豎立界口。號爲宣慰官莊。且將各民房拆毀。改作倉廩。擄去男婦數百餘口。劫去財物數萬餘金。該本縣看得逆酋肆行無忌。混占民地。拆毀民房。將使一方之民。居食無賴矣。殘破餘黎。何由復業。等因。申報到道。各轉報到職。看得逆酋初出。聲言攻打綦合。直取重慶。比綦江旣破。劫奪倉庫。虜掠人畜。未免遲回數日。因之內地兵將漸集。聲勢漸壯。賊遂遷延不進。乃分遣生苗焚劫堡寨。又越播境五六十里之外。三溪地方。插旗豎碑。將內地民居。占爲官莊。狂逞已極。悖逆益甚。除益督發土漢官兵分布鄰播州縣。聯絡防禦。及行湖貴二省邊播一帶道將。各嚴督軍兵把截險隘。以防潰決突犯外。合行塘報。

咨湖廣備糧餉

爲督撫地方事。照得湖廣、偏橋、清浪、鎮遠、平溪等處，俱與播酋切壤，應用謀勇將官精兵防禦，業經移咨貴院及徑行布按二司，及湖北辰沅等道，計議將兵及糧餉機宜等項，不啻再三，俱未見回覆，殊爲可慮。頃楊酋犯碁之役，仍在集兵，聲言要犯湖貴地方，則偏橋等處，亟應防守。緣添設兵將，備置糧餉，本部院行文既久，計此時分佈停妥，惟是本色糧米，尤當多備，理合移咨爲此。合咨貴院，煩行湖廣布政司、動支軍餉銀兩，趁此秋成之際，收買本色糧米，要足官兵三萬名半年之用。專委督餉一道，責成各屬，克期羅完。運赴鄰播，應守地方，聽候支給官兵，幸勿遲緩。仍請將委用督餉專道，并分催各官，及買運米數，收貯地方各緣由，備咨軍門查考，併再檄催司道，將節行會議各項事宜，速議明悉，作速通詳，以憑施行。

咨貴州責安疆臣

爲督撫地方事。萬曆二十七年七月二十一日，據兵巡上川東道副使莫睿呈，據涪州申，爲四路阻寇，邀截奏章，綁戮差役，實難安堵事。本月十二日，准播州宣慰司批差頭目云云等因。到本部院，爲照播酋楊應龍，近日狂逞，大異往昔，旣戕犯黔省官兵，復攻陷蜀中縣治，戮將屠兵，聞者駭愕，豈非天道好還，此賊殺虜數多，天欲稔其惡而斃之耶。伊自知惡積罪大，欲以恐嚇官兵，乃令頭目部落極口全稱，貴州水西助兵一萬，攻我碁城。先據各衙門節報前情，本部院久知鳳氏母子，素懷恭順，較之楊酋，何啻霄壤，斷不信以爲真。且曾見邸報，黔省按院題疏，亦有安疆臣效順之詞，乃今該酋以結親之故，託言水西聲勢，誇



兵稱勝。但知自張聲援。不顧駕禍鄰封。機械變詐。不可方物。誠可痛恨。若不詢求虛實。將來槩疑黨奸。何以服心。應合移查。爲此合咨貴院。煩請轉行司道。詰詢安疆臣及伊母鳳氏。曾否與楊酋添兵助虐。有何深恨夙隙。將此逆情。駕禍於渠。若前所云。皆非眞實。是何播目揚言。貽安氏母子陰受無窮之禍。仍令疆臣速示譯諭頭目。及鄰播部落。毋得輕聽播酋詭計誘惑。厚賄結心。暗幫爲虐。嗣後日久論定。情形必露。伊時再悔。噬臍何及。希將詢過有無前項情由。移送軍門。以憑施行。

### 咨雲南調兵

爲土酋肆逆。蜀地地危。請乞借兵防禦。以固封疆事。本年六月十一日。本部院入蜀省受事。隨據兵巡上川東道及將領等官疊報。播酋楊應龍。集兵內地。侵掠騷擾。本部院卽檄行道將等官。嚴加固守。無爲輕敵。及一面四出徵調漢土官兵。計議防禦。又遣總兵萬鏊。馳赴重慶。分布防守堵截。詎意狡酋於二十二日。親督大兵直抵綦城。與將官決戰。遂致綦江城陷。官兵被戮。勢甚披猖。爲惡殊慘。緣此酋頻年爲患。三省不甯。頃自貴州喪師之後。自知難遁。天誅遂爾逞於一決。此其爲志。端在不小。原蜀中素無蓄兵。雖松潘開鎮。兵數不多。卽今秋防虜警。猶自不敷。以故向來征討。止調土司。而土司之中。惟此酋稍強。各土司無能與之抗者。惟是貴省元江甯州羅雄武定等處土兵。素稱驍勇。堪以禦敵。且查萬曆二十七年六月。內准兵部咨爲播患方殷。軍機至重等事。該本部題稱川貴湖廣地界相連。殆若犬牙交錯。合無於貴州總兵。請敕責任湖北川東地方。凡有事調遣。不許抗違等因。閏四月內奉聖旨。貴州方在用兵。總兵官所

轄、准照巡撫事例。湖北、川東參將、守備、軍衛、土司、俱聽兼制。有事調遣，不許抗違。無事只照常行。改寫敕書。廣西、雲南與貴州接壤去處也。著協力援擣，不許互分彼此。欽此。今照敕院叨總制三藩軍務，勢不得不借調前兵，用資戰守。爲此合咨貴院，煩念滇蜀鄰封，正需披纓拯溺之際，請將前項土兵，責成該管土官，挑選二萬，再加訓練。候本部院另文調取之日，令各備鋒利器械，再請行委謀勇將官一員，督同該管土官，管押各兵前來聽令分布。其行糧煩查滇中用兵則例同轉行。過土司選兵緣由，希先見示，以憑查照。臨調解給施行，幸勿延緩。

咨黔省撫院趁時糴米

爲軍務事。照得播會近雖稍靜，但戎心無厭，爲謀叵測。前又曾聲言要犯貴州龍泉等處。在我防禦自宜周密。近准貴院回咨，地方設防，應布將兵，與扼險隄備，漸有次第。雖兵尙不足，陸續募調，猶易爲力。惟本色糧餉一節，乃目前急用之需。諒貴院久已計處。先該本院節行貴州布政司，預計買備。及今製造器械火藥等項去後，未見回報。曾否酌行。今據該司揭稱，庫貯堪動軍興銀兩數目，不上萬計。與雲南應還川省解黔銀兩，應否動支糴買糧米，亟應乘時酌處。又查該省往規上納事例等項，儻中間如係折色，或照川中近例，可以暫改本色，亦應亟行。庶得濟用。爲此合咨貴院，煩行該布政司，將庫貯見存，并雲南解還銀內，應動若干，趁今時熟通詳，速委官員，照依時估多買米穀製造。如法收貯，近便倉廩。若事例等銀，應否隨宜改上本色，俱聽酌處施行。其應製軍火器具，亦速行司查照原行製造，仍將買過米數軍火器具，

先行希由移送軍門幸勿遲緩。

### 咨催湖廣買餉米製火器

爲軍務事。照得湖廣偏橋鎮遠清浪平溪等處地方與播界比鄰。應用將兵防守。須時刻不可懈弛。軍中所需日食糧米器具等項。節經移咨貴院。及牌行布按二司。湖北守巡辰沅等道計議去後。俱未回報。又於七月內移咨。請行該布政司動支軍餉銀兩。趁時收買本色米石。計足官兵三萬名半年食用。責令委官買運聽支去後。亦未回覆。今照防守事在孔亟。該省調發官兵畢集彼中。應用本色糧餉。貴在先期布置。又軍中利用必須火器。不知該省製造若干。擬合一併查催。爲此合咨貴院。煩請速行該司道。查照原行將三萬官兵足用半年餉米。動支官銀。專委督餉道。責成職官。剋日買完。運赴鄰播相應地方。聽候支用。此時秋成。正宜糴貯。不得遲緩。後時費事。其軍火器具。最爲要務。應委慣造員役。不分晝宵。多方製造。至於偏橋等處。分布將官軍兵。業已不次移咨貴院。第未見如何安設。仍煩督行該道。及將領統兵等官。一面整搦防守。一面設險偵探。仍將分布將兵。買完餉米。製完器具。各數目。咨報軍門。以憑查考施行。幸勿遲緩。

### 咨貴州巡撫增議防兵

爲緊急軍務事。准貴州巡撫郭咨。准本部院咨。查分布將兵。隄備鄰境播酋緣由。隨准開款回稱。貴州防兵共三千。已到一千七百。未到一千三百。平越衛有兵一千六百。已到一千一百。未到五百。興隆衛有兵

三千一百已到二千二百未到九百。偏橋衛有兵五千已到二千七百八十九名未到二千二百一十一名。黃平所有兵一千九百已到一千六百未到三百。新添衛有兵一千已到五百未到五百。清平衛有兵三百俱未到。龍泉地方有兵一千二百已到一千未到二百。等因。到本部院查得會省重地所稱防兵止有三千。黃平龍泉深入播地各止兵千餘。且有未到者。卽今叛酋舉動若此似應再加增設。及查思仁石阡婺川等府縣俱切近播地未知應否設兵相應再行會議爲此咨貴院煩請酌議將省城黃平龍泉等處應否再增軍兵若干思仁石阡婺川各處卽今有無官兵防守且彼處二府一縣去省城寫遠又隔湖廣偏橋地方止一龍泉守備聞其地又無城郭兵止有千餘恐不足爲一方保障應否再設兵將希一面分布一面移知軍門以便議題其未到軍兵曾否催到一併移知希勿延緩。

咨貴州防石阡

爲地方事。本年八月十三日據貴州布政司帶管分守思仁道左布政使應存卓呈據石阡府申報七月初八日據龍泉坪長官司報稱本月初二三四日連據各哨把總報稱播苗破劫石籬門又於馬頭山點兵數日但言伺候楊應龍令箭至日每兵草鞋一雙飯米三升不知何幹看係地方事情合行申報等因看得石阡孤城切近播境萬一逆酋衝突無將無兵何以防禦合行飛報緊急乞賜遣將隄防等因報道具呈本部院據此除行總兵官加謹隄防外案照先該本部院移咨貴院煩請查照先今事理行令貴省司道將鄰播一帶地方專司信地官兵將防禦事宜注意講求比常萬分隄備仍令各參遊守備等官各

帶多兵往來鄰邊處所巡警免曾窺知內地虛實又不許爲彼誘敵致貽後患諸凡一切未盡應分布應備辦等件。□早爲施行去後。隨准開款回覆前來。查得鄰播去處俱已設兵。雖多寡不一。稍可隄備。惟石阡府既近脅境。未見分布何項官兵防禦。今據前因。看得播酋縱兵屯聚。難免衝犯石阡要路。宜速緊防。爲此合咨貴院。煩亟酌議何項官兵。於石阡府防禦。或已分布。或調取未至。作何料理。可保無虞。希速回覆。幸勿遲緩。

### 咨河南催兵將

爲軍務事。本年八月二十五日。准兵部咨該本部題川省督按奏。播逆猖獗。及添置將兵等項。已該臣部覆。奉聖旨欽遵外。所有關軍機用人事。當蚤爲計料。內一款開備用將領。查得河南去川貴湖道路頗近。而彼中舊有毛葫蘆兵。精悍可用。臣頃過河北。見有領兵官任承爵。甚爲驍雄。堪以戰陣。及查本官係原任掌印署正留守。近因罪廢。充爲事官。合無准其量復遊擊職銜。卽令選帶毛葫蘆或本營自練兵馬。隨便器械。不拘數千。剋日統領星馳前去。川貴總督調度。隨地勦殺。合用安家行糧。河南撫院查照調兵事體。一面速行處給。一面奏請銷補等因。奉聖旨是。備用將領兵士。增置總兵中軍。俱依擬。欽此。備咨到本部院。看得播酋楊應龍。自攻陷碁江縣治。戕殺將兵之後。自知罪惡深重。難追誅討。日在挖塹修船。謀爲叵測。所需將兵。不啻然眉之急。既今本部題允將遊擊任承爵帶毛葫蘆兵前來備用。但未見起發。應合移催。爲此合咨貴院。煩請檄行該道府。將前項毛葫蘆兵。及本營自練兵馬。挑選驍健三千名。務要

人人慣戰。一可當十。各帶衣甲器械。責令任承爵統督。如兵衆多。再委勇將一二員。分隊管束。星夜到川。其官兵行糧安家。照部議就於該布政司支給。具奏請補。但須官兵蚤到。以濟急用。至沿途束兵號令。煩爲照例頒給。本官禁諭施行。先將起發官兵日期。支過餉銀數目。一併見示。以憑咨部。幸勿遲緩。

咨貴州防守思石地方

爲督撫地方事。近據貴州思石兵巡道呈。據石阡府經歷司呈報。七月二十六日。據龍泉司申稱。播苗在於馬頭山偏刀水都等處。割營。不知動靜。又將先年李保等造叛地名黃沙坎要路。挖爲溝壕。又據石阡司報稱。七月二十三日。被播目楊七等統兵七百。在鎮夷關外濫泥山燒劫。殺死張廷華父子。并鄰民七命。合寨牛馬財畜。盡行劫去。虜掠男婦四十餘人。隨統鄉兵趕退。口稱不日打關破府。此關近乾溪三里。離府止三十里。又據石阡司呈報。播目四牌謝朝俸。石辰三。於本月二十三日。統兵千餘。割營崖門。揚言集兵過江下埽水口崖。抵本莊樂橋軍民屯寨。上劫思石府衙偏橋等處。各緣由。到道呈報。本部院看得馬頭山偏刀濫泥山崖門等處。俱係思石二府所屬地方。今播目集兵割營淘壕。路。又聲言過江打關破府。其中包藏狡不可測。先該本部院查得石阡府未見設將增兵。隨經咨移貴院調發分布。未見回報。在龍泉司僅有額兵一千。近議新召二百。又未募完。本部院屢行每處用兵三千隄備。未見如何安設。今石阡地方濫泥山居民。已被夷兵燒殺搶虜。此地去府只二三十里。并無官兵堵截。止有鄉兵趕退。疏虞可知。卽今防範正宜加謹。乃二府地方泄泄如此。萬一誤事。責將安諉。除檄行總兵官。并思石二道。查照

屢行隄防外，應合移咨。爲此合咨貴院，煩請即便查照，轉行該司道府及總兵官、思石將領等官，督率部兵將各該所屬地方，日夜加謹防守，不許時刻懈怠。仍不時遠偵聲息，以防不虞。如遇賊出，各該將官軍兵相機堵截，毋得輕躁，爲彼誘入。該府濱江一帶，既係通播要路，尤宜集兵把守，毋容越過延蔓不便。其各該緩急，應添設將兵，煩查原議，上緊調發分布。即今會疑畏日深，防禦事宜，務須戒嚴所司，以防衝突。幸勿遲緩。

### 咨廣西調兵

爲緊急軍務事。本年八月二十七日，准兵部咨該本部院，題爲循例請設兵將，以重事權，以資戰守事。本部覆議，今應比照先近申明事例，調用浙江、福建、陝西、雲南、廣西兵將，俱聽其便宜調用。文至各鎮，即日依行。毋容緩誤。但須臨機酌量調取，務求停妥。查其真實可用，而後調之。或氣習脆弱，不可恣調，以貽日後撤兵之害。雲南巡撫會同總兵沐叡，糾合義旅，選委慣戰將官統領。於貴州地界，邀會廣貴各兵，覆其巢穴。廣西總兵陳璘，馬上催促由湖廣取道，直趨粵西聽援。不許繞路粵東，有誤纓冠之義。其餘前項之兵，果有安家銀兩，俱聽該鎮借給。即行川湖補解。行糧計日給發。一切軍興廩費糧餉，督臣徑自議處。通行各鎮省督撫衙門，一體遵照施行。等因。覆奉聖旨：該鎮督撫新設事權，宜重云云。除欽遵外，看得播酋自攻陷綦江縣城之後，惡逆愈張，叛形日肆。即今川中雖調集漢土軍兵，爲數頗多，其強弱之勢，難以顯言。今既題請，特以貴省兵馬調用，應合移請咨發。爲此合咨貴院，煩請查照欽依內事理，速將素慣戰征

勇健精兵挑選一萬名。令見任驍勇將官。或廢閑者一二員。刻期分隊督押。星馳前赴貴州。聽該省撫院。及總兵童元鎮分布。以資急用。其各兵例有安家及行糧等項。希照部議。覆奉欽依。於該布政司庫貯銀內。借用散給。俟川貴一一補還。希由回覆施行。往時廣中狼兵。行路多不安靜。仍乞選一風力文職。監押前來。庶免他患。尤見一體之誼。此係萬分緊急軍情。卽日出師事理。幸勿遲緩。

塘報播事

爲塘報夷情事。萬曆二十七年八月三十日。據貴州清浪參將劉效節呈報。七月初六日。本職經過東坡站。親見高岡苗人嘯聚。詢查來由。據該站官軍稟稱。時常三四十人身騎大馬。往來擡頭擡臘等寨。不敢盤詰等情。初七日。又據黃平各官稟稱。播苗聲言攻打大瓮。任地爛橋白計常甯白憂瓮口等處。初八日。又據偏橋衛指揮張拱極等揭報。偏橋司管下白泥寨苗頭李宋執竹木刻來屯報稱。播州馬兵五十步兵五百見劄翁角隆。使令擡臘寨苗頭謝保計。明來我白泥。取討過山錢。又叫我寨苗歸服。他放路過。如不歸服。卽就殺擄等語。又據軍人雷文爵報稱。播州頭目趙仕登。將涓潭餘慶起至烏江止。又自烏江起至白泥止。一帶路道。令路傍人民。砍修各寬一丈。又點兵數千。各造京青包巾。飛帶紅甲。妝扮似官兵一樣。令備草鞋三雙。米七升。不知何爲等情。本月十一日。又據平溪洞民人唐倖奇稟報。播目謝朝倖。點兵七千。各備飯米五升。腦包五斤。絲被八斤。草鞋二雙。鋤刀并鋒利器械點完。不知何爲。又據哨探楊春稟報。白泥楊七。召到苗兵二三千。本地民兵二千。將附近民房。拆起馬房一百間。候播州兵到。又據興隆衛



鄉導陳大林稟稱石勝俸身穿大紅服色在於擡頭寨阿傳家歇隨帶五十餘苗過九股糾拽各寨諸夷尚近千人等因到職看得黃平孤城偏僻四面受敵之處環列皆夷包裹近召兵六百名防守奉文減去三百實存三百與龍泉募兵二百名宣威營一百名哨兵二百名在所食糧軍人三百名總共千餘不足防守十八日又據清鎮守備史良將揭報本月十七日據偏橋衛揭稟據鄉兵莫六文大昆走報鷄婁山許五奔稱惡苗千餘鳴鑼張旗攻打本屯放火鄉兵對敵奈苗勢重難以抵敵轉報本衛催兵救護等情先據施秉哨把千戶侯仲爵差兵報稱播酋砍牛糾苗欲於七月十四五六日要來攻劫偏橋等語各職聞報卽稟本備蒙督同各職倒樹塞路修城挖壕各官兵整備堵截各苗見得官兵到彼漫散去訖查得鷄婁山被燒葉朝陽等二十二家殺傷軍舍鄉兵朱五等十七名口內重傷三名輕傷一十四名當卽安諭各家調治衛城幸保無虞等因又據鎮遠衛指揮尹節何天寵稟報本月十三日戌時據瓮沙住民田應高劉應魁報稱有播州楊應龍令楊七帶領百十餘人人馬到容山剝牛會話糾拽惡苗數十稱言攻打地方不知何爲等情又准鎮遠府手本據大塘哨呈報本月初十日據鄉導蔣朝忠等不次報稱先日江外前往白泥三千多苗各散回寨近日又被播酋暗差目把殺人復入容山等處剝牛會集欲打鷄婁山又打巴團哨一帶地方等情本月十七日又據施秉縣後山哨把總千戶侯仲爵揭稟本月十四日夜數百餘苗前來縣城外高聲吶喊放言叫軍民遠搬丟地方與他等語隨該本哨發兵出敵見得苗勢蜂擁舉放火器攻退看得縣城空虛兵少分布不週地方緊務稟報到職本月二十一日又據偏橋衛指揮

張拱極等揭稟本月十八日午時據本衛大洪屯軍人曹興美報稱原撫苗千戶王光祚領大洪屯田去看收禾忽被偏橋司土官楊國臣下部屬惡苗謝保藉倚播勢虜去隨經官兵追趕取回訖看得近日楊應龍親自領兵攻犯綦江四牌惡目謝朝俸石勝俸楊七楊振邊夏提調等領兵侵犯屯堡遠隔不過三十里近止二十里又邀拽九股容山狂苗多三五百名少一二百名經過官道引入白泥起圍聚兵攻打衛城欲令官兵截遏恐惹挑釁矧偏橋告急之困且夕不安等因又據重慶府駐鎮通判王三策呈報本年八月初三日據把總李朝陽稟據哨探兵楊再巧報稱鄰境地名通草塘馬路不知何人砍伐通爲大路又謠傳播目謝朝俸在於草塘地名江界河找搭浮橋四路集兵不知意欲何爲等因九月初二日又據貴州按察司帶管思石兵巡道按察使易登瀛報據思石守備楊惟中呈報密查得播地高崖所都上壩修建營房二百餘間聚劄多兵楊應龍調取各巡警赴州宰殺牛馬豬羊將綦江拏來五司七姓本頭梟示歃血同盟聲言要攻黃平龍泉思石一帶地方勢甚危急又據偵探兵謝勇報稱播酋紛紛點兵各苗聲言先掃龍泉思石復攻黃平各處苗夷如出一口并據鄉導探報播酋於八月初一日祭旗發猖初三日發兵七月二十四日楊酋差親丁叫三十六所巡警家丁上州又招拽九股生苗共兵十萬楊應龍親統黃平一路往龍泉思南又稱龍泉司治原係播州故土必要占奪賊勢甚是猖獗除呈報貴州兩院外合行稟報等因又據石阡府經歷陳廷範申稱本月初九日據石阡司巡捕吏目林中試呈據本司所轄地名水口渡住民彭希舜彭希堯拏獲播州細作一名馬良貴連人解司審據供係四川人先在石阡

充當斧手住居水口二十餘年。至萬曆二十七年正月十六日。良貴卻過江投夷頭莫老明。引見趙仕登。住彼聽差。至三月十五日。趙仕登領兵二百五十。欲得過江追擊毛守爵。先令良貴與白書兒、董政、葉貴四人預來看船。到於江邊。白書兒乘一便船過江。悔心逃訖。趙仕登續到。隔江劄營築籬。要殺過江。希舜親父彭大聰、同鄉民楊科、陳金德、張仁、隔江求和。趙仕登陽許不殺。彭大聰、楊科、陳金德、張仁四人誤聽。駕船一隻。裝牛過江餽送。不料趙仕登當將楊科砍殺。將陳金德三人拏去播州。但被殺死。意阻後日無人把江。至今八月初一日。楊應龍聽人謠言說龍泉司有兵三萬。要勦播地。楊應龍遂將四牌夷頭莫老明、趙仕登、羅廷鑾等家小。拘入播州。要出攻打各處地方。分差伊親田相公領兵三萬攻思南。趙仕登領二萬出袁家渡攻葛彰石阡。楊應龍親領三萬出烏江。亦往思石會合莫老明。預令良貴前來。仍舊看取船隻。良貴於本月初六日。乘楊奎孟金祿便船過江探聽。適遇彭希舜等撞逢。擊解是的等情。除行石阡府將馬良貴嚴究另詳。及行各將領等官。比常加謹防。外。合行呈報等因。九月初三日。又據四川按察司兵巡上川東道副使莫睿揭報。八月二十七日。據南川縣申。二十四日酉時分。據差偵探應補向金甌等四名。綠水村邊。勇張正學等報稱。蒙差前往東鄉村地名五里頭播界偵探。本月二十二日寅時分。苗兵數百。劫擄男婦李顯宗、張加爵等六十餘口。斬殺李廷讚等男婦九人。劫擄牛馬八九十隻。燒燬官廟。岡河江并天池壩胡才正房屋五間去訖。合行轉報等因。九月初六日。又據兵巡下川南道參議劉一相呈。據合江縣報稱。八月二十六日。據哨探軍兵張五、楊榮等探得。播目袁年、趙林鶴。在上赤水袁頂統兵。

劄大魚灣。又據黨正朱玉報稱。袁年令部夷各備重九斤紅絮被一牀。重六斤腦包一頂。要在二十七日點齊。趙林鶴說。九月初一日。要來下赤水。袁年處并起集各里夷兵。欲於九月十三日出來攻打。又據敍馬瀘兵備道副使李廷謨呈。據塘報李可德報稱。楊正榮領五千夷兵。在夷地溝村劄營。修統鎮所等因。又據永甯參將吳文傑呈報。九月初七日。差人探得楊酋發兵不知數目。於初一日徑渡桑木凹大河。至永甯宣撫司石寶寨屯劄。口稱先打永甯赤水。分兵攻打敍瀘納谿等處。羿兵塘抵不住。乞發兵救援。又據兵巡下川南道呈。據永甯土司守邊頭目王甫松等報稱。八月十九日。播舍楊兆龍張洪等。領兵十七營。擁將本撫緝麻山等處。盡行燒劫。殺擄男婦千口。要借路攻打貴州赤水。又據塘報雷得勝報稱。探得播目王繼先令夷人各置重三斤白腦包一頂。重九斤白絮被一牀。槍桿俱用白。限本月十三日點齊。又有領兵官王承祖報稱。楊應龍令王繼先造船三百隻。今繼先止造一百隻。篋纜一百五十圈。楊應龍又發篋纜百餘網。出婁山關等因。各報到職。看得逆酋自知惡重罪深。難逃天誅。遣發苗夷蜂屯蟻聚。川湖貴州鄰播地方。無處無賊。明欲水陸並進。恣行搶殺。大逆不道。神人共憤。除嚴行各該道將等官。督率兵馬時勤偵探。相機戰守。俟再查有無聲息。另奏外。合行塘報。

咨貴州集兵

爲緊急軍務事。節據貴州思石兵巡道呈報。播賊楊應龍調取各目赴州。宰殺牛馬。歃血同盟。聲言要攻黃平龍泉一帶。又招九股生苗十萬。楊應龍親統往龍泉思南。又稱龍泉係播州故土。要來占奪等情。又

據石阡府報稱。播酋令田相公領兵三萬。要攻思南。趙仕登領二萬。攻龍泉。楊朝棟領二萬。出袁家渡。攻石阡。楊應龍領三萬。出烏江。往思石。約會等因。又據分守新鎮道都清地方民人王老三在播走回說。楊應龍領兵來攻黃平。又據思石道報稱。楊朝棟分投出思石。婺川。龍泉等處。造船一百隻。只要攻思石。又據分守思仁道報稱。楊酋帶兵去接九股苗兵。往平越。劄營去貴州。講理倉糧。取在省并龍里等處七姓本頭。各等因。呈報部院。節經移行。申飭司道將領等官。隄備去後。爲照播賊到處稱兵。要犯龍泉。思石。思南。黃平等處。其爲叛逆。殊可痛恨。惟是調募軍兵。分布把截。最爲急務。頃接部咨。已將湖廣白蠟商稅二項。共銀一十一萬三千餘兩。滇中原借川銀內撥十萬兩。俱解濟黔省軍餉。本部院隨卽差人往滇。楚二省催發前來。外料在目下可抵黔中。既有兵食。卽可亟行調募。應合移咨。爲此合咨貴院。煩請查照。節行調募軍兵事理。速行各該堪用土司。如安疆臣。蒙天眷。獨山州等處土司。可調。或有司衛所驍健軍民。可募。通共挑選四萬。並經本院已行文廣西撫院。調取狼兵一萬。一面催到。聽總兵官及該道府會議分布。如童元鎮尙未抵任。希速差人守催。一面揀選謀勇將官。分投督領鄰播地方緊要處所分布。聽令施行。其調兵在途。行糧在川。計程每名支銀一分五釐。到營坐糧。每散兵一名。日支銀二分四釐。每月七錢二分。內除一錢一分關支本色米三斗餘支折色銀。此皆本省士兵則例。若外省客兵。仍應從厚加給。或該省別有則例。聽從便宜。但須早調齊足。幸勿遲延誤事。煩將調募過兵目分布把截地方。一併咨報軍門。以憑查考施行。

咨湖廣儲集兵糧

爲軍務事。准湖廣撫院支咨稱。該布政司呈奉文調兵三萬。預買半年糧米。計每名日給米升半。總約八萬有奇。依行辰常長衡四府備查各屬儲積倉穀磨米。可得若干。仍於司庫動銀五千兩買米一萬。共約三萬有奇。委官運貯辰沅近播地方。以待需用。餘少米石。又俟陸續湊處解運接支。至於火藥器具等項。俟查處完日。另行回報。又稱督餉專任分守湖北道董理相宜。惟軍餉無處。不得已。查將全書裁減銀米。題請復派。又請留各項錢糧。自是餉有頭緒。募調官兵。俱已行道調度。無誤事機等因。到本部院。准此。爲照播賊作亂。荼毒三藩。本部院奉命專征。要非得已。仰廛貴院集兵應敵。儲餉聽支。足徵共濟之義。但稱所調之兵。雖有四萬之上。內施州散毛等司一萬。未准議及之前。業已徵調入川。應聽此中分布。京營鎮江等兵。不知部議允否。二枝之兵。俱難算數。若楚中進攻。實非三萬以上不可。卽今見在者。止保靖麻陽土兵。鎮筵鎮溪募兵。共二萬耳。尙少一萬不足三萬之數。及查鎮麻土兵。素稱多而且勇。應於二處再挑一二萬。若二處不敷。另於有兵去處挑選。務足前數。庶克禦敵。其監軍以分巡荆西道魏參議督餉。以分守湖北道詹參政。俱各相宜。竊本部院頃將分守荆南道胡參政議加按察使。管理監軍。業經具題。所有貴省監軍。亦應查照川貴事規。額設二員。協同兼理。共攝兵務。至於火藥器具。如川中單開名色。皆軍中不可少者。與夫見貯之糧。止有三萬。計數不多。難敷半年之食。乾糧炒米烘炒薑鹽等項。俱應多備。庶免臨渴掘井之虞。爲此除行司道外。合咨貴院。煩請分投差官齎執令旗。前去保靖麻陽鎮筵鎮溪等處。各

將前擬額調漢土官兵，并本部院添調精兵共三四萬員名，責令將領與同土官目把人等，管押星馳前去沅州，聽監軍胡魏二道，與同總兵官陳璘到彼分布，近播關隘嚴加防守，聽候本部院約期進勦。如陳璘尚未到任，希照近行委原任總兵李應祥星馳前去代理，見貯糧米三萬石，亦卽行督餉詹參政督責原委監運各官，火速運至沅州，收候轉運營中聽支。其單開火藥器具盔甲等件，有者發去軍前備用，無者上緊併工添造，解發接濟。至於不足糧餉，與夫乾糧等項，本折軍需價銀，既經具題，諒必兪允，亟宜先行動支，應分投收買者，一面責成收買，應轉解聽支者，一面發去聽支。此在督餉道一力經理，以佐急用。蜀中兵馬已逾十萬，日費甚夥，稍延兩日，卽費萬金。本部院卽目移駐重慶，決策徂征，大舉之期，不出今冬。矧貴院兵糧既有頭緒，夾勦殊不爲難，惟祈迅速，庶克有濟，幸勿遲緩。

### 塘報夷情

爲塘報夷情事。萬曆二十七年九月十一日，據貴州分守思仁道報，據思石守備楊惟中報稱，有國夫敖迎鑾在播州修國回說，曾子楊朝棟背生癰疽，差人修砍大路，直抵錫落哨。楊應龍領苗兵要攻思石黃平，又據鄉導李瑕報稱，楊應龍喚取各夷頭巡警苗獠家小上州。八月初六日點兵，初八日歃血酒估，木刻楊應龍帶兵去接九股苗兵一萬，說要攻打黃平，挾擄羅安撫往平越割營，親赴貴州講理豐濟倉糧。又說貴州城內并龍里等處，挾取七姓本頭等因，又據分守親鎮道報稱，差兵宋仲義報被播目謝朝俸統苗，將柘木山把截苗王老五、丁鐵匠等家，盡擄男婦三十餘口，綁去王老五、老三、老七、三人，鎖至謝朝

俸家空房內。當有兩箇客人去報謝朝俸說。黃平新築高牆。內外挖壕。各處劊兵。要來殺你。謝朝俸聽知。欲來攻敵。至夜。王老三等走回報說。四牌見有兵十七營。楊朝棟於八月十二日起馬。十七日領兵來攻。黃平等因。又據思石兵巡道呈。據把總冉文燦報稱。楊會差夷目羅阿賓等。夷都引屯包拽家小上。閏八月初八日。剝牛敵血。初九初十二等日。發兵往五司。楊朝棟造船一百隻。要分投出劫思石。婺川龍泉等處等因。又據永寧參將吳文傑報。據赤水衛申稱。播酋統兵二十七營。各擡舡隻。篋索。出劫永寧。宣撫司雷鳴鎮等處。聲言要借路攻打永寧赤水。在於白羊坪劊住。又據永寧宣撫司申。據守邊頭目王甫松報稱。播兵由大紅關箐小路。各執布撚擁出。攻趙渡河後宅大小鹿鄉等處地方。隨集羿兵對敵。殺死播賊十三人。奪獲鞍馬絮被四十餘件。又據永寧衛申報。探得楊會領兵屯劊宣撫司石寶寨。花毛田等處。口稱要打永寧赤水。攻打附近敘瀘等處等因。十二日。又據兵巡上川東道報。據偵探營兵報稱。綦江縣鄉兵高仕偉。糾集鄉勇將播苗殺死三四十人。懼其報仇。高仕偉逃躲不知去向。又南川縣鄧坎村章文寶。糾集鄉勇殺死播苗四五十人。原村余早。糾集鄉勇殺死播苗五十七人。其南川鄧坎桐槽紅篆等寨鄉民。殺牛飲血。誓與播苗對敵。除查明另報外。等因。十三日。又據貴州分守思仁道呈。據守備楊惟中報。據偵探官兵報稱。楊應龍起集大兵。於八月十六日。自播州起身。由黃平葛彰司到石阡府羅應屯。取擊五司七姓本頭。楊朝棟領兵由龍泉到思南。又目把何從良巡警朱敬等。由偏刀水出錫落關抵龍泉。聲勢甚是狂大。等因。十七日。又據防守合江遊擊楊敏政報稱。探得播兵到於永寧土司地名後山等處。盡



將地方燒劫，捉擄男婦，不知其數。土司羿兵與賊對敵，殺死播賊溺水者，約有三四百人。卽今播賊越過趙渡河，要來攻打石寶等寨，聲言徑由箐口衝出合江等因。又據總兵萬龍揭據防守瀘州參將王夢吉報稱，偵探播酋造舡百餘，每隻可坐百人，篾纜無數，大如茶鐘等因。又據敘馬瀘道報，據楊敏政移稱，差兵趙仕先探得播目王繼先，見在修囤置造槍刀，要買鐵，又造小舡百隻，每隻可渡二十餘人，岸上堆積舡板數百。播州令何提調封刀一把，馬一匹，盤盞一副，與袁年砍路造舡，說要出合江一遭等因。二十日，又據守東道呈，據南川縣申，據東鄉村邊勇張仕端等報稱，九月初八日，被播苗蜂湧圍村，燒毀房屋四十餘間，擄去男婦人口，難以盡記。各等奮勇敵殺苗子七人，當被搶去。後有播目寫招帖，叫我等降播，如有故違，督領大兵勦殺不饒等因。各轉報到職，除嚴行各該道將等官督率軍馬相機戰守，不時偵探，俟再有無聲息另報外，合行塘報。

#### 咨湖廣備兵

爲軍務事。照得征勦播賊事宜，業經本部院備將湖省應調集兵馬，應買運糧餉，與應修製器械，并分布戰守各緣由，移咨貴院，行令布政司會同按察司，并辰沅湖北等道，作速挑選漢土精兵四萬應用。行月二糧，就將部議應解蜀省銀一十六萬有零，不必解蜀，留在楚省，充作前項兵糧，并請照近日會題，應調揚州鎮江等處，及本省饒健土兵，徑自差人前去徵調，赴楚分布去後。今照川貴兵糧大半畢集，日費本折糧餉不止數千，祇候陝浙雲南等省官兵，目前到川相機舉事，惟湖省兵糧屢次行催，迄今全無音耗。

該省偏橋鎮遠清浪平溪等處，皆係信地，川兵多將廣，一時擁聚重瀘合江平越養龍等處，地狹難以棲割，若分布四散應進之地，又恐該賊疑畏，若有衝突，偏鎮一帶將何阻遏？軍機所系，似難再緩，合再移咨。爲此合咨貴院，煩爲照依節行，速催布按二司及該守巡兵備等道將原行應調集漢土軍兵四萬，并揚州鎮江等兵，不次差人分投催調前來，如新設總兵陳璘已奉俞旨，想在目下到任，如尙未到，且暫另委將官統領，分布於鄰播隘路把截，聽令進攻，其行月二糧，希速行司將應解川銀一十六萬有零，并通省應堪動銀米，隨宜解運。若盔甲槍刀弓矢銃礮等件，卽今造完各若干件數，如未完者，必爲嚴立限期，比併速造。前項事件，准在冬初一一辦足，以便約期行事。少有一事未齊，難免牽滯，三軍日食甚夥，早得一日行事，得省一日之費，幸勿再緩。先將調到軍兵運積糧餉修製器具各數目，希由移送軍門查考。

咨湖廣撫院移駐沅州

爲緊急軍務事。案查先准兵部咨，已經備移貴院，希將應解蜀銀，令留楚用。若無見在，無論通省正項糧銀，并應堪支者，勦支調集精兵四五萬，并應買糧餉運於鄰播地方，及將揚州鎮江等處營兵徑爲催調去後，又經歷次徑行該司道，迄今未知前兵調集共有若干，糧餉買運若干。斯時蜀黔兵糧大有次第，惟楚中司道泄泄延緩，事事遲備。近日又准兵部咨，爲敬陳戡播未盡事宜等事。本部覆御史涂題內稱，平清偏鎮等處，乃入黔要害之區，雖設總兵，而無與於餉，且白泥飛練，正播門戶。本部移文貴院，照各邊巡撫移駐防邊事例，移駐沅州，選將練兵，督運糧餉，務要兵精糧足，聽總督調發舉事等因。適與本部院具

題意合業已移咨訖。今照本部院即日移鎮川東。督催文武將吏舉事。所有楚省兵馬相應一併齊發。今准部咨移鎮一節。理合再行爲此合咨貴院。煩爲作速建牙沅州。以速全省兵糧催饋。其揚州鎮江等兵。再煩差人前去守催星馳至楚偏橋等處分布。移駐日期。先行回覆。幸勿遲緩。

### 咨貴州徑催雲南兵

爲緊急軍務事。本年十月十二日。准雲南撫院陳咨開。應調赴川應援官兵。今只約調漢土官兵六千餘衆。戰馬千餘匹。應用犒賞衣裝行糧米菜。與製造軍火器具等項。大約該銀一萬三千二百兩。除犒賞與軍火器械。共該銀一千餘兩。自行措辦。其餘無從處給。查有原議助黔抵還川餉銀兩。除解過五萬兩外。餘二萬七百七十五兩未解。只得於此項動支銀一萬二千一百八十兩。應給前項。此只可起行衣裝及一月行糧之用。一到川營。便當川省本折二色接濟。合咨速行布政司備辦糧草。於分布處所聽給。其借支解黔前銀。卽行川省照數就近解補。仍移貴州撫院知照。如川省糧糶處給可足。卽當再發精兵二千。共可一萬之數。先由回覆。以便發兵等因。移咨到部院。爲照滇省兵馬原擬調到。發貴州防勦。今旣發行。相應移知備餉。除移文雲南撫院。卽日起發前來外。合行知會徑催。爲此合咨貴院。煩請查照。差官速赴雲南。將前項已整兵馬八千或調足一萬。責令該管將官督率徑赴黔省分布。俱不必到川往返。其入黔到營本折糧餉。責成該司道作速預爲備辦。聽候兵到於分布處所照例支給。幸勿遲誤。希將兵到日期。咨覆軍門。以憑咨部施行。

塘報播事

爲塘報夷情事。萬曆二十七年九月二十三日。據貴州守巡貴寧道呈。據永寧衛塘稱。播酋楊應龍分兵十八營。將宣撫司內宅地方攻打。該司目魁王甫松。見在點軍把截。尙未過河。又據赤水衛呈。據白撒所申報。播酋發兵二三十營。每營抬舡十隻。要借路過前去攻打赤水畢節永甯。及往敍瀘納谿燒糧。十月初二日。又據敍馬瀘道呈。准參將吳文傑移。據永寧宣撫司申報。楊應龍預令邊目羅岡等。打造河舡百十餘隻。篋纜百十餘條。統兵劄在邊界。揚言要打石寶等處。近抵永寧。又據防守五畝堡指揮王繼祖報稱。探得楊應龍牌差夷目楊總營前來上下赤水。令上赤水夷目袁謨。帶信與下赤水夷目袁年。叫備下緣腦包紅絮被。在二十八九日要齊。又據兵巡下川南道。及防守遊擊楊敏政各呈報相同。初六日。又據分守川東道報。據播酋差游應朝等八人入境。託名進表。實探軍情。已經差官押解資陽簡州。監候聽處。又據萬總鎮報。據哨官鄧朝相於綦江地界盤獲播人顏京。王先賢。楊瓊。及隨行辛受。王奇。七老。六人。稱係楊應龍差往各衙門投文。隨與萬總鎮史參議會議。播酋旬日之內。兩次差人往來。狡詐莫測。必有覘探隱情。發仰巴縣暫羈聽處。又據楊敏政呈報。九月二十九日。據播州下赤水里夷目袁年。差通事王朝寵投稱。本月二十四日。本司遣火牌一面。差委到里。操點丁山小溪仁懷赤水等里軍士。衣甲軍器戰馬。聽候親臨調用。初八日。又據貴州清浪參將劉效節報。據興隆衛申稱。播目五十餘人。身帶長刀。徑往九股。邀拽苗兵數百人。播將白田堡軍民劫擄一空。有哨兵張林田保等。奮勇斬獲首級三顆。殺傷二十餘

人十月十八日。又據兵巡下川南道呈。准副總兵曹希彬報稱。探得上赤水袁頂。差人謂袁年至紅巖會話。又有一楊委官。隨帶有部兵五十。不知所行何事。一董委官。一行十人。於九月二十八日。往仁懷里去訖。又據永甯宣撫司長官陳希儒報稱。播酋要於十月初三日。親督苗兵數萬。由高洞赤水直抵合江。欲犯內地。二十五日。又據下川南道呈。准參將吳文傑手本。據永甯宣撫司報稱。探得播寇統兵三十七營。止將三營見劉找巖。修圍餘俱退。劉花苗田。又稱楊酋另統苗兵六十營。專要來打合江。二十六日。又據敍馬瀘道呈。准副總兵曹希彬都司吳從周移報。探得楊酋差官三人。帶兵不知其數。前來仁懷里。與夷目袁年等。各要兵一千。要犯合江。又令各兵把截報口。不許放人出入。又據敍州府安邊同知李廷謙呈。據永甯哨領兵官彭泗報稱。探得楊酋統兵三十餘營。劉高洞仁懷夾口等處。聲言攻打合江一帶。又據永甯參將吳文傑申。據永甯宣撫司守邊目把王甫松報稱。探得播酋差提調蔡丑兒。領兵數千。抬舡百十餘隻。要行暗渡過河。是甫松等加兵堵截。二十七日。又據駐鎮黃平通判王三策呈報。探得楊酋自碁江回。拒立險圍一十七箇。修挖塹坑。令楊七楊總管統兵。割住白泥。糾拽九股生苗共一百九十八寨。出入東坡官道。劫擄軍屯。人民受害。又聚集各寨夷頭。大張聲勢。將杜橋等寨包擄去訖。殺死張大張三二命。但黃平城池。雖調有官兵。恐彼衆我寡。難以抵敵。十一月初二日。又據總兵劉挺呈。據防禦南川遊擊王之翰報稱。眞州民張廷瑞墨帖飛報。楊應龍統兵出關。數多。不知何往。又據縣民楊巨賓楊坤。探得楊酋點兵三萬。令兵各備乾糧七日。竹簽二根。又據兵快吳正東楊傑報稱。探得楊應龍委於十九日發軍。

數萬、每兵備乾糧七日、又在土平甯溪取牛五十隻賞軍、及差頭目帶人五十、在黃桑壩起軍、其真州土官鄭葵、避住婺川、鄭紹德、逃往貴州、駱齡、避豬羊台、并百姓攜男帶女、搬出南川各處去訖等因、各轉報到職、除嚴行川貴各該道將等官、督率兵馬相機戰守、不時偵探、俟再有無聲息另報本職、仍一面移駐川東重慶地方、就近調度外、合行塘報。

咨催福建廣西解餉貴州

爲播酋外逼貴筑等事、近准戶部咨、准兵部咨、該兵科都給事中張題奉聖旨、兵餉著料理實濟急用的去、欽此、抄出移咨到部、查得貴州募兵糧餉、節該本部題取雲南銀二十餘萬、湖廣銀一十一萬、福建銀一十萬、廣西銀一十萬、俱嚴行速解貴州軍前支用、各該衙門、自應如數速解、共濟艱危、況福建廣西銀兩、皆係見在實數、科臣張條議前因、相應再行嚴催、合候命下移咨福建廣西各巡撫、督催該布政司將庫貯銀兩、差官、如數星夜解赴貴州交割、卽有不敷、必須多方湊辦、如若推諉稽延、致誤軍機、聽貴州撫按指名題參重治、仍咨四川督撫知會等因、題奉聖旨是、這銀兩著便行與各撫按嚴催解赴貴州應用、不許推諉稽延、致誤軍機、欽此、移咨到部院、案查先准戶部咨開、福建、廣西、湖廣、雲南、各省協濟貴州前項銀兩、隨經移文貴州撫院、差人徑赴請發去後、在湖廣雲南俱已解給貴州、惟福建廣西前銀、候久未見解發、今准戶部咨查前餉、合行差人請發、爲此合咨貴院、煩請軫念貴州兵馬畢集、勦播任邇、卽速檄行該布政司、查照本部節次題請奉旨嚴催事理、將庫貯銀兩湊支十萬兩、差官管解貴州軍前交割、以濟燃

眉仍責令差官星馳前去、勿得在途耽延、有誤軍機、希將起發日期見示、以憑咨部、此係數萬兵馬、竚待需用緊急軍務、一有脫巾之呼、彼此俱屬不便、料貴院體國恤鄰之心、當必有倍萬恆情者、幸勿遲緩、

### 咨湖廣再備糧餉

爲緊急軍務事、近准貴院咨稱、楚省已調漢土官兵四五萬、合用本色糧餉已有三萬石、俱運偏橋等處聽支等因、准此爲照興師征討、期已逼迫、今川貴應運糧餉頗有次緒、第楚中僅止實糧三萬石、若以一兵日給一升、止足前兵五六十日支用、將來師期既難底止、不免有庚癸之呼、查得湖北一帶應徵大糧、設若比照川省改徵本色、連赴軍前、及將各州縣見貯在倉稻穀、亦行碾米、通爲運赴、似得濟其急用、未知貴院曾否有行、爲此合咨貴院、煩爲轉行該布政司、並湖北守巡等道、將湖北一帶應納大糧、改徵本色、徑運偏橋等處聽支、或再將各州縣在倉稻穀、急令碾米、畢集此中、須足四五萬兵數月食用、庶兵食兩足、得免脫巾之虞、此係三軍急需首務、幸勿遲緩、希將發運實數、回覆查考、

### 再咨湖廣催軍餉等項

爲緊急軍務事、近准貴院咨、准本部院咨、督行湖廣布政司呈議偏橋等處、征播官兵、應用三萬日支糧餉、移行辰常等府查備、并於司庫動銀買米一萬、共約三萬有奇、委官運貯、以待需用、餘少米石、陸續湊買、軍火器具、見在查處等因、備咨到本部院、屢行移將該省兵馬四五萬足支數月餉米、作速買備、及查議湖北一帶大糧、改徵本色、或將各府州縣倉穀碾米、再運軍前、并調漢土官兵、與合用乾糧炒米烘炒、

魚鹽薑蒜及將軍火器具另開一單查酌製造務足數萬軍兵支用去後未知司道會否肩承料理今照師期逼近川貴諸務盡備只俟楚中兵餉器械實音一至即行分布茲東南兩路雲集兵馬每地幾萬無處屯劄欲進爲難應合再咨爲此合咨貴院煩請查照先今咨內事理希再差官前往保靖麻陽鎮軍鎮溪等土司并近調永順各將前擬并本部院添調精兵務足四萬責令各土官統領馳赴沅州聽監軍胡魏二道分布至於見貯餉米三萬即行督餉道責成分運各官火速催運沅州收候轉運營中聽支其前發單開軍火器具等件見有者希爲發去無者晝夜打造不足糧餉與乾糧等項折色軍需必在今冬各備完起運聽支此係萬分緊急三省約會舉事軍機所關幸勿遲緩仍將各項兵餉器具齊足數目陸續咨覆查考

咨湖貴整備兵糧聽候舉事

爲軍務事照得蜀省兵糧久已盈集師期計在目前所有分布機宜亟應計定庶便責成今楚中先後徵

調漢土官兵運貯本折糧餉修製軍火器具各該司道經承半載月日已久諒必備具第入播道路歧徑甚多未知貴院酌以路分幾路兵分幾枝領兵偏裨將領等官作何統督均當預定妥確以一戰守爲此合咨貴院煩查征播進兵道路總共若干漢土官兵分爲幾路進攻某路應用某處兵馬若干委何將官統領某兵強勁當爲先鋒某兵稍次當爲殿後某爲左右應援某爲登高遠哨強者定爲衝鋒稍次者定爲後應弱者留爲守城作速責成道鎮分布明悉只候約期舉事再照師行糧從軍中急務楚省糧餉即



今運積者、見委何官監收、貯在何處地方、若轉運營中夫役、或派於里甲丁糧、或動銀召募民間、與原行預備乾糧、烘炒炒米、魚鹽薑蒜之類、斯時各已買備若干、均希一一細開回覆、此係三省立待約會大舉齊進事理、幸勿再緩。

### 咨固原甯夏榆林買弓箭

爲軍務事、照得征討播逆師期逼近、所有軍前急需軍火器具、蜀中雖委官無分晝宵監造、尙多未就、近據總參等官面稟、臨敵長技、惟弓矢爲最、而弓矢強勁、在陝中爲良、只有甯夏甘肅固原三鎮弓矢健利、足堪戰陣、隨行布政司、會同監軍道議得甯夏上號弓五百張、每張價銀六錢、共該銀三百兩、上號箭二萬枝、每枝連鐵頭價銀三分、該銀六百兩、甘肅上號弓五百張、每張價銀七錢、共該銀三百五十兩、上號箭二萬枝、每枝連鐵頭三分、共銀六百兩、固原上號弓五百張、每張價銀七錢、共該銀三百五十兩、上號箭二萬枝、每枝連鐵頭三分、共銀六百兩、應動官銀、委官領解前去收買、隨買隨解、不必候齊等因、前來批行依議去後、爲照前項弓矢、司道所議雖經差官買解、第酌定價值之低昂、辯驗弓矢之真贗、似難取憑、必須仰藉貴院委官協同代買、庶克有濟、亦免愆期、又查軍士用箭、或止中號、未必用上號之價、亦須貴院酌定價值、貨物相當、乃無浮冒、爲此合咨貴院、煩請查照定委文職或武職官員、同差來委官、將解來前銀、代爲收買、上號弓五百張、上號箭連鐵頭二萬枝、若價有賸餘、通儘收買、若價值稍增、隨便酌處、倘彼中倉卒無見賣者、請將該局并營伍中見有者、留其價值、照數發來、以濟急用、幸勿遲緩、希將收買

數目見示查考。

咨湖廣防犯

爲緊急軍務事。照得川中征播兵糧業已畢集。惟楚中事體尙未大備。深爲可憂。乃逆賊自知天討必加。擊兵四出。不日暗攻南川。則曰要犯重慶。形迹大彰。勢必一逞。本部院卽目建重慶誓師。將先懸賞後進攻。倘或逆賊知其必死。先發制人。拚命衝突。在川中兵馬足當一面之寄。在烏江等處。亟宜多方布置。以遏其鋒。偏橋等處兵馬糧餉。尙無信音。將何堵截。萬一乘虛長驅。致誤事機。各將誰諉。合再申飭。用保無虞。爲此咨貴院。煩請督行監軍二道。卽日移駐偏橋鎮遠一帶。會同辰沅兵備道督同參備王之臣等。一面將先調鎮寧沅靖鎮溪等處官兵二萬。分撥隘路。整擻以待。一面將續調麻陽浦黔新化永順等處土兵二萬。作速差官分投催餉。前來合營分布聽令。賊如不動則已。如或衝突。則併力夾攻。務使斂迹歸巢。毋容滋蔓爲害。一面速備乾糧烘炒諸物。俟本部院約期進兵。共成大舉。幸勿違誤。

咨貴州防犯

爲緊急軍務事。照得川中云云同前。爲此咨貴院。煩請督行漢士領兵將領等官。速將所部兵馬及軍火器械衣甲等項。整頓停當。分發隘路。劄營時刻。加謹防守。差人偵探。賊如不來。則蓄精養銳。以防衝突。賊一入犯。則併力擒斬。以挫其鋒。務須進止慎重。毋爲狡賊深誘。仍嚴行速備乾糧烘炒等項。聽候令到進攻。諸凡緊要機宜。諒貴院自有石畫。毋容多贅。

咨貴州督勵安疆臣擣巢

爲飛報萬分緊急地方事。本月初六日。據貴州布政司呈。據防禦黃平指揮徐登階稟稱。十一月十九日未時。探兵李孝夷頭阿保等各報稱。播兵數萬。由白泥出小大章劄營。又由構皮灘過渡。出苦菜坪。到白泥劄下。又報播苗在興隆擡頭坡。劄三大營八小營。今又發探馬來。黃平長冲哨探。有大翁鋪軍民驚慌。搬移等語。查得各報兵情。如出一口。且黃平在播巢之中。防兵五千。衆寡不敵。事勢燃眉。伏乞速令安疆臣遣兵由沙溪入播襲後。庶興隆黃平之急少緩。同日又據按察司呈。據興隆衛東坡堡軍人李萬等飛報。播兵數萬。徑出後洞圍殺白田乾溪水口黃眼等屯。燒擄人口房屋。卽令糾合容山九股等處叛苗。攻打興偏黃平東坡爛橋。又執木刻上寫把總隆諭興隆通衛官民。吾今督兵數萬。追尋奸徒。馮權張熹。何以爵等。爾等早爲發出。以免刀兵。執迷不發。玉石不分等語。卽今屯兵離城五里。上阻重安。下拆偏橋。中攻興黃。徑通九股。以爲大逆。請將發兵救援。又據監軍道張參議呈報相同各等因。到部院。據此。看得播賊楊應龍不知滅在旦夕。尙且聲兵四出。爲計愈狡。積罪愈深。及照水西宣慰司兵精將勇。甲播萬倍。本部屢有祕計。令宣慰安疆臣母子與人等就中取事。向未見動。未審因何觀望若此。卽今兵出黃平。內必空虛。若能率兵數萬。暗由沙溪直衝腹心。以襲其後。賊必首尾不救。勢必成擒。翠庭埽穴。功收此舉。合再督勵。爲此咨貴院。煩請轉行宣慰安疆臣。整兵數萬。督同目把人等。親自統率。徑由沙溪直進。或擣其巢。或襲其後。則黃平之虞可解。虎狼之雄可挫。第恐本官觀望不前。須藉貴院嚴督之。俾知建立。幸

勿遲緩。

再催湖廣官兵

爲緊急地方事。本年十二月初十日，准貴州撫院咨，據都清兵巡道呈，據興隆衛申報，播兵攻圍東坡，聲言攻打興隆黃平衛所。又據分守新鎮道呈，播賊將東坡等處攻殺，合兵割營於十里橋，阻塞偏橋鎮遠，音信不通。該衛士民，慌惚無計，乞發湖廣四萬之兵，卽日出偏橋夾攻等因。到部院，看得播賊楊應龍，因見川中兵馬畢集，自知誅不可逃，乃又糾九股叛苗，劫害東坡震及偏橋鎮遠一帶，實因湖省官兵未集，糧餉未備，狡賊窺知，因而乘虛披猖，其爲奸詭，深有可虞。所據黔省催發援兵，應合再行咨催。爲此合咨貴院，煩爲查照節行事理，轉行該布政司，將四萬官兵日費本折糧餉，除前詳呈報糴買并碾運倉儲三萬石，一面移行督餉道運赴相應地方收貯，聽候轉運外，其不足之數，卽便區處，或將湖北倉穀再勸碾米，或查全楚庫銀湊發，火速買備，折色銀兩，解赴軍中聽支，仍催監軍二道移駐偏橋鎮遠，會同辰沅兵備道，將原報調到鎮筸沅靖鎮溪等處官兵二萬名，分撥隘路，加謹阻遏，俟各兵齊備，卽目三省大舉行事。如或播賊仍在偏橋東坡地方，聽該道督率將兵相機撲滅，仍一面差人將續調麻陽浦黔新化永順等處土兵二萬，及近日烏羅長官差人具冊報效土兵二千名，分投催償，前去偏橋一帶割營，聽令併力進攻，務要刻期到彼，不得仍以空文支吾。一應軍火器具衣甲等項，造完者作速起解營中分發，未造者，上緊製造。此係播賊攻劫東坡偏橋信地告警軍務，文到卽日差官催促分布，幸勿再遲。

### 催湖廣官兵同黔兵併力舉事

爲緊急軍務事。據貴州監軍道呈稱：東坡興隆、實楚黔必爭必守之衝。今播九股苗復屯五里橋、睥睨興隆。我兵嬰城固守，官道何時通，坐困何時解。意合土兵鵬勦，應於東坡通衢劄營拒敵。仍乞嚴督湖廣辰沅各道，調發楚兵督陳總兵領赴偏橋，則三處之兵聯絡策應，興隆黃平之勢不孤。官道血脈無虞於梗塞矣。等因。具報到部院。案查頃准貴州撫院郭咨稱：播夷糾合九股攻劫東坡，震動偏鎮。軍民慌惚，晝夜不安。請發湖兵四萬守偏橋一帶，以便三省合力進勦。等因。咨報軍門。隨經移咨貴院，督行監軍二道及總兵陳璘，催發土兵，并行布政司查照節行買運本折糧餉，與夫軍火器具，解發軍前聽支。去後。今據前因看得播賊明知川中將兵已集楚中，偏橋兵力單弱，故爾糾苗攻劫東坡，以及偏鎮，不過乘虛入寇計耳。今貴州欲斷苗患，議行鵬勦。湖省既有信地，法當犄角相援。乃屢督設備，更無音耗。萬一地方有失，責將誰歸。今據前因，合再咨催。爲此合咨貴院，煩請查照履行事理。差人分投守催原調各土司土兵四萬名，星馳到偏鎮地方分布。仍差人催趨監軍二道，及總兵陳璘，卽日移駐彼中。會同辰沅兵備道整搦漢土軍兵，或貴州官兵，併力舉事。仍行該司將本色食米折色銀兩，照依節行一一買運適中倉庫收貯聽支。此係萬分緊急，不可再遲事理。幸勿延緩。仍將兵到及運發過本折糧餉，一併咨報軍門查考。

### 咨貴州整兵進勦

爲軍務事。准貴院咨報稱：烏江河渡二關官兵失事緣由，前來隨經移行貴院，一面備查殺傷官軍，以便

查參一面收斂潰敗殘兵、以資戰守。去後、連報烏江之失、乃不戰之過。蓋官兵背水結陣、其勢在我。賊如不來、則按兵不動。設若一至、則併力一擊。所謂置之死地而後生也。奈何不察虛實、誤疑賊兵赴援。昧背城之戰、乏賈勇之能。先自望風逃竄、致賊乘勢追擊。坐取大敗、辱國損威、深可痛恨。除失事文武、已行查究外、及照見兔而顧犬、未爲晚也。亡羊而補牢、未爲遲也。方今各路俱已入關、直抵白田壩。兵將驍勇、糧草雲屯。滅此小醜、勢如拉朽。所據該路兵馬、雖有此失、自當逢凶化吉。因敗致功、不宜灰心。致沮士氣。及湖廣總兵官陳璘、卽日起程移駐彼中。會同辰沅兵備道、將原調各該漢土軍兵、加意整搦。會同貴州各哨官兵、併力相機舉事。一面速行該司、將坐派本色食米、及折色銀兩、照依本部院節行事理。一一速行收買。選委能官督夫運、赴適中倉庫。如法收貯、聽候接支。毋致臨期缺誤。此係萬分緊急軍情、幸勿視爲泛常遲緩。仍將各該兵士開列花名、及到信地日期、與催運過本折糧餉數目、希咨回報軍門、以憑稽考。統勿延緩。

申飭湖貴加謹防護輿偏地方

爲萬分緊急地方事。本年十二月十六日、據貴州左監軍道按察使楊寅秋呈、蒙巡按貴州御史宋批、據防禦黃平清浪參將劉效節呈稱、十一月二十七日、據上塘堡哨探屯老周喬兒報稱、二十五日、有鮚底野洞高坡各寨叛苗、於破塘寨馬場剝牛講話、點集兵馬。說播州發大兵已到四牌、准在初二三來打黃平與隆偏橋地方。劄營拒截官兵、免入其內。連日各寨建立大囤伺候進兵。又據土舍羅承德稟稱、草場

有一人先被播兵擄去。今隨播州郭總鎮來四牌。點兵逃出。說四牌已將攻城器具齊備。初間准來會九股并鮮底等寨。攻打城池等情。請乞添兵固守。庶免臨時緩不濟事等因。蒙批事已危急。監軍道速議行。蒙此。該本道移會思石下路右監軍道張參議。并董總兵查行外。合先呈報等因。到部院。看得播賊楊應龍。自知天討難追。整點兵馬。拚死衝突。勢所必至。故本部院不次申飭。正防此舉。今觀欲犯黃平與隆偏橋地方。不過明欺彼中兵力單弱。斷然一逞。所據戰守二端。在今日不可不奮力堵截。共保無虞。爲此合咨貴院。煩請卽行二監軍。并辰沅兵備等道。及總兵陳璘。各駐劄偏橋新鎮思石等道。及總兵童元鎮。各駐劄興隆黃平。嚴謹關隘。防守城池。整擄兵馬。多方哨探。賊如不來。則常川操練蓄銳。以待設或入犯。二省官兵。毋分爾我。左右前後。必須夾攻。彼此遠近。務要應援。期於功收一戰。計出萬全。如或逗遛不前。致誤軍機者。責有所歸。此係賊勢萬分緊急事理。慎勿遲延。

### 咨覆湖廣

爲軍務事。近准湖廣撫院支咨。准本部咨。差委雙流縣知縣鄧宏烈。調取施南忠峒散毛塘崖等土司土兵前來彭武一帶分布等因。該本部檄行守巡上荆南道將施南等兵。挑選七千餘名。行委廣東參將王一桂統領。俱由巴東至夔府赴涪州屯劄聽令等因。移咨到部院。案查節據貴州監軍各道呈報。偏橋鎮遠一帶屯堡。被賊燒劫。見在興隆東坡等處屯營未退。阻絕三省運道。思石一帶地方兵力寡弱。不能爲犄角之勢。以聲援偏橋興隆之危。已將前項施南等兵牌。行領兵知縣鄧宏烈等遵照。隨據本官呈准施

州衛開稱官兵行糧則例議詳列款前來。業經本部院酌定以指揮一員、川例日支銀九分、准加倍支一錢八分、千百戶每員、川例日支六分、准加倍支一錢二分、宣撫每員每日照川例准支二錢四分、安撫每員、川例日支二錢、應襲舍人每名日支六分、頭目舍把武生親舍每名日支五分、提調、旗甲、書算、班頭、押陣、官醫生、軍伴、門阜、吹鼓、大小頭目、銃手、家兵、伴當、軍牢、各色匠役、殺手等項、及士兵、姑照川例坐糧每名日支二分四釐、其衣糧安家之類、川中從來無此例、但該衛士兵比之本省頗遠、姑每名量給銀五錢以示寬恤之意、俱經備行夔州府動支、差官解交知縣鄧宏烈、眼同各土官鑿鑿散給各官兵收領、令其馳赴思南府駐劄、聽令分布外、今准前因合行回覆、爲此合咨貴院、煩爲查照、作速差官催償各兵、兼程徑赴思石、聽貴州監軍道分布、其湖省行糧不必重支、若已支給、仍照數扣回、以免混冒、幸勿遲緩、仍希回覆查考。

咨湖廣支銀協濟貴州

爲夷氛甚惡、天討宜彰、懇乞急發餉銀、以佐軍餉等事、本年十一月二十三日、准戶部咨該本部院、并湖廣兩院各會題前事、該本部院看得播酋肆逆、楚屬貴筑、勢相唇齒、震鄰剝膚、禍漸延蔓、屯師集餉、俱應豫待、今該督撫諸臣并議上請、不分彼此、深得同舟之誼、顧蜀欲五十萬、楚欲三十萬、貴欲三十萬、總計一百一十萬、除兵部該三十三萬聽徑發外、本部該七十七萬、除四川於湖廣取銀一十七萬、陝西十三萬、共三十萬、貴州於雲南二十三萬、止實解過七萬餘兩、湖廣一十一萬、廣西福建各十萬、共三十八萬、



催督軍前支用外數尙不敷。目今太倉懸罄，動支爲難。各省空虛，挪借尤難。反覆思維，計無從出。惟是照依東征事例，地畝加派，以濟一時。除貴州地里確，委難徵求。查湖廣通省稅糧，每石加派一錢二分。每歲可得銀二十六萬二千二百二十三兩零。四川通省稅糧，每石加派一錢二分。每歲可得銀一十二萬三千四百二十五兩零。行令有司，於條鞭之外徵輸，以佐時急。再照加派所入，楚得其全，蜀得其半。貴處其不足。然貴之所難，兵俱新增，餉無宿儲，需銀實切。則酌盈濟虛，相應不分畛域。通融支用，況總督兼制三省，調度兵食，自有權衡。總之期於戡難，不爲厲民等因。覆奉聖旨，是兵興餉急，這四川湖廣地畝加派，准權宜行。著總督於三省通融支用，仍禁有司豪右巧避貪漁等弊。毋致累害窮民。兵罷之日，卽行具奏減免。欽此。備咨前來。已經通行三省。欽遵去後。爲照播賊猖亂，流毒三藩，調兵合勦，業有成命。惟是賊勢衆大，歧路甚多，故用兵不得不多，而糧餉不得不裕也。奈何黔省窮荒特甚，儲蓄絕無。及至乞諸鄰省，又不克濟。以此該部不得已，而有加派之請。議令三省通融支用，無非同舟共濟之誼。目今進兵在邇，師貴宿飽，未有驅枵腹以赴敵者。本院旣奉有明命，義難坐視。及查川貴用兵，各近十萬。湖廣止四萬。所據二省前項加派銀兩，相應酌以進兵之多寡，爲用銀之等則。從公分析，通融支用。共濟時難。爲此除行四川布政司、動銀五萬解發貴州協濟外，合咨貴院，煩爲轉行布政司，暫於庫貯別項銀內，借支十萬兩。火速解發貴州協濟聽支。一面行屬徵派內將十萬補庫。其餘一十六萬有零，聽該省軍前支用。此係立等待用事。理幸勿遲誤。仍希將支發過緣由報查。

咨兩省約期進兵

爲軍務事。照得播賊楊應龍、兇同梟獍，狠逾豺狼，拒敵王師，三省盡爲塗炭，殺戮將領，萬姓悉被虔劉，惡極滔天，罪已淪於不道。孽盈彌地，犯豈止於無將，城野難堪，人神共憤，效尤可懼。王法不原，本部院奉命總督，職在專征，且朝廷斷以征勦爲期，則主將當以蕩平自誓，卽今糧草處處霧集，兵馬在在雲騰，加之文武同心，中外僂力，旣衆議已僉同，應整師而問罪，合就約會，共伸大舉，爲此合咨貴院，煩請移駐近播地方，獎率貴省文武將吏漢土官兵，的於二月十二日，各照分定道路同日並進，開刀勦殺，至十八日各抵播州，師期已定，各宜奮勇據忠，布昭聖武，犁庭埽穴，謀慮務出於萬全，震疊天威，戡定期收於一戰，永清三省之妖氛，共洩四海之憤恨，用命衝鋒，直前奏績者，賞格具在，斷不食言，違命逗留畏縮罔功，及不依期進兵策應，因而失誤軍機者，賜劔森嚴，決不姑貸，希速通行遵照，仍乞具覆報查。

咨湖廣催兵運餉

爲緊急軍務事。照得湖廣偏橋征播官兵，與本折糧餉，節經本部院督催半年，司道視爲緩務，迄今無一就緒，以致該賊乘虛燒殺偏橋屯堡東坡居民，卽今出沒無常，情形殊不可測。在四川貴州將兵業已雲集，本部院去歲建牙重慶，分布調停，親征定擬師期，約會併力進勦，祇因偏鎮一帶無兵無餉，有礙二省舉事，數十萬兵馬坐食等候，誤事甚非渺小，其糧餉一節，先該戶部題允存留漕糧，以濟三省軍中之用，近接邸報，倉場總督趙一本事關國計等事，奉聖旨，這本說湖廣漕糧係于京都軍需，不宜奏留爲川貴

用兵之費。著送揭戶部覆議來看。欽此。爲照此項漕糧。既奉覆看。必不能濟。惟是節次行催買運。并倉儲碾米。湖北秋糧改徵本色。乃原行專責措辦之事。該司亟應運發。以濟燃眉之急。若再遲延。大事去矣。三省安危所係。合再差人守催。爲此合咨貴院。煩請軫念川貴兵馬等候。速將原調各上司土兵四萬名。注意查催。未到者。差人分投前去守催。星夜齊到偏橋一帶分布。仍須人人驍勇。堪充克敵。嚴責監軍二道。起發原造衣甲器具火器火藥。解給總鎮及領兵等官。散給戰兵。以便對壘。其本色糧米。速催布政司並督餉道將買完。并倉穀造米共三萬石。委官督夫運至偏鎮相應地方收貯。轉運營中支給。其該司近報長衡荆岳辰常靖等七府倉穀。作速行令磨米解運。仍再設處多方糴買。務足四萬官兵一年之需。脫有違誤。責在該司。其折色銀兩。與烘炒炒米薑鹽等項。俱照原行製造起運。勿得再遲。有誤事機。卽日春雨水泛。不便進攻。耗費官儲。干係重大。希將兵餉到營的確數目。備咨軍門。幸勿再遲。

### 發銀思南糴米

爲軍務事。照得播賊流毒。三藩興師征勦。一路由龍泉進攻。已將施南平茶等司土兵。并建越等兵。共計一萬三千五百員名。行委參將王一桂。坐營孔繼祖等統領。前赴貴州思黎防禦。并聽令進勦去後。爲照此役係奉明旨合兵共伐。事屬三省。非一四川事也。是兵從黔進。糧當黔備。不問可知。但該省屢稱錢糧詘乏。措處爲難。若再責之預備。恐致誤事。所據三箇月本折。相應通令川省出辦。除已預支一月折色外。合再買備二月本色。以便兼支。及查每兵日給食米一升。共計該米八千一百石。每石價銀五錢。共該銀

四千五十兩。合行就近平糶。庶免搬運之勞。除行重慶府動支銀四千五十兩。差官管押前來外。爲此合咨貴院。煩爲轉行分守思仁道。卽將解到前銀。轉發思南府。責成掌印官。照數分發行戶。收買乾圓好米八千一百石。或運婺川。或運龍泉。悉聽該道督同該府轉運軍前。聽委官隨營支放。其各兵到彼。每兵卽各先給米一升。以作上月本色。至近日領過預支糧銀。每名多銀七釐。准作下月折色。餘聽另行解發。只此三月支盡。以後若有不足。則聽該省備辦。幸勿違誤。

咨湖貴分解漕糧接支

爲楚滇助餉。勢難如期。懇乞聖明下部別處。以濟軍興事。萬曆二十八年二月十二日。准戶部咨。該貴州巡撫都御史郭。并巡按御史宋具題。本部覆議。取滇楚二省銀。又取福建廣西銀。及稱近該科臣李條陳。本部覆請留湖廣二十七年分。應該解京漕糧三十七萬餘石。亦聽總督派撥三省通融支用。去訖。等因。奉聖旨是。欽此。移咨到本部院。准此案。照湖省解京漕糧三十七萬餘石。先該都給事中李奏抵三省軍餉。續該倉場總督趙題稱不宜奏留。下部覆議。今閱部文內云。聽撥三省通融支用。是此項漕糧仍充三省軍餉矣。及照八路進兵。蜀當其四。黔當其三。楚當其一。前項漕糧。卽當以用兵之多寡。爲分派之等則。但偏橋迤西一帶。旣屬楚中節制。則龍泉一路兵糧。應在彼中聽支。相應均分。以濟急用。爲此合咨貴院。煩將前糧三十七萬。每省各分一十二萬餘石。存貯候支。內該省者。運至偏橋龍泉。貴省者。聽運貴州。川省者。幸差官管押。從水路挽運。四川至重慶。轉發營中各聽支用。舡隻行令所司。上緊刷撥。或

動支官銀雇募務在三月以裏到重慶此係大軍張口待哺事理幸勿遲緩先將起發數目日期咨報查考。

### 咨覆湖廣進兵

爲請議進兵事。准湖廣撫院支咨仰乞裁定。令湖貴三總兵各以全力獨當一路。專督兵將相機進勦。庶見委任責成之意。等因。到部院。爲照貴院議以偏橋迤西思石龍黎則屬總兵陳璘。興隆黃平則屬總兵李應祥。烏江養龍則屬總兵童元鎮。各專一路。分布甚當。但查圖本。興隆偏橋龍泉三處。各係一路。直抵播州。祇緣興隆偏橋兩兵初入白泥之地。路經四牌。此中助暴生苗。盤據作梗。必須兩兵先將悍苗合力勦盡。埽清運道。然後分道而進。至播方得會哨。非謂沿途一路而偕往也。及查龍泉一路兵止二萬。用副總兵陳良玘督之。亦足堪任。所據陳璘李應祥仍聽會同了此四牌之苗。方行分路爲便。矧官兵業已進營。旣難中制。亦難遙度。應聽二將便宜計議行事。不宜臨敵更易。庶免掣肘之虞。爲此合咨貴院。煩請查照。仍移文總兵陳璘遵照施行。

### 行查烏江河渡失事

爲緊急軍情事。准貴州撫院郭咨。據左監軍道呈。據河渡統兵都司張秉忠報稱。本年三月十四日夜。擒獲奸細。搜出公文。知賊衝營。十五日未時。播賊突出。比時雲南沅江寧州羅平等兵迎敵。賊遁。詎料無援。兵衆淹溺。督陣官何天慶名色把總甘靖等四名。哨長許應援。砍賊數人。中槍而死。餘各陣亡。領兵指揮

胡珠、王之瑞、馬時亨、督陣贊畫黃龔、千戶龔勳、劉應祖、百戶邵先業、把總周貴、安時泰、冒陣而出、其餘死傷官兵、查明另報。又准咨據總兵童元鎮、手本據原任參將楊顯稟稱、三月十六日午時、據永順官兵出哨至雅水、偶遇安兵約會盟誓、共圖攻取、各有旗號、目把實當、意在十八日起營、道鎮疑慮、詭謀、亟傳令間、適據霸陽守備陳雲龍報、賊兵不計其數、前來衝突、官兵連對三陣、第四陣賊兵益多、所執旗號、卽昨會哨質當旗幟、永順中哨驚亂、不能禁止、霸陽兵相繼奔渡浮橋、一人走過、砍斷橋纜、隊兵俱各浮水、不能水者、淹沒、守備陳雲龍等、不知下落、殺傷官兵、候查明另報等因、咨報到部院、爲照烏江河渡二處、旣得斬關而入、自宜堅壁據守、以待諸路官兵進關、然後併力長驅、方爲上策、乃始而奸細之供報、則不作隄防、繼而狡賊之詭謀、則不知覺察、且扼險不能固守、據橋莫之把截、此皆在事各官、玩於鄰之震忽也。方今各路、俱已入關、直抵白田、兵精糧足、滅此小醜、勢如拉朽、所據該路兵馬、雖有此失、自當因敗爲功、不宜灰心、致沮士氣、合咨貴院、煩行監軍道鎮、獎率兵馬、收集殘卒、多方鼓舞、加意撫綏、如雲南泗城、霸陽、永順等兵、應添補者、就使添補、應另調者、火速另調、一留省城彈壓、一屯烏江戰守、務俾內外備禦、威武用張、則聲勢聯絡、旣可以壯犄角之勢、又足以杜窺伺之奸、於時勢弱、則保境自完、勢強、則捲土直入、擒惡擣巢、共奏奇績、慎勿灰沮未便。

調滇兵咨貴州備餉

爲緊急軍務事、本年三月二十七日、准雲南撫院陳咨稱、本院復又陸續調發精兵五千餘名、選委都司

張先聲統領前詣霑益信地分布防禦播賊衝突且以出奇本院於三月十三日移駐曲靖境上獎率官兵共圖犄角滅賊等因到部院看得滇省發兵五千移節曲靖應援足見同舟共濟之誼滅此朝食之懷但貴州烏江一路兵馬單弱需兵萬分緊急滇院帶行精兵五千見屯霑益去黔不遠與其立幟遙爲屏障不若臨戎共奏偉績亟應起發到黔以援彼中緊急及照沐總鎮屢奉明旨責成帶兵援勦至今杳無音耗應合一併移催等因備將前由已於四月初一日移文差人前往撫院陳處發前兵并促沐總鎮帶兵前來應援外所據滇兵到黔糧餉應合移咨整備爲此合咨貴院煩爲查照速行督餉道將滇兵五千本折糧餉作速計處停妥聽候官兵入境即便接支仍一面差官持令前去督催剋日抵黔協勦勿得遲延頃刻其廣西總兵李如樟選帶土兵亦於是日一咨該省撫院給與行糧應付催促將兵星馳前來一牌行該鎮速詣近貴地方約會貴院及鎮道併力勦賊如尙未到仍煩就近再催希將各鎮移駐日期各帶兵馬管數咨報軍門查考勿違

### 咨湖廣催漕糧折銀解充軍餉

爲楚滇助餉勢難如期等事本年四月初三日准湖廣撫院支咨稱楚省二十七年分留用漕糧除華容江陵等縣因患水災近准部咨止徵正米一萬五千五十七石六斗一升零每石折銀七錢共該銀一萬五百四十兩三錢三分零其餘州縣實止正耗米共二十七萬六千九十石七斗六升三六耗席輕齋銀三萬六千四百八十三兩四錢二分零楞木銀七百八十八兩八錢三分零以上銀米三省均分每省止

該本色漕糧九萬二千三十石二斗五升五合。改折漕糧并三六耗。席楞木等銀。各該一萬五千九百三十七兩五錢二分八釐四毫。第惟本色米石解運入川時。值三峽之水瀾漫難挽。合無照數改折。責成糧儲道易銀。行令湖廣布政司差官解赴川中軍前聽支。庶於事省用足等因。到部院看得時下正當青黃不接之時。米糧騰貴之際。誠得本色之助。有裨多矣。但稱峽水泛漲。挽運艱險。委屬不便。既經貴院酌議明白。相應改折。庶爲省便。爲此合咨前去。煩將應解川省漕糧九萬二千三十石二斗五升五合。照江陵等縣事例。每石折銀七錢。共該銀六萬四千四百二十一兩一錢七分五釐。同災傷改折并三六耗。尖席等銀一萬五千九百三十七兩五錢二分。通共八萬零二百五十八兩六錢九分五釐。一併行令該省布政司火速差官解川交割。以便及時轉發買米。運赴軍中接支。其貴州糧米糴買甚難。仍運本色。庶得濟急。此係三軍立等待用事理。幸勿遲誤。

咨覆貴州照批行湖廣助餉

爲地方孤懸等事。四月初三日。准貴州撫院郭咨。據湖廣布政司呈稱。播會肆逆。流毒三省。湖廣止偏橋一帶。備禦無用多兵。其四萬餘兵。原爲三省通融調用。卽供各兵之餉。亦卽係三省通融支用。非專爲楚也。統計四萬五千之兵。兼以軍火器械等項。非七十萬兩之餉不可。先蒙部題查追舊欠。皆係遠年積逋。勢難追併。遂議留見在漕折各項。總之僅四十萬有奇。本司發過餉銀。及製造炒米薑鹽等項。共動過銀一十四萬六千餘兩。內有五萬餘兩。係皆借支。缺餉二十萬餘。將何設處。查得見有應解正項。額派虞衡



段正馬航工料銀兩一併題留充餉。俟竣事另行處補。蓋湖省用兵本爲黔蜀原屬通融。卽同協濟。乃貴州又執三省通用之議。而欲分餉解彼。如廣西鹽銀尙多。再借二十萬。在廣西諒無所靳。其貴州請分加派庶免撥發。似難拘於分餉而後通融也。又稱輕齋楞木等銀共四萬零一百一十八兩。動解過九千六百九十餘兩。充餉尙存三萬四百二十五兩三錢。合聽四川部院酌派動用。卽以此項多助貴州。在楚民亦所甘心。其加派錢糧免分貴州。庶楚與黔不致兩誤。合行咨請移行湖廣。將加派銀兩仍舊起解貴州。接濟燃眉。至於司議免分貴州。恐難依從。等因。到部院。簿查四月十一日。據湖廣布政司呈詳前事。該本部院批。播賊一破偏橋。直走清鎮。全楚勢且不保。今日利害。三省共之。何謂湖省用兵。本爲黔蜀也。二省助黔。奉有明旨。四川僅派銀十二萬。已借十萬給黔。湖廣派二十餘萬。可以一萬塞責乎。如曰該省養兵四萬。則四川養兵十五六萬。非無事也。施州兵以楚兵用之。楚帥信地亦四川餉之矣。漕糧已屬京餉。豈得遂作楚數。廣西已餉黔三十萬矣。湖廣助黔非十萬不可。仰作速解發。無致誤事。繳已批該司遵照去後。今准前因。擬合咨覆爲此。合咨貴院。煩請移行湖廣撫院。檄行湖廣布政司查照批詳。多方設處。務足十萬兩之數。火速差官徑解黔省。接濟支用。施行。

### 破圍塘報

爲飛報捷功事。萬曆二十八年六月十五日。據分守川東道按察使張悌報稱。先奉本部院催督全蜀官兵四路勦播。該監軍參政張棟等。贊理監紀推官高折枝等。總兵劉挺、馬孔英、吳廣等。擊破逆酋楊應龍。

婁山桑木巖門等關。直逼會入龍巖。國外因圍形險峻。滾木礮石。交雜如雨。仰攻甚難。而又將心不齊。旬餘未下。復奉本部院申嚴尙方之劍。大發懸賞之銀。按院移駐重慶。就近監臨。仍各檄本道入營。輯和諸將。歃血盟神。刻期平賊。該本道馳赴軍前。會盟誓師。圍之前後。往來策督。已於五月初十日。圍前攻毀鐵柱水門二關。圍後攻奪三連山。賊勢已窘。而死守尙堅。且緣圍後可攻之地。一爲水西所據。而不實攻。一爲詐降詐死所愚。而不急攻。復奉兩院糾劾誤事之將。諭退水西之師。又遣中軍參將余德榮入營。亟催時貴州平越湖廣偏橋等兵。亦集圍下。該本道與川貴湖廣監軍等七道會呈。本部院詳允各路總兵輪攻圍後。於是總兵劉綎。同貴州總兵李應祥。移攻圍後。與川湖總兵吳廣。陳璘。間日輪攻。本道與監軍張參政。謝參政。將後發賞銀二萬兩。盡數懸示。鼓勇三軍。卽於六月初五日黎明。親督進攻。劉總兵下兵將振奮。矢石不顧。銃礮震天。喊聲動地。一攻克其頭關土城。再攻克其二關石城。賊衆披靡。勢如土崩。圍前高推官馬總兵等。亦督兵攻打甚急。該劉總兵以天晚登圍。慮有疏失。傳令據關而營。抵夜。賊降甚衆。楊酋大出賞銀。刻苗拒戰。苗不敢應。酋遂失魄。三更之後。苗奔圍前。欲殺出逃生。會見諸苗離散。中夜徬徨。無計得脫。投縊自縊。次早輪該吳廣陳璘攻打。苗盡前奔。兵不血刃。一擁而上。遂入酋宅。俘獲逆酋妻子田氏。楊朝棟。并三男五男八男九男。與各妻女弟姪繡女等。及各斬級另查的數。圍前高推官馬總兵等。嚴陣堵苗。未明大戰。同時俱登。俘獲宣慰宋承恩。土舍馬千駟。主謀孫時泰。楊華。吳應達。何廷玉。宋堯相。宋一變。陳大才。何玘。僞內使己卯。戊寅等。并各斬級另查的數。俱續報外。仍有滾溝奔箐賊苗。聽各兵初

七日搜捕、盡殲黨賊。八百年之會圍、盡成邱墟。數萬餘之苗級、足築京觀。此皆仰仗皇威丕振、廟算有赫。部院節制維嚴、運籌決勝之所制也。一切改土爲流、拓疆千里、善後撤兵、嗣卽查議等因。又據川東監軍參政張棟報稱、自四月十九日圍圍以來、兇酋骨刻老虎、兇苗負固、接攻不下、情節陸續塘報外、續蒙部院深念師老糧乏、委文武大吏各一員、至營督責、問惟龍巖圍極天下至險、而狡酋設備極天下至周、況以必死之寇、用必散之財、悍苗無知、劫於威惠、殊爲死守、日互爲死傷、不可勝紀。然賊食日減、賊黨日消、又無外援、時至事起、雖孫吳不能易矣。五月二十六日、八道五鎮爲會盟、以一衆心、懸重賞、以鼓敵懷。前後左右、守各有地、四面夾攻、應各以時。前之海龍壩、左之原舊腰營處、右之板水蓬口、俱十里外各爲一營。專責一將、監紀一官、把截林箐隘口、以防其逸。移劉總兵於後、與周副將號綦南營。李總兵號平越營。而馬總兵率邊兵與酉石劄營圍前、專備衝血戰。且計鋒太銳則少疏之、令擒於防逸之兵、分布一定。職欲在前調度、而劉總兵張按察使不肯、必欲職同行。六月初一日、天少霽、至圍後則初二初三初四日俱雨、與各道四總鎮計分攻合攻。合攻有因人之力者、分攻有欲乘人之功者、各以私心、又不相下。遂爲剖析、多主攻。據陳總兵謂、先劉李擬初五日綦南平越。初六日永合偏橋。如不下、初七日則合攻之。初五日晴、劉李二總兵分左右各占一山、五路併進、火礮齊舉、職擐甲冑與守道余參將麾旗助喊、不移時、遂得土城第一關、賊崩走、逆龍手刺三苗、不令入。我兵乘勝直上、又得石城第二關、殺聲震聳、沸搖山谷。時可遂取三關登圍矣。緣時已至未、戰久氣竭、遂且罷攻營守。而城頭答話乞降者紛紛矣。是夜半、田一

鵬、楊朝棟潛出講話。黎明則田氏同宅眷二百口已在城樓。餘果投出千餘，多爲各鎮爭殺之。四更後前關喊殺聲震，則石砮毛兵馬總兵令偷上，并多乘機前奔者爲大戰。屍僵五六里外。黎明吳陳兵上攻第三關，不見出敵者。乃知賊已前潰，遂各進關圍衙院。而賊已死。蓋是夜應龍不寢，四望圍周，一無脫處。各巷隘把守者俱無有。遂同二妾自縊。妾一不死。田氏、楊朝棟率宅眷百餘口一同出投。爲陳吳所執。另置一室，取出逆會屍。火始發。八道令奏民彭廷壽、周世祿驗的是實。各路斬俘報雖未備。約近萬矣。一圍遂平。是役也。拮据已易三時。而成功未踰四月。兇會逆黨擒斬殆無子遺。如會子朝棟、以棟、勝棟、會妻田氏、小田氏、朝棟二子、會長女、次女、三女、會族兆麟、世龍、兆龍、會親田一鵬、宋承恩、馬千駟、會黨何漢良、葉喜受、馬忠、何廷玉、何明、孫時泰等，尙有未報者。黃七則下巖自縊。俘其妻，似無多逸者矣。又據海龍壩都司趙賢輔、監紀同知史朝貞報，擒苗百餘。惟左右尙未報至。十餘年謀逆狂逞之寇，八百載富強縱肆之家，據其兵力謀謨器械衣甲，獨冠西南諸夷。卽水西終以不能必取自退。今圍於四旬，舉於二日，人力不至於此矣。此皆宗廟社稷之靈，廟堂帷幄之勝。而本部院腐心嘔血，發策決機，一腔忠義，無一刻不激發於三省道鎮之間。九月籌畫，無一事不措置於八路兵食之內。而職與將士受成奉命，奏此膚功，尙多攜貳延緩之愆。至煩再監，亦得借以竣事，有厚幸矣。除擒斬功級查明另報等因。又據川南監軍參政謝詔報稱，本月初六日，該各鎮道分定永合二路進攻日期。本道先日會同四川吳總兵、偏橋陳總兵、湖廣監軍道議定。於是日五鼓分道進攻。官兵奮勇登城，殺退苗兵，直衝賊巢。逆酋楊應龍見勢窮蹙，在房自縊。放

火焚燒。吳總兵督兵從火燄中奪出，酋已氣絕。當日生擒酋子楊朝棟、妻田氏。賊屬楊兆龍、楊從龍、楊世龍、楊勝龍、楊國棟、楊堪棟、田有秋，并謀士戴貴、彭道、總管田一鵬、頭目張讓、趙士傑。其楊應龍身屍，卽約會三省鎮道及贊理監紀等官入城，喚集奏民彭廷壽等降。民羅國明等同酋妻男識認，真正是除裝盛解驗外，等因。又據貴州左監軍按察使楊寅秋報稱：逆賊楊應龍據囤環攻，日久未下。僉議併力攻打後囤，各路占據無地屯劄，職操馭水西將，首奪右槽山坡一帶營盤。於五月二十八日盡讓官兵，六月初二日川貴劉總兵、李總兵各先後督兵到囤屯劄。初四日三省道鎮畢會共議，劉綎、李應祥初五日陳璘、吳廣於初六日各照期分打。劉總兵攻土城門以左，李總兵攻土城門以右，該職同李總兵將右路分撥三處，以都司徐成領守備童龍等兵奪鳳凰嶺，都司張秉忠等兵由左嶺進，都司戴守禮等兵由右嶺進。泗城龍英等土兵於囤右崖壁截殺，副總兵陳寅督獨山州等兵於前門朝天等關截殺。參將蔡兆吉督兵於板閣蓬水把截。初五日五鼓，職等會同劉總兵晝地齊攻，賊抵死在於鳳凰嘴拒敵。黎明我兵奮呼一湧衝殺，賊奔潰退走土城。我兵乘高俯瞰攻賊立腳不住，登時攻倒土城。一面拆卸，賊拒月城，矢石如雨。職同總兵在高山搖旗吶喊，督兵前進戰至已未，緣城接梯，高招先登。各兵用肩頂城上先登者，手挽魚貫而上。陳邦揚親斬冠帶管事藍鳳鳴首級一顆。中軍指揮羅萬善親斬何提調男何訓首級一顆。從賊七十五顆。賊奔巖突死及銃死不及找級者，不計其數。將月城樓同劉總兵卽時放火燒毀。賊奔入大城死敵。自午至申，披堅出城衝突三次，每次我兵用佛郎機百子銃鳥銃等項直對城門齊打，賊傷退回。

天晚兵已疲困該職會同右監軍張參議督兵尤副使再懸犒賞每高招手銀一錢每兵銀五分各兵歡躍齊心就於月城劄守賊兵膽落在城叫喊乞降直至黎明時陳吳二總兵照依分定日期接攻賊倒戈奔潰各路兵一齊登圍擁入內城四面縱火賊酋楊應龍將臥房發火同愛妾縊死要將自焚時五路總兵官齊抵賊衙賊妻田氏賊第三男楊以棟妻田氏第五男楊良棟妻田氏第九男楊奇棟賊妾子楊勝棟妻田氏賊長女貞惠次女貞瑞三女貞福楊朝棟妻田氏長子松壽次子春壽女性福賊首何漢良田一鵬子六老僞內官十名使女十三口家人五名俱同時拏獲五路道將賊屍擡至城樓喚伊妻男五司奏民同驗真的付陳劉二總兵收驗俘獲賊屬眼同點明收置城樓宣慰司印田氏攜帶在身面交陳總兵收執聽解賊男楊朝棟賊弟楊兆龍走出吳總兵見獲在營賊從弟楊兆麟李總兵見獲在營其各該有名賊首原後圍攻破賊奔前門或斬級或生擒俱未漏網宣慰宋承恩已經本哨把總沈雲相拏獲被前路兵搶獲見在除本日生擒斬級俘獲及我兵陣亡輕重傷查明另報等因又據貴州右監軍參議張存意報稱先該三省八道奉本部院憲檄議得大兵攻圍賊圍一月未破師老財匱靡有究竟申飭各哨輪班攻打約以六月初五日貴州平越河渡哨與四川綦南哨同日協攻至日該本道同督兵尤副使偕左監軍楊按察使會同李總兵親督坐營官李師沆張奇盛等帶領平越河渡精銳衝鋒兵萬餘黎明赴圍後與綦南哨劉總兵左右夾攻綦南兵由左上平越河渡兵由右上賊衆強弩飛矢瀉石如雨我兵站立金鳳嘴不敢近前該李總兵提刀陣後嚴禁退縮三道復懸示特賞先登銀四百五十兩各兵死力直

衝將第一層土城傾毀十餘丈。賊退守第二層石城。我兵乘勝連破。將城樓打毀。直趨第三層石城。與萆南兵並劄城門。堅持不退。應龍父子披甲領苗連衝三次。自辰至未。我兵硬力死守。薄暮。士卒飢困。該三道與李總兵計議。賊必乘夜突衝。一面造飯餉士。一面犒給每高招手銀一錢。每兵銀五分。諭令標下指揮周宗堯。曹選。把總金世隆。劉朝臣。分督舉放號火銃礮。以防乘夜衝劫。三道同李總兵各將領官露坐嚴警。至初六日天未明。賊衆慌懼。多有從圍旁間道奔出者。三省官兵大衆分路攀緣而上。賊黨開門倒戈奔潰如蟻。我兵直圍楊應龍住宅。遵守前禁。不敢徑入宅內。官兵中有從宅後掘牆數孔而入者。比劉李二總兵引兵入宅。則楊應龍已縊死臥房。於亂兵中擡應龍死屍出驗。並收其妻田氏母子。及隨從侍女二三百人。於後城樓上拘候。先是又慮賊後攻急。必至前遁。該李總兵分本哨副總兵陳寅。參將蔡兆吉。都司莊志傳。守備伍萬鍾。汪如淵。及標下指揮徐登階等。各督部兵。於前門晝夜攻守。初六日早。陳寅等率兵登城。與各路兵合將飛虎關樓放火燒毀。斬獲多級。方會兵圍上。前後一時收功。爲照貴州李總兵督平越河渡。二哨會同四川萆南哨。攻打圍後。其結局雖在初六日三省並進之一晨。而摧賊鋒破賊膽以散賊黨。則在初五日蜀黔並攻之一舉。功次虛實。悉候勘查始定。本道不敢妄爲論列。惟是數百載西南盤據不拔之巨寇。億萬衆士女鬱結未伸之積讎。又三省七路兵糧不貲之勞費。往以頻年圖之而不足者。今以四月克之而有餘。皆仗本部院矢心討賊。一意主持。開誠布公。宣揚朝廷威信。凡文武將吏。莫不仰承石畫。奏此蕩平。良非偶然之故矣。今將前項進取緣由。并斬獲功級。差官星夜馳報等因。又據

湖廣左監軍按察使胡桂芳、右監軍參議魏養蒙報稱：本月初五日，輪該綦南平越二哨攻海龍圍。總兵劉綎先登將土城并第二層石城打破。李應祥繼之，陳吳二總兵亦同助陣，拆牆上城，賊勢大敗。初六日，輪該永合偏橋二哨攻圍。總兵陳璘、吳廣督率官兵，從第三層城左右蟻附而上。劉李二總兵繼進，當擒首惡何漢良。賊見官兵入城，皆倒戈投降。遂圍楊酋住屋，將田氏、楊朝棟、楊兆龍，并其妻女及楊酋第五子俱擒獲。楊應龍已經自盡，放火燒屍，當救火取出。審五司奏民與田氏等俱稱委係真正逆酋屍首。除職等即會同川貴各道查明另報等因。又據總兵劉綎報稱：四月十八日，逼酋入圍，分兵攻打。本職居圍前窮崖峭壁，天險莫登，惟圍後一線之路稍可進兵。緣係吳總鎮、陳總鎮所分信地，攻打五旬，堅守不下。乃蒙軍門院道會議將縣改攻後路，遵奉於六月初一日親率家丁與挑選精銳勇敢官兵八千，移營向後。又值大雨如注，連日不休。至初四日稍霽，比夕各該鎮議欲同攻。本職恐各人心不齊，自誓惟乞一路專攻，如亦不效，甘任其咎。當該二道懸賞衝鋒各兵，本職於初五日分布官兵四路攻打。將士奮勇一鼓而登，連克重城。賊衆披靡，死相枕藉。應龍勢窮力竭，本夜自縊身死。朝棟以棟、惟一鵬等奔投職部。周以德營為吳總鎮統兵攔截打傷，千總熊俊奪獲見存。本職但期賊以報九重而謝人言，敢復覲功。獨歸一己。況原節奉本部院憲牌各路，敵血同盟，各出精銳，更番攻取得賊之後，勿問出自何人。大家論功，若致僨事逸賊，且當連坐。昭然在案。今幸蕩平，是本職之功，即吳鎮之功也。又何計哉。況衝鋒血戰，奮險破城七路三軍，耳目難掩。是又不待辯者。在今將所獲有名首惡楊明、田飛鵬、張玉、周五巴、內使夏元



王守忠、壽元、慶元、慶壽、祿壽、庚辰、辛巳、及各斬獲苗級一千六百二十九顆。解赴贊理監紀史同知查驗。解道轉詳等因。又據總兵馬孔英報稱：本月初六日，本職會同各道并監紀高推官、預行將領土司等官、李經等，各照原分信地，剗立排柵，分布擺列。本職仍與高推官親身提兵，晝夜攻圍。申飭萬分加謹。於本日五更時，令各兵奮勇齊力，攻打擁兵上進。賊兵大敗，我兵乘勝戰奪二層飛虎關，嚴諭舉火燒毀。我兵愈加精強，先登賊之大岡，舉火延燒會房。各賊慌亂四出，惟惡苗死戰。本職提調所屬精兵，併力合圍，屢戰百陣，砍殺多酋。衆議前鋒不許割級，仍令多兵，遇有通賊處所，加兵拒堵，堵蕩殘酋，斬無對敵。賊苗方准割首。本職此時雖即上岡，傳令所部漢土官兵，不許一軍進應龍衙字，並不許夾帶一物。其應龍見得前門兵已上岡，遂自縊死。應龍妻子卽領闔家人口，盡從後門逃生。方將岡門一開，後兵方擁而入。隨將應龍衙舍、府庫、合兵圍之。其南川軍兵毫無相干。此各道監紀衆目所視者。況本職先已申飭，不啻再三。續據參將李經等各報稱：共斬獲苗級一千五百餘顆。生擒宣慰宋承恩、賊黨孫時泰、楊華、吳應遠、何廷玉、宋堯相、宋一變、陳大才、何玘、馬千駟等，二十餘人。又內府已卯戌寅等因。又據總兵吳廣報稱：本月初四日，各鎮道會議分定日期，攻打後岡。初六日，係本職與偏橋陳總兵進攻。該本職於初五日，移會監軍道謝參政、贊理監紀蔡知府、趙州同，取發衝鋒銀三千兩，獎率三軍。初六日黎明，督發都司趙應科等奮勇登梯，破城直衝楊應龍宅內。父子併力拒敵。會見兵勇，縊頸放火自焚。本職親蹈烈焰中，擒出酋已氣絕。生擒楊朝棟、田氏、田一鵬等，各營擒斬俘獲無算。此豈本職奮不顧身之功，實皆仰仗部院之神謨。監

軍之指畫。諸司道之協謀。監紀之贊襄。及在事文武諸臣之效力。故能使元兇就戮。圍穴蕩平。上紓宵旰之憂。下慰羣黎之望。除將楊應龍身首。及生擒賊首。卽行解報。其斬獲賊級。俘獲賊屬器仗。及有功員役陣亡輕重傷官兵。查明另報等因。又據總兵李應祥報稱。本月初五日辰時。督率各兵攻倒土城。已經馳報外。至巳時分。又該二道鎮懸賞各兵奮勇爭先。先將月城石牆攻破。賊兵披靡奔潰。墜巖死者。不計其數。初五初六二日。共斬獲功級四百七十八顆。其陣亡陣傷官兵查實另報等因。又據總兵陳璘報稱。本年六月初四日。該川湖貴州各道鎮會。又攻圍日期。劉李二總兵初五日。本職與吳總兵初六日。至期。劉李從圍後右邊進擊。本職與吳總兵自左邊攻打。自辰至午。攻破賊城兩層。本職密令副總兵陳良珙等。從中於初六日早銜枚前進。各從山坡懸上。擒殺把守城圍老虎軍。豎立兩鎮旗幟。舉礮爲號。劉李二總兵相繼齊進。各賊驚惶奔潰。官兵擁入直薄酋巢。楊應龍自知不免。當卽自盡。生擒伊妻田氏。男楊朝棟。以棟。良棟。奇棟。勝棟。并朝棟幼男松壽。春壽。及奏內有名黨惡何漢良等。就據田氏於懷中。取出該司宣慰司銅印一顆。當同監軍道驗收。轉解川貴監軍各道審驗。應龍全屍候解外。其擒斬功次。除查實另報外。各等因。塘報到部院。案照本年六月初九日。據分守川東道按察使張悌。及三省監軍參政張棟等報稱。總兵劉綎。李應祥。吳廣。陳璘。馬孔英等。各督官兵。於初六日攻破海龍圍。逼賊自盡。及生擒賊子楊朝棟等。捷報到本部院。緣事體重大。關係廟堂懸念。欲候報齊。恐致耽延。已撮其大槩。當於本月十二日具本題知去後。今據前因。則逆賊自盡。全屍見在。已經衆驗的實。逆賊妻妾子女。及同逆惡黨。已經生擒殆

盡逆賊糾刻生苗所稱老虎兵者聚而殲之。幾無遺種。且參伍諸報。則諸將先登後繼。大小功次。已可得其大凡。卽今播已盡平。兵已漸撤。改土爲流。已漸有成議。除候查明功級。通將三省八路各文武功罪。覈實。及善後事宜。另議具題外。合行塘報。

### 撤各省官兵回咨

爲仰仗天威。破圍滅賊。飛報捷音事。萬曆二十八年六月初九日。據八路監軍總鎮等官報稱。官兵自興師以來。殺賊大敗。追逼上圍。四面環攻。於六月初五日。奮勇攻破圍。甚急。逆酋自覺不保。是夜縊死。初六日。官兵一湧齊進。獲其屍首。生擒賊妻田氏。賊子楊朝棟等。妻妾子女。繡女及內監軍師頭目。并斬級萬餘。卽今賊巢一空。我兵盡劄圍上。十年狂寇。一朝蕩平。等因。到部院。除先行捷報外。案照先准貴院咨送將官某統領官兵到部院。已經發營分布進勦去後。今據前因。看得播酋楊應龍。滋逞淫威。甘爲叛逆。破城站已三五處。殺官軍至幾萬人。以至震驚西南。搖動海內。彼恃此圍險絕。以爲人迹必不可至也。乃今萬人同心。三軍用命。兩日之內。連克三城。盡破險圍。因而元兇自盡。逆黨就擒。圍固惡苗。盡膏霜刃。削株搯根。靡有子遺。從此四封千里。盡入皇圖。尺地一民。監歸王化。三省永無狗吠雞鳴之警。四海逆折。憑山嘯澤之奸。本部院待罪地方。殊爲多幸。此皆仰仗貴院矢心滅賊。唱義勤王。投袂興師。推轂遣將。以故天威所加。易如拉朽。非偶然而已也。除將各官兵擒斬功次。應紀應賞。與夫陣亡優恤等項。通候查明。敍錄具題。及照例支給行糧外。合先發伍。爲此合咨貴院。煩爲查照施行。

### 回覆楚省

爲楚滇助餉勢難如期等事。案查先爲前事，准貴院咨，差中軍把總李正實，領解銀三萬兩前來，已發重慶府秤收貯庫聽支，出給庫收，付差官回銷外，今照播賊幸已蕩平，原調各省官兵，亦經盡數撤發，其議留三省官兵糧餉各省本折，亦足支用。所據楚省未解漕糧，相應停止。爲此合咨貴院，煩爲檄行布政司，并督糧道，將未解川省漕糧扣算，或聽該省別用，或仍解赴部接濟支用施行。

### 咨賑民夷

爲軍務事。照貴州黃平東坡龍泉湖廣偏橋鎮等處地方，各與播州接壤，年來楊酋猖狂，毒流各處，軍屯民夷，或父母兄弟被其殺虜，或妻妾子女被其虔劉，受毒既深，幾無噍類。近日逆酋既以伏誅，黨類一鼓平定，地方怨忿，雖以少伸，而廬室空虛，何以爲生，相應亟爲賑恤，以慰衆懷。爲此除川中四路業已舉行外，合咨貴院，煩爲轉行該道選委能官，將前項被害民夷之家，盡數查出，大約以餉米一萬石爲率，每戶量給三斗，以示賑恤之意。事完將支過餉米數目，及賑恤過軍屯民夷姓名，造冊希由見示，以憑會題施行，仍行令承委官員，務要審實的確，毋容吏書作弊低昂，以致窮民不霑實惠。

### 查議善後

爲集義建置善後事宜，以圖久安長治事。該本部院會同貴州撫院郭、偏沅撫院江，照得播賊猖亂，興師征勦，三省之兇殘雖已蕩平，而百世之建置所當慎重。蓋緣該司五十四里，則夷漢雜居，所屬八司，則輻

幘廣遠沃野千里。壤接三藩。囿於腹裏之間。要非諸土夷可比也。乃逆賊父子大逆無將。自取誅戮。近准兵部咨。該本部題覆。曾惡既已怙終。六師斷難少貸。誅其人而磔其肉。削其土而改爲流。先旣奉有嚴旨。今更誓有師期。三省戮力。一鼓蕩平。俾螳臂不得以怒螳。螢火弗致於大燃。此朝野之同情。督撫之責任。而地方之至願也。題奉欽依。備咨前來。允宜遵行。以示更新之治。以洗汚俗之風。但事關創始。法貴僉同。合就通行查議。爲此移咨貴院。煩爲速行。監軍總鎮。及贊理監紀等官。齊集營中。從長計議。要見播州宣慰司。原係土司衙門。今逆賊不法伏誅。所議改土爲流。相應作何建置。或建立郡邑。用資撫摩。以兵備整飭之。有無穩便。或改移衛所定爲世守。以大將彈壓之。是否可行。文武官員。何地可以更調。共圖化理。軍兵戍卒。何處可以遷改。以實營屯。儒學驛遞。原有者。作何查復。土同知安撫長官。見存者。應否帶銜。衙門倉庫。城隍。旗纛。作何建立。城垣。橋梁。道路。作何修理。官吏俸糧。作何派徵。門阜徭役。作何編取。合用經費。錢糧。作何動支。應委董理官員。作何遴選。與夫疆界。作何清查。以免越占。田土。作何清丈。以杜奸欺。何民土。當給還。何賊產。當藉沒。孰宜招人領種。孰宜充作屯田。降夷。作何鈐治。地方。作何轄屬。事體。有無穩便。人情。有無相安。務在用夏變夷。長慮卻顧。凡有益於一方。真足以奠安長久者。釐爲數事。希於旬日內開款回報軍門。以憑覆議。會題施行。若有窒礙難行者。亦希明白見示。幸勿遺漏遲延。

### 黔省善後

爲集議建置善後事宜。以圖久安長治事。案照先該本部院看得播賊旣已蕩平。例應改土設流。行據川

湖監軍守巡等道條議前來會題間。適本部院感疾伏枕，未得題請。近閱邸報，該山西道御史李具題議建二府。又准貴院會稿，亦議建設二府。輿論既已僉同，卽應如議舉行。及查割撥一節，以黃平設府，餘慶白泥、雍水、重安設縣。此中尙有草塘容山，雖未鉅出，稽之輿圖，似亦在內。并龍泉設縣，俱應屬之黃平。隸於貴省。但賊滅之後，已及四月。若不及時修舉，恐地廣人稀，日久生變。一有他虞，反爲不便。除白田壩建府、松坎建縣，與湄潭等處，凡係播州五十四里之地，及真州一司，俱聽四川分屬。已經委官推官高折枝、同知張鼈、知縣寇克順、何珩，分投往彼料理外，所有黔省應委守巡參備知府知縣等官，勢不可緩。合行移知，爲此合咨貴院，煩將黃平、餘慶等司，應建郡邑，速爲委官，及時董理，共圖治化。仍將選擇過文武職名，并查草塘容山二司屬何縣治，希由併示，以憑稽督施行。